

冬十一月鄭伐許

程氏曰鄭伐於楚一年而再伐許故夷之

四年甲戌冬鄭伯伐許

左傳十二月鄭公孫申帥師彊許田許人敗諸展陂鄭伯伐許取鉏任冷敦之田

廬陵李氏曰鄭自隱十一年入許之後鄭許世讐至此凡書於經者又四侵伐矣然據左氏所記則邲戰之後鄭許首如楚蜀之後許乘楚車是許與鄭皆南面事楚者鄭方從楚何得如此晉楚之救不書於經事未可信也

又五年乙亥許靈公愬鄭伯于楚六月鄭悼公如楚訟不勝鄭伯歸請成于晉八月鄭伯及晉趙盾盟于垂棘十二月諸侯同盟

于蟲牢鄭服也十四年甲申八月鄭子罕伐許敗焉戊戌鄭伯復伐許入其郛許人平以叔申之封

十五年乙酉冬十一月許遷于葉

左傳許靈公畏偪於鄭請遷于楚楚公子申遷許于葉

張氏曰葉汝州葉縣葉近楚而楚遷許以自近中國盟主不能安小國而使之昵蠻夷以求安春秋深以著小國之失所也

高氏曰許微弱之國隣於鄭鄭亟加兵今遽遷焉蓋畏鄭而南依楚故以自遷爲文

春秋襄公三年辛卯冬晉荀罃帥師伐許

左傳許靈公事楚不會於鷄澤晉知武子帥師伐許

十六年甲辰夏五月叔老會鄭伯晉荀罃衛甯殖宋人伐許

左傳許男請遷於晉晉以諸侯會溴梁遂遷許許大夫不可晉人歸諸侯荀偃伐楚敗之遂侵方城之外復伐許而還

二十六年甲寅秋八月壬午許男甯卒于楚

左傳許靈公如楚請伐鄭曰師不興孤不歸矣八月卒于楚

高氏曰十六年晉伐許他國皆大夫獨鄭伯自行故許男欲報之以中國諸侯而卒於夷狄死非其所矣

悼公買靈公子在位二十四年元乙卯

春秋昭公元年庚申春正月叔孫豹會晉趙武楚公子圍及諸侯許

人于號

四年癸亥夏楚子蔡侯陳侯鄭伯許男及六諸侯會于申

左傳許男如楚楚子止之遂止鄭伯復田江南許男與焉使椒

舉如晉求諸侯二君待之楚以諸侯滅賴遷賴於鄢楚子欲遷許於賴使公子棄疾城之而還

九年戊辰春許遷於夷

左傳二月庚申楚公子棄疾遷許于夷實城父取州來淮北之田以益之伍舉授許男田然丹遷城父人於陳以夷濮西田益之遷方城外入於許

十八年丁丑冬許遷於白羽

左傳楚左尹王子勝言於楚子曰許於鄭仇敵也而居楚地以不禮於鄭晉鄭方睦鄭若伐許而晉助之楚喪地矣君盍遷許許不專於楚鄭方有令政許曰余舊國也鄭曰余俘邑也葉在楚國方城外之蔽也土不可易國不可小許不可俘讐不可啓

君其圖之楚子說冬楚子使王子滕遷許於析實白羽

十九年戊寅夏五月戊辰許世子止弒其君買

左傳許悼公瘡飲太子止之樂卒太子奔晉書曰弒其君君子曰盡心力以事君舍藥物可也

許男斯世子止之弟在位十九年元巳卯

春秋定公四年乙未春三月公會劉子晉侯許男十七諸侯于召陵侵楚

夏六月許遷於容城

張氏曰容城地名任公輔以為華容縣亦析之近地

王氏曰許四遷皆受楚令經悉以自遷為文蓋遠害就利而願遷也

六年丁酉春正月癸亥鄭游速帥師滅許以許男斯歸

張氏曰許自隱十一年齊魯鄭之入大抵困於與鄭為隣至成

十五年畏鄭而遷葉昭九年遷夷十八年遷析定四年又自析

遷容城以依楚不三年楚困於吳鄭遂滅之然哀元年以後許

復見者楚又存之也太岳之後其亾一見害於鄭其存一恃於

楚不過百年韓遂滅鄭亦有由矣

元公成史無其系在位二十二年

春秋哀公元年丁未春正月楚子陳侯隨侯許男圍蔡

汪氏曰楚復封許春秋不與楚人得封故但以自復為文亦猶

蔡平陳惠之封於楚而以自歸為文也

十三年巳未夏許男成卒秋葬許元公

凌氏曰汪氏以元公即斯也年表斯亾元公成在位二十二年

許公結元公子

春秋疏曰漢潁川郡許縣故許國文叔所封二十四世為楚所滅

楚云許年世史傳無考

廬陵李氏曰許在春秋不得為微國也春秋書許之事甚略何也春秋列國久於從夷者莫許若也齊霸未衰許嘗從齊晉伯方競許常貳晉一意從楚而始終見偏於鄭無以自立故春秋略之  
莒世章

莒子茲與期帝少昊之後也已姓

春秋正義曰世本莒已姓文八年傳稱穆伯奔莒從已氏是莒之姓已見於傳也譜云莒嬴姓少昊之後周武王封茲與於莒初都計後徙莒今城陽莒縣是也世本自紀公以下為已姓不知誰賜

之姓者十一世茲丕公方見春秋

路史曰莒與期始都計二世茲丕歸莒至紀公復紀姓

莒子

春秋隱公三年庚申夏五月莒人入向秋九月紀子伯莒子盟于密

左傳莒子娶于向向姜不安莒而歸夏莒人入向以姜氏還

四年壬戌春二月莒人伐杞娶平妻

八年丙寅秋九月公及莒人盟于浮來

桓公十二年庚辰夏六月壬寅公會杞侯莒子盟于曲地

莊公二十八年乙卯冬莒慶來逆叔姬

僖公元年壬戌冬十月公子反帥師敗莒師於鄆獲莒挈挈莒子之弟

左傳二十五年丙戌衛人平莒於魯乃盟於洮修衛好及莒平也

茲不公

春秋僖公二十六年丁亥春正月己未公會莒子衛甯速盟于向

左傳公會莒茲不公甯莊子盟于向尋洮之盟

杜氏曰茲不時君之號莒夷無謚以號為稱

二十八年巳丑夏五月癸丑公會晉侯齊侯宋公蔡侯鄭伯莒子盟

于踐土冬公會晉侯諸侯莒子邾子于温

紀公庶其

文公七年辛丑冬徐伐莒公孫敖如莒洮盟

左傳穆伯娶于莒曰戴已生支伯其娣聲已生惠叔徐伐莒莒

人來請盟故穆伯如莒洮盟

文公十八年壬子冬十月莒弑其君庶其

左傳莒紀公生太子僕又生季佗愛季佗而黜僕且多行無禮

於國僕因國人以弑紀公以其寶玉來奔納諸宣公公命與之

邑曰今日必受季文子使司寇出諸竟曰今日必達公問其故

季文子使太史克對曰云云詳繼統類

渠丘公朱

春秋宣公四年丙辰春正月公及齊侯平莒及邾莒人不肯公伐莒

取向莒邾有宿怨齊魯平之而莒不肯故伐之

十一年癸亥夏公孫歸父會齊人伐莒

十三年乙丑春齊師伐莒左傳莒恃晉而不事齊故也

左傳成公七年丁丑晉侯及諸侯同盟于馬陵莒服故也莒屬齊齊服晉

故莒從之八年戊寅秋晉侯使申公巫臣如何假道于莒與渠丘公立

於池上曰城已惡莒子曰僻陋在夷其孰以我為虞對曰夫狡焉思啓封疆以利社稷者何國蔑有唯然故多大國矣唯或思或縱也勇夫重閉况國乎

杜註曰渠丘公莒子朱也池城池也渠丘邑名莒縣有蘧里

正義曰渠丘莒之邑名夷不當有謚或作別號此朱以邑名為號不知其故何也

春秋成公九年卯春正月公會晉侯齊侯諸侯莒子杞伯同盟于蒲

冬十一月楚公子嬰齊帥師伐莒庚申莒潰楚人入鄆

左傳楚子重自陳伐莒圍渠丘渠丘城惡衆潰奔莒伐申楚入

渠丘莒人囚楚公子平楚人曰勿殺吾歸而俘莒人殺之楚師

圍莒莒城亦惡庚申莒潰楚遂入鄆莒無備故也君子曰恃陋

而不備罪之大者也備豫不虞善之大者也莒恃其陋而不修

城郭浹辰之間而楚克其三都無備也夫

穀梁傳其曰莒雖夷狄猶中國也大夫潰莒而之楚是以知其

上為事也惡之故謹而日之也

十四年甲申春正月莒子朱卒

黎比公密朱之子

春秋襄公六年甲午秋莒人滅鄆

八年丙申夏莒人伐我東鄙左傳以疆鄆田蓋莒既滅鄆魯於是侵其西界故莒伐魯東鄙正之

十二年庚戌春三月莒人伐我東鄙圍台季孫宿帥師救台遂入鄆

十六年甲寅春三月公會晉侯莒子十一于溴梁晉人執莒子朱子

以歸詳邾章

十八年丙辰冬十月公會晉侯莒子十二諸侯同圍齊十九年丁巳春正月

諸侯盟於祝柯

二十年戊午春正月辛亥仲孫速會莒人盟于向莒數伐魯前年諸侯盟祝柯和解之

二十三年辛酉冬齊侯襲莒

左傳齊侯還自晉不入遂襲莒門于且于傷股而退莒人行成

齊侯歸二十五年癸亥夏莒爲且于之辱故莒子朝于齊

三十一年己未冬十一月莒人弑其君密州

左傳莒黎比公生去疾及展輿既立展輿又廢之比黎公虐國人患之十一月展輿因國人以攻莒子弑之乃立去疾奔齊齊

出也展輿吳出也書曰莒人弑其君買朱鉏罪之在也

杜註曰買朱鉏密州之子

卮言曰莒犁比公之世與諸侯會盟春秋序在曹之下邾滕

之上書莒子者十七書莒人者七雖嘗伐魯而卒與魯盟雖見

襲於齊而又朝於齊也此其治國交隣亦可謂能矣而竟以廢

嫡立庶致殺身之禍豈其老而智昏耶雖然晉獻齊桓亦以嫡

庶不明幾于亡國也何責莒子哉

### 莒展輿

春秋昭公元年庚申春三月取鄆

左傳季文子伐莒取鄆莒人告於會楚告於晉曰尋盟退而

魯伐莒潰齊盟請戮其使趙孟請諸楚曰魯叔孫豹可謂能矣

請免之以靖能者莒魯爭鄆爲日久矣苟無大害于其社稷可

無尤也去煩宥善莫不競勸子其圖之固請諸楚楚人許之乃

免叔孫

秋莒去疾自齊入於莒莒展與出奔吳

左傳莒展與立而奪群公子秩公子召去疾于齊秩齊公子鉏納去疾展與奔吳魯叔弓帥師彊鄆田因莒亂也

杜註曰弑君賊未會諸侯故不稱侯

正義曰釋例云諸侯不受先君之命而篡立得與諸侯會者則以成君書之若未得接于諸侯則不稱爵傳云會于平州以定公位又云先君若有罪則君列諸會矣此以會為斷也故杜云然

著丘公去疾

左傳昭公四年癸亥莒著丘公立而不撫鄆鄆叛而歸魯故魯取

鄆

春秋昭公五年甲子夏莒牟夷以牟婁及防茲來奔秋七月戊辰叔

弓帥師敗莒師於蚡泉

十年乙巳秋七月季孫意如叔弓帥師伐莒取

十三年壬申秋公會劉子晉侯莒子十四于平丘諸侯

左傳為取鄭故晉將以諸侯討魯邾人莒人復愬于晉晉侯不

見公詳邾章

十四年癸酉秋八月莒子去疾卒冬十二月莒殺其公子意恢

左傳秋八月莒著丘公卒郊公不感國人弗順欲立著丘公之弟庚與蒲餘俟惡公子意恢而善於庚與郊公惡公子鐸而善於意恢公子鐸因蒲與侯而與之謀曰爾殺意恢我出君而納



庚與許之十二月蒲餘侯茲夫殺莒公子意恢郊公奔齊公子鐸逆庚與于齊齊隰黨公子鉏送之有賂田

共公庚與著丘公弟

春秋昭公二十二年辛巳春齊侯伐莒

左傳春二月甲子齊北郭啓帥師伐莒莒子將戰苑羊牧之諫曰齊帥賤其求不多不如下之大國不可怒也弗聽敗齊師于壽餘齊侯伐莒莒子行成司馬竈如莒涖盟莒子如齊涖盟盟於稷門之外莒於是乎大惡其君

二十三年壬午秋七月莒子庚與來奔

左傳莒子庚與虐而好劔苟鑄劔必諷人國人患之又將叛齊烏存帥國人以出之庚與來奔齊人納郊公

郊公狂

昭公二十六年乙酉秋公會齊侯莒子邾子杞伯盟于專陵

定公四年乙未春三月公會劉子晉侯莒子十八于召陵侵楚

哀公十四年庚申夏五月莒子狂卒

庖言曰傳言齊人逐庚與而納郊公後二年經書莒子盟于鄆陵日即郊公也又十年而書莒子盟于召陵又十六年而書莒子狂卒凡例同盟書卒即任即郊公而傳不載豈郊公之後又有狂耶

綱目周考王十年庚戌楚人滅莒史記楚世家簡王元年北伐莒滅之

春秋書曰共公庚與而下微不復見後四世而楚滅之

右莒三十世始茲與期十一世至茲丕公見春秋至郊公又十世

廬陵李氏曰春秋書莒子者五書莒大夫者四莒之始末下詳于經何邪莒近齊偏於齊最甚而相伐取地之事乃自莒始以蕞爾之莒怙其強暴首亂王法春秋託始於魯隱數簡之中累書莒人不殺莒之爲夷其昉於是乎終春秋之世國君鮮有不稱謚者莒獨不稱謚大夫鮮有不書名氏者莒獨不書名氏國君無書朝大夫無書聘者其君凡五見經而斃於亂者二大夫凡五見經而奔於亂者二誅於亂者一是其國無君臣上下之義無文物施報之禮其有不胥而爲夷者哉春秋之夷之宜也或曰莒僻陋在夷故春秋略之嗚呼春秋進荆人重吳子不輕于絕夷狄如此使莒居夷而用夏春秋容得而略之乎

越世章

史記有越世家然越在春秋之末始著而春秋夷之又亦僭王故系之邾莒諸國之末

越之先曰季扞夏后禹之苗裔而帝少康之庶子也

吳越春秋曰禹周行天下還歸大越登茅山以朝四方群臣封有功爵有德崩而葬焉至少康恐禹迹宗廟祭祀之絕乃封其少子於越號曰無余

越絕書曰無餘都會稽山南故越城是也

會稽記曰少康少子號曰於越越國之稱始此

史記世家曰帝少康之庶子封於會稽以奉守禹之祀文身斷髮披萊而邑焉後二十餘世至於允常

路史曰初禹之會稽山也復於衆曰食其實者不傷其枝吾獲覆釜書以除天下民有廬里其德溥矣死則予欲瘞焉於是誅不順而邑之安民治屈以爲之法及崩群臣葬之至於太康歲弗及祀

帝杼即位征東海至其地方皇不忍去

人名其處為杼山顏真卿記山有夏王村其北有夏

駕村吳興記曰稽留

爰封其弟扞以世祀處於埤中削髮文身以負俗曰無

余無余者杼也蓋十數傳而與民編及周之東有無士百姓奉而

竹書周成王二十四年於越來賓穆王三十七年大起九師東至于九江遂伐越至於紂

君之是為漚粵東粵

七年大起九師東至于九江遂伐越至於紂

羅氏曰越地記云周遷時有人生而言曰鳥禽呼嚙喋指天而向

禹墓曰我無今君之一未也將修前祀為民請命民喜而封之曰

無壬無壬生皞皞生夫譚譚之子為元常故越北界有禦兒鄉與

萬歲曆之說異按國語通典作禦而越人謂兵為兒蓋禦兵云

允常季扞二十餘世之孫

史記曰二十餘世至於允常允常之時與吳王闔閭戰而相怨伐

王義曰與允常二十餘世至於允常允常之時與吳王闔閭戰而相怨伐

侯夫譚子曰允常拓土始大稱王春秋貶為子號為於越杜註

云於語發聲也

按此則允常已稱王而史記云允常卒子勾踐立是為越王則勾踐始稱王也

春秋昭公五年

甲子冬楚子蔡侯徐人越人伐吳

左傳楚子以諸侯及東夷伐吳越大夫常壽過帥師會楚子于

瑣

陳氏曰初書越而常壽過得稱人越驟強也通吳以制楚者晉

謀之失也通越以制吳者楚謀之失也

黃氏曰越以伯禹之苗裔受會稽之別封其來已久入春秋百

九十餘年越始見經以吳楚之僭春秋夷之其極盛也猶得書

子越終於春秋之世常不過以國稱豈非僻陋之甚乎獨勾踐

與吳之事可以勵臣之節焉

廬陵李氏曰越惟此條稱人昭三十二年書吳伐越定五年書於越入吳十四年書於越敗吳於檣李哀元年吳夫差敗越於夫椒勾踐行成既歸國十年生聚十年教訓至黃池之役又書於越入吳至哀二十年而越滅吳矣

昭公三十二年辛卯夏吳伐越

左傳始用師於越也史墨曰不及四十年越其有吳乎越得歲而吳伐之必受其凶

定公五年丙申夏於越入吳

公羊傳於越者何越者何於越者未能以其名通也越者能以其名通也

范氏曰於越夷言也春秋即其所以自稱者書之見其不能慕中國故以本俗自通

陳氏曰向日越人今日於越復從其舊號也吳楚爭而後越入中國昭五年常壽過始見經而得一稱人後三十年而入吳不復稱人矣

汪氏曰汲冢周書王會篇有東越於越則於越或當時之所稱歟

廬陵李氏曰劉氏曰於越者其自稱者也越者中國稱之者也考之經文入吳敗吳皆越人來告故書於越吳伐越則吾來告也故書越劉說為合

王勾踐允常子在位三十年

春秋定公十四年

越王勾踐元年乙巳

夏五月於越敗吳于檣李

左傳吳伐越越子勾踐禦之陳于檣李患吳之整也使罪人三行屬劔於頸而辭曰二君有治臣奸旗鼓不敏於君之行不敢逃刑遂自剄也吳師屬之目越子因而伐之大敗之闔廬傷而卒

史記曰允常卒子勾踐立是爲越王元年吳王闔閭聞允常死乃興師伐越勾踐襲敗之

左傳哀公元年丁未春吳王夫差敗越於夫椒報檣李也遂入越越子以甲楯五千保於會稽使大夫種因吳太宰嚭以行成吳子將許之伍員諫弗聽退而告人曰越十年生聚而十年教訓二十年之外吳其爲沼乎三月越及吳平吳入越不書吳不告慶越不告敗也

哀公十四年己未夏於越入吳

左傳吳夫差會諸侯於黃池越王伐吳大敗吳師獲太子及遂入吳吳及越平

薛氏曰吳子忘不共戴天之恥而求諸侯於外此越之所以霸諸侯也

左傳哀公二十年乙丑冬十一月越圍吳

二十二年丁卯夏五月越人始來

杜氏曰越旣勝吳欲霸中國始遣使適魯

二十年戊辰冬十一月越滅吳

史記曰勾踐已平吳乃以兵北渡淮與齊晉諸侯會于徐州致貢於周周元王使人賜勾踐胙命爲伯勾踐已去渡淮南以淮上地

與楚歸吳所侵宋地於宋與魯泗東方百里當是時越兵橫行於江淮東諸侯畢賀號稱霸王

索隱曰越在蠻夷少康之後地遠國小春秋之初未通上國國史既微略無世系故紀年稱為於越子據此文平吳之後周元王使命為伯後遂僭而稱王也

卮言曰史記允常不言王至勾踐立是為越王平吳之後號稱霸王是以稱王在乎吳後也故索隱云然而左傳初書越子及已未入吳遂書越王是勾踐之王已在入吳之時不待平吳矣正義又云允常始稱王而史記亦云越王賜大夫種劍曰子為我從先王試之蓋勾踐既王而追稱允常為王耳

左傳哀公二十三年已秋八月叔青如越始便越也越諸鞅來聘

報叔青也二十四年庚午閏十二月公如越辛未六月公至越癸壬申五月衛使司徒期聘於越公攻而奪之幣期告越伯越伯命取之期以衆取之公怒殺期之甥為太子者遂卒於越癸酉春越子使后庸來聘且言邾田封於駘上盟於平陽八月哀公奔越而卒

左傳或謂越伯或謂越子

竹書元王四年已於越滅吳

胡氏曰竹書不紀吳事而越始見於滅吳自是後記越之世次特詳殆無一遺漏者雖魏其本國不如是之滅也因數記於後

竹書貞定王元年癸酉於越徙都琅琊

卮言曰吳越春秋文頗與竹書此文合然非齊之琅琊或吳越間地名有偶同者

四年丙子冬十一月於越子勾踐卒是爲莢執

王鹿郢

竹書貞定王十年壬午於越子鹿郢卒不壽立

金氏履祥曰按勾踐太子左氏作適郢紀年作鹿郢史記作鼫與當以左氏紀年爲正鉦與適語訛耳鼫與必其號猶勾踐之號莢執也莢執越語如西域二合之音卽華言德云

王不壽

竹書貞定王二十年壬辰於越子不壽見殺是爲育姑次朱勾立

王朱勾在位三十年

竹書威烈王十一年丙寅於越子滅滕十二年丁卯於越子朱勾滅邾

以邾子鸚歸十四年己巳於越子朱勾卒子翳立

卮言曰通鑑前編以越滅邾係威烈王八年而不載滅滕之事據滕文公在孟子之時距威烈之世六十餘年竹書妄也

王翳勾朱子在位十二年

淮南修務訓曰越王翳逃於石穴越人熏而出之不得已此觀之得在時不在爭

竹書威烈王二十三年戊寅於越遷於吳二十六年辛巳七月於越太

子諸咎弒其君翳十月越人殺諸咎越滑吳人立孚枝錯枝爲君

王莽安

竹書烈王元年丙午於越大夫寺區定越亂立初無余是爲莽安

顯王四年乙卯於越寺區第思弒其君莽安次無顯立

王無顯

竹書顯王十二年甲子於越子無疆卒是為莢蠲卯次無疆立

王無疆

竹書顯王三十四年丙戌於越子無疆伐楚二十六年戊子楚圍齊于

徐州遂伐於越殺無疆

胡氏曰竹書越世次最為詳明蓋自勾踐至無疆凡十世自滅

吳之後滅滕滅邾最後無疆伐楚而滅於楚威王自後臣服于

楚不復見竹書

史記曰王無疆時越與師北伐齊西伐楚與中國爭疆當楚威王

之時越北伐齊齊威王使人說越王曰越不伐楚大不王小不伯

於是越遂釋齊而伐楚楚威王興兵而伐之大敗越殺王無疆盡

取故吳地至浙江北破齊于徐州而越以此散諸侯子爭立或為

王或為君濱於江南海上服朝於楚

索隱曰楚破越在周顯王之六十四年按紀年粵子無疆薨後

十年楚伐徐州無楚敗越殺無疆之語是無疆為無疆之後紀

年不得錄也

胡氏曰索隱注謂紀年無殺無疆之文然竹書今本甚明當是

小司馬誤也

竹書赧王三年配西四月越王使公師隅來至魏獻舟二百箭五百

閩王搖

萬及犀角象齒

厄言曰竹書自顯王戊子書楚伐越殺無疆後二十一年至赧

王巳酉又書越王貢獻於魏據此文則無疆雖殺越服於楚國



未滅也而胡氏謂無疆服楚以後不見竹書蓋亦未細攷也  
史記曰越王無疆後七世至閩君搖佐諸侯平秦漢高帝復以搖  
爲越王以奉越後東越閩君皆其後

太史公曰禹之功大矣漸九川定九州至于今諸夏艾安及苗裔  
勾踐苦身焦思終滅疆吳北觀兵中國以尊周室號稱霸王勾踐  
可不謂賢哉蓋有禹之餘烈焉

學海君道部卷之二十五

進賢饒伸編

世系類

列國譜系 六

大國篇 六

卮言曰史記以春秋十四大國作為世家而繼之以三晉田齊劉知幾云三晉之與田氏自未為君而前齒列陪臣屈身藩后而前後一統俱屬世家使君臣相雜似於不可此言非也史於列國俱叙其先世而秦且列之本紀與殷周同不獨三晉田齊也自古有國者自殷周秦而下莫如是四國者之傳世久遠也蓋若天所命焉自曲沃奪宗武獻并國而趙夙與畢韓二萬皆有從戎之勳錫采啓土是晉之方疆已種弱晉之根矣自齊桓得國創霸當時而

陳完以羈旅受知列爵建家是齊之方疆已種奪齊之根矣厥後才賢間世而出如趙之衰武魏之隼絳韓之厥田之無字其謀國之忠立身之義炳炳史冊有可法而可傳者彼亦豈知其後世子孫之必昌乎疆爲善而已矣而後之人賴先德以要君藉世資以服衆不臣之迹亦以漸而著豈待分晉篡齊之日始見哉夫天旣生豪傑以立功名而又生姦雄以圖僭竊賢臣不得不世世臣不得不繼諸侯世失其馭大夫世執其柄欲國之不移得乎雖然晉有欒范荀知而卒并於三家齊有崔慶國高而卒并於田氏豈非天哉趙衰之下獲吉畢萬之後必大敬仲之世其昌自其初時而已知矣故詳錄於此篇著所以得國之由來非知以世之篡奪者比也

### 趙世章

趙之先曰造父與秦同祖

史記世家曰趙氏之先與秦共祖至中衍爲商大戊御其後蜚廉有子二人惡來之後爲秦季勝之後爲趙季勝生孟增孟增幸於周成王是爲宅臯狼

臯狼地名在河西成王居之於臯狼故云

孟增生衡父衡父生造

父造父幸於周繆王賜以趙城由此爲趙氏自造父已下六世至奄父曰公仲周宣王時伐戎爲御及于畝戰奄父脫宣王奄父生叔帶叔帶之時周幽王無道去周如晉事晉文侯始建趙氏於晉國自叔帶以下趙宗益興五世而生趙夙晉獻公時趙夙爲將伐耿滅之遂以耿封夙

趙夙造父十一世孫也事晉封於耿

左傳晉獻公作二軍公將上軍太子申生將下軍趙夙御戎畢萬  
爲右以滅耿滅霍滅魏還爲太子城曲沃賜趙夙耿以爲大夫  
趙成子名衰夙之子

國語曰趙衰先君之戎御趙夙之弟也

杜氏以夙爲衰從晉語也

史記趙夙生共孟當魯閔公之元年也共孟生趙衰

索隱曰世本云公明生共孟及趙夙夙生成季衰衰生宣孟盾

左傳云衰趙夙弟而史記云夙生共孟共孟生衰譙周以此爲  
誤

左傳晉獻公二十二年公子重耳之及於難也趙衰從之奔狄狄  
人伐齊咎如獲其二女叔隗季隗納諸公子公子取季隗以叔隗  
妻衰生盾惠公十四年甲申冬公子適秦秦伯享之子犯曰吾不

如衰之文也請使衰從公子賦河水公賦六月趙衰曰重耳拜賜  
公子降拜稽首公降一級而辭焉衰曰君稱所以佐天子者命重  
耳重耳敢不拜乙酉正月秦伯納公子入於晉是爲文公狄人歸  
季隗文公妻趙衰生原同括樓嬰趙姬請逆盾與其母子子餘辭  
姬曰得寵而忘舊何以使人必逆之固請許之來以盾爲才固請  
於公以爲嫡子而使其三子下之以叔隗爲內子而已下之文公  
元年丙戌秋晉侯圍原降之遷之冀命趙衰爲原大夫晉侯問原  
守於寺人勃鞞對曰昔趙衰以壺殮從徑餒而弗食故使處原  
史記趙衰字子餘卜事晉獻公及諸公子莫吉卜事公子重耳吉  
卽事重耳重耳以驪姬之亂亡奔翟趙衰從翟伐齊咎如得二女  
翟以其少女妻重耳長女妻趙衰而生盾初重耳在晉趙衰妻亦

生趙同趙括趙嬰齊趙衰從重耳出凡十九年得反國重耳爲  
晉文公趙衰爲原大夫居原任國政文公所以反國及霸多趙衰  
計策語在晉事中趙衰旣反晉晉之妻固要追翟妻而以其子盾  
爲適嗣妻三子皆下事之

索隱曰世本云成季徙原宋忠云今鴈門平原縣

正義曰括地志云原平故城漢原平縣也在代州崞縣南三十  
五里崞音郭按宋忠說非也括地志云故原城在懷州濟源縣  
西北二里左傳云襄王以原賜晉文公原不服文公伐原以示  
信原降以趙衰爲原大夫原本周畿內邑也

左傳文公三年戊子冬晉作二軍謀元帥趙衰曰郤穀可臣亟聞其  
言矣說禮樂而敦詩書君其試之乃使郤穀將中軍狐偃將上軍

命趙衰爲卿讓於欒枝先軫使欒枝將下軍先軫佐之

文公七年壬辰秋晉蒐於清原作五軍以禦狄趙衰爲卿

襄公二年乙未春秦孟明視帥師伐晉以報殺之役晉侯禦之先且  
居將中軍趙衰佐之及秦師戰於彭衙秦師敗績秦伯猶用孟明  
孟明增修國政重施於民趙成子言於諸大夫曰秦師又至將必  
辟之懼而增德不可當也詩曰無念爾祖聿修厥德孟明念之矣  
其可敵乎

襄公六年己亥冬趙成子卒史記趙衰卒  
謚爲成季

趙宣子名盾成子之子

左傳襄公七年庚子春晉蒐於夷舍二軍使狐射姑將中軍趙盾佐  
之陽處父至自溫改蒐於董易中軍陽子成季之屬也故黨於趙

氏且謂趙盾能曰使能國之利也是以上之宣子於是乎始爲國  
改制事典正法罪辟獄刑董逋逃由質要治舊滄本秩禮續常職  
出滯淹旣成以授太傅陽子與太師賈佗使行諸晉國以爲常法  
八月襄公卒靈公少晉人以難故欲立長君趙孟曰立公子雍好  
善而長先君愛之且近於秦秦舊好也使先蔑士會如秦逆公子  
雍賈季亦使召公子樂於陳趙孟使殺諸郟賈季怨陽子之易其  
班也而知其無援於晉也九月賈季使續鞫居殺陽處父十一月  
晉殺續簡伯賈季奔狄靈公元年辛丑春秦康公送公子雍於晉穆  
嬴日抱太子以啼於朝宣子與諸大夫皆患穆嬴且畏偪乃背先  
蔑而立靈公以禦秦師箕鄭居守趙盾將中軍先克佐之宣子曰  
我若受秦秦則賓也不受寇也旣不受矣而復緩師秦將生心先

人有奪人之心軍之善謀也逐寇如追逃軍之善政也訓卒利兵  
秣馬蓐食潛師夜起戊子敗秦師於令狐至於刳首己丑先蔑奔  
秦士會從之狄侵魯魯文公使告於晉趙宣子使因賈季問酈舒  
且讓之酈舒問於賈季曰趙衰趙盾孰賢對曰趙衰冬日之日也  
趙盾夏日之日也八月諸侯會趙盾盟於扈靈公立故也卻缺言  
於趙宣子曰日衛不睦故取其地今已睦矣可以歸之叛而不討  
何以示威服而不柔何以示懷非威非懷何以示德何德何以主  
盟子爲正卿以主諸侯而不務德將若之何夏書曰戒之用休董  
之用威勸之以九歌勿使壞九功之德皆可歌也若吾子之德莫  
可歌也其誰來之盍使睦者歌吾子乎宣子說之壬寅春晉歸臣  
戚之田於衛

春秋魯文公八年

晉靈公二年壬寅

冬十月壬午公子遂會晉趙盾盟於衡

雍

經書趙氏始此

左傳晉靈公十二年

壬子

冬秦伯伐晉取羈馬晉人禦之趙盾將

中軍荀林父佐之以從秦師於河曲秦師夜遁癸丑晉會諸侯

於棐林以伐鄭也楚薳賈救鄭遇於北林囚晉解揚晉人乃還

於是晉侯侈趙宣子為政驟諫而不入故不競於楚

春秋宣公二年

晉靈公四年癸丑

秋九月乙丑晉趙盾弑其君夷臯

左傳晉靈公不君宣子驟諫公患之使鉏麇賊之晨往寢門闕矣盛服將朝尚早坐而假寐麇退嘆而言曰不忘恭敬民之主也賊民之主不忠棄君之命不信有一於此不如死也觸槐而死九月晉侯飲趙盾酒伏甲將攻之其右提彌明知之趨登曰

臣侍君宴過三爵非禮也遂扶以下公噉夫燹焉明搏而殺之

盾曰棄人用犬雖猛何為鬪且出提彌明死之初宣子田於首

山舍於翳桑見靈輒餓問其病曰不食三日矣食之舍其半問

之曰宦三年矣未知母之存亡今近焉請以遺之使盡之而為

之簞食與肉寘諸橐以與之既而與為公介倒戟以禦公徒而

免之問何故對曰翳桑之餓人也問其名居不告而退遂自亡

也乙丑趙穿

趙衰側室之子

攻靈公於桃園宣子未出山而復太史書

曰趙盾弑其君以示於朝宣子曰不然對曰子為正卿亡不越

境反不討賊非子而誰宣子曰嗚呼我之懷矣自詒伊戚其我

之謂矣孔子曰董狐古之良史也書法不隱趙宣子古之良大

夫也為法受惡惜也越境乃免宣子使趙穿逆公子黑臀於周

而立之

穀梁傳穿弑也盾不弑而曰盾弑何也罪在盾也

詳臣道部 弑逆類

胡傳亾而越竟謂去國而不還也然後君臣之義絕反而討賊謂復讐而不釋也然後臣子之事終不然是盾偽出而實聞乎故也雖欲辭而不受可乎以高貴鄉公之事觀焉抽戈者成濟唱謀者賈克而當國者司馬昭也故陳泰曰惟斬賈克可以少謝天下昭問其次意在濟也泰欲進此直指昭也然則趙穿弑君而盾為首惡春秋之大義明矣微夫子垂法後世亂臣賊家氏曰晉襄託其孤於趙盾曰此子也才吾受子之賜不才吾惟子之怨其屬於盾者為何如盾乃與諸大夫謀外求君及逼畏不得已而後立靈則靈公之立非盾意也竊疑盾所以謀其

君者非一朝夕之故矣齊商宋鮑弑君篡國晉為盟主所當治也盾合諸侯將有討於齊宋已而受賂不惟不討又為之定篡竊之位無君之心久已萌矣堂上之甲方興桃園之攻隨至靈公固在趙氏置網之內欲無及得乎

朱子曰左氏見識甚卑云越竟乃免如此則專是回避占便宜者得計聖人作春秋而亂臣賊子懼豈反為之解免耶

臨川吳氏曰趙盾專晉國之政幾二十年境内境外知有盾而不知有公靈公既長不堪其專遂欲殺盾鉏麇受命不肯殺盾而死提彌明救盾而鬪死靈輒內叛倒戟免盾於死則盾之私屬與公徒敵無復有臣禮矣君臣既為仇敵非盾弑公則公殺盾勢固不兩立也穿盾之族子平日所愛信之人也弑公而盾



乃復穿之弑爲盾弑也盾爲首惡穿特承意行事者爾盾陽爲不知謀以求免弑君之罪將誰欺乎夫子書曰趙盾弑其君誅首惡也自三傳以來說者多方爲盾分釋則是亂賊不可以欺聖人而乃可以欺後儒也

左傳成公卽位宦卿之適子而爲之田以爲公族趙盾請以括爲公族曰君姬氏之愛子也微君姬氏則臣狄人也公許之冬趙盾爲旄車之族使屏季以其故族爲公族大夫

春秋宣公六年

晉成公四戊午

春晉趙盾衛孫免侵陳

劉氏曰公羊曰趙盾弑君何以復見弑君者趙穿也非也弑君復見者寧止盾乎

趙莊子名朔宣子之子

趙朔不見於經

左傳晉成公六年

庚申

秋七月晉克有蠱疾卻缺爲政廢晉克使趙

朔將下軍景公三年

甲子

夏六月晉師救鄭趙朔將下軍欒書佐之

趙括趙嬰齊爲中軍大夫荀首趙同爲下軍大夫及河聞鄭旣及楚平桓子欲還彘子曰不可以中軍佐濟鄭使如晉師請擊楚彘

子許之欒武子曰鄭不可從趙括趙同曰率師以來惟敵是求必

從彘子知季曰原屏咎之徒也

原趙同屏趙括徒黨也

趙莊子曰欒伯善哉

實其言必長晉國及戰於邲晉師敗績丁卯夏晉侯使趙同獻狄俘於周不敬劉康公曰不及十年原叔必有大咎天奪之鬼矣十三年

癸酉

冬晉作六軍趙括趙旃皆爲卿賞鞍之功也

卮言曰晉作六軍趙氏居二而朔不與則是時朔已死矣明年傳云趙嬰通於莊姬原屏放之而難作安得有屠岸賈殺朔之

事

左傳晉趙嬰通於趙莊姬乙亥春原屏放諸齊嬰曰我在故欒氏不作我亡吾二昆其憂哉且人各有能有不能舍我何害弗聽嬰夢天使謂已祭余余福女使問諸士貞伯貞伯曰不識也既而告其人曰神福仁而禍淫淫而無罰福也祭其得亡乎祭之之明日而亾

杜註曰趙嬰趙盾弟莊姬趙朔妻朔盾之子原同屏季嬰之兄

趙文子名武莊子之子

春秋成公八年晉景十夏晉殺其大夫趙同趙括

左傳趙莊姬為趙嬰之亾故譖之於晉侯曰原屏將為亂欒郤為徵六月晉討趙同趙括武從姬氏畜於公宮以其田與祁奚

韓厥言於晉侯曰成季之勳宣孟之忠而無後為善者其懼矣三代之令主皆數百年保天之祿夫豈無辟王賴前哲以免也周書曰不敢侮鰥寡所以明德也乃立武而反其田焉

正義曰史記趙世家云趙朔娶晉成公姊為夫人案傳趙衰嫡妻是文公之女若朔娶成公之姊則亦文公之女父之從女不可以為妻且文公之卒距此四十六年莊姬此時尚少不得為成公姊也買服先儒皆以為成公之女故杜從之史記又稱有屠岸賈者有寵於靈公此時為司寇追論趙盾弒君之事誅趙氏殺趙同趙括而滅其族案二年樂書將下軍則於時朔已死矣同括為莊姬所譖此年見殺趙朔不得與同括俱死也於時晉君明諸臣彊無容有屠岸賈輒廁其間得如此專恣又說云

公孫杵曰取他兒代武歿程嬰匿武於山中十五年因晉侯有疾韓厥乃請立武爲趙氏後與左傳皆違馬遷妄說不可從也史記家世曰趙盾卒謚爲宣孟子朔嗣晉景公之三年朔爲晉將下軍救鄭與楚莊王戰河上朔娶晉成公姊爲夫人大人屠岸賈欲誅趙氏初趙盾在時夢見叔帶持要而哭甚悲已而笑拊手且歌盾卜之兆絕而後好趙史援占之曰此夢甚惡非君之身乃君之子然亦君之咎至孫趙將世益衰屠岸賈者始有寵於靈公及至於景公而賈爲司寇將作難乃治靈公之賊以致趙盾徧告諸將曰盾雖不知猶爲賊首以臣弑君子孫在朝何以懲臯請誅之韓厥曰靈公遇賊趙盾在外吾先君以爲無罪故不誅今諸君將誅其後是非先君之意而今妄誅妄誅謂之亂臣有大事而君不

聞是無君也屠岸賈不聽韓厥告趙朔趣亡朔不肯曰子必不絕趙祀朔死不恨韓厥許諾彌疾不出賈不請而擅與諸將攻趙氏於下宮殺趙朔趙同趙括趙嬰齊皆滅其族趙朔妻成公姊有遺腹走公宮匿趙朔客曰公孫杵曰杵曰謂朔友人程嬰曰胡不歿程嬰曰朔之婦有遺腹若幸而男吾奉之卽女也吾徐歿耳居無何而朔婦免身生男屠岸賈聞之索於宮中夫人置兒絝中祝曰趙宗滅乎若號卽不滅若無聲及索兒竟無聲已脫程嬰謂公孫杵曰今一索不得後必且復索之柰何公孫杵曰立孤與歿孰難程嬰曰歿易立孤難耳公孫杵曰趙氏先君遇子厚子彊爲其難者吾爲其易者請先歿乃二人謀取他人嬰兒負之衣以文葆匿山中程嬰出謬謂諸將軍曰嬰不肖不能立趙孤誰能與

我千金吾告趙氏孤處諸將皆喜許之發師隨程嬰攻公孫杵臼杵臼謬曰小人哉程嬰昔下宮之難不能死與我謀匿趙氏孤兒今又賣我縱不能立而忍賣之乎抱兒呼曰天乎天乎趙氏孤兒何罪請活之獨殺杵臼可也諸將不許遂殺杵臼與孤兒諸將以爲趙氏孤兒良已死皆喜然趙氏真孤乃反在程嬰卒與俱匿山中居十五年晉景公疾卜之大業之後不遂者爲祟景公問韓厥厥知趙孤在乃曰大業之後在晉絕祀者其趙氏乎夫自中衍者皆嬴姓也中衍人面鳥喙降佐殷帝大戊及周天子皆有明德下及幽厲無道而叔帶去周適晉事先君文侯至於成公世有立功未嘗絕祀今吾君獨滅趙宗國人哀之故見龜策唯君圖之景公問趙尚有後子孫乎韓厥具以實告於是景公乃與韓厥謀立趙孤兒召而匿之宮中諸將入問疾景公因韓厥之衆以勸諸將而見趙孤趙孤名曰武諸將不得已乃曰昔下宮之難屠岸賈爲之矯以君命并命羣臣非然孰敢作難微君之疾羣臣固且請立趙後今君有命羣臣之願也於是召趙武程嬰徧拜諸將遂反與程嬰趙武攻屠岸賈滅其族復與趙武田邑如故及趙武冠爲成人程嬰乃辭諸大夫謂趙武曰昔下宮之難皆能死我非不能死我思立趙氏之後今趙武旣立爲成人復故位我將下報趙宣孟與公孫杵臼趙武啼泣頓首固請曰武願苦筋骨以報子至死而子恐去我死乎程嬰曰不可彼以我爲能成事故先我死今我不報是以我事爲不成遂自殺趙武服齊衰三年爲之祭邑春秋祠之

世世勿絕

邵氏寶曰名之弑賊則人得而討之晉之亂雖有爲興而其詞凜然亦可畏也春秋成而亂賊懼者以此夫君子嘗斷斯獄矣臣弑君凡在官者殺無赦未聞追族其子孫者董狐之畫國之斧鉞也當其時失賊不誅至於再世乃致之族謂之何哉

陳氏寔曰左傳不載程嬰與杵臼存趙事而史記言之頗詳左氏稱趙武從姬氏畜於公宮以其田與初奚韓厥言於晉侯乃立武而反其田是無程嬰杵臼之事蓋左氏爲文高簡且其所載以立武復田爲重故詳叙其後而不暇追叙其初然謂趙武從姬氏畜於公宮與武之生育嬰杵之保存一句可盡之矣史記則追叙本末故特詳焉一說固可會而一也

左傳晉厲公八年子戌春正月欒書中行偃弑厲公逆悼公於周而

立之悼公卽位使趙武爲卿丁酉春秦乞師於楚以伐晉楚子囊曰不可魏絳多功以趙武爲賢而爲之佐君明臣忠上讓下競晉不可敵也庚子冬晉侯蒐於緜上以治兵使韓起將上軍辭以趙武又使欒黶辭曰臣不如韓起韓起願上趙武君其聽之使趙武將上軍韓起佐

史記之趙氏復位十一年而晉厲公殺三郤欒書畏及乃遂弑厲公更立悼公晉由此大夫稍彊趙武續趙宗二十七年晉平公立左傳平公十年子丑范宣子卒八月趙文子爲政令薄諸侯之幣而重其禮穆叔見之謂穆叔曰自今以往兵其少弭矣齊崔慶新得政將求善於諸侯武也知楚令尹若敬行其禮道之以文辭以請諸侯兵可以弭齊人城郟之歲其夏齊烏餘以廩丘奔晉襲衛羊

角取之遂襲我高魚取之又取邑於宋於是范宣子卒諸侯不能治也及趙文子為政乃卒治之甲寅冬文子言於晉侯曰晉為盟主諸侯或相侵也則討而使歸其地今烏餘之邑皆討類也而貪之是無以為盟主也請歸之公曰諾孰可使也對曰胥梁帶能無用師晉侯使往乙卯春胥梁帶使諸喪邑者具車徒以受地必周使烏餘具車徒以受封烏餘以眾出使諸侯偽效烏餘之封者而遂執之盡獲之皆取其邑而歸諸侯諸侯是以睦於晉

杜氏曰傳言趙文子賢故平公雖失政而諸侯猶睦

春秋襄公二十七年

晉平十年二丙辰

夏叔孫豹會晉趙武楚屈建

及諸侯之大夫

于宋

左傳諸侯之大夫盟於宋晉楚爭先晉人曰晉固為諸侯盟主

未有先晉者也楚人曰子言晉楚匹也若晉常先是楚弱也且晉御主諸侯之盟也久矣豈專在晉叔向謂趙孟曰諸侯歸晉之德只非歸其尸盟也楚為晉細不亦可乎乃先楚人書先晉晉有信也宋公兼享晉楚之大夫趙孟為客子木與之言弗能對使叔向待言焉子木亦不能對也戊午夏吳公子札來聘適晉說趙文子韓宣子魏獻子曰晉國其萃於三族乎

又晉平公十五年

戊午

三月癸未晉悼夫人食與人之城杞者絳

縣人或年長矣無子而往與於食趙孟問其縣大夫則其屬也召之而謝過焉曰武不才任君之大事以晉國之多虞不能由吾子使吾子辱在泥塗久矣武之罪也敢謝不才遂仕之使助為政辭以老與之田使為君復陶以為絳縣師於是魯使者在

晉歸以語諸大夫季武子曰晉未可媿也有趙孟以爲大夫有伯瑕以爲佐其朝多君子其庸可媿乎

正義曰凡守邑之長公邑稱大夫私邑稱宰絳非趙武私邑而云則其屬者蓋凡公邑國卿分掌之而此邑屬趙武也

又十六年未春正月穆叔至自會見孟孝伯語之曰趙孟將死

矣其語偷不似民主且年未盈五十而諄諄焉如八九十者弗

能久矣若趙孟死爲政者其韓子乎吾子盍與季孫言之可以

樹善君子也晉君將失政矣若不樹焉使早備魯旣而政在大

夫韓子懦弱大夫多貪求欲無厭齊楚未足與也魯其懼哉

春秋昭公元年

晉平十七庚申

春正月叔孫豹會晉趙武

及諸侯於虢

左傳諸侯之大夫會於虢尋宋之盟也祁午謂趙文子曰宋之

盟楚人得志於晉今令尹之不信諸侯之所聞也子弗戒懼又

如宋楚重得志於晉晉之耻也子相晉國以爲盟主於今七年

矣再合諸侯三合大夫服齊狄寧東夏平秦亂城淳於師徒不

頓國家不罷民無謗譴諸侯無怨天無大災子之力也有令名

矣而終之以耻午也是懼吾子其不可以不戒文子曰武受賜

矣然宋之盟子未有禍人之心武有仁人之心是楚所以駕於

晉也今武有是心也楚又行僭非所害也我將信以爲本循而

行之且吾聞之能信不爲人下吾未能也楚不爲患令尹圍請

用牲續舊書加於牲上而已晉人許之三月甲辰盟夏天王使

劉定公勞趙孟於頰館於雒汭劉子曰美哉禹功明德遠矣子

盍亦遠績禹功而大庇民乎對曰老夫罪戾是懼焉能及遠吾

儕儉食朝不謀夕何其長也劉子歸以語王曰諺所謂老將至而耄及之者其趙孟之謂乎為晉正卿以主諸侯而儕於隸人朝不謀夕棄神人矣趙孟不復年矣

又十八年辛酉春秦景公之弟鍼出奔於晉見趙孟趙孟曰秦君

何如對曰無道趙孟曰亾乎對曰鍼聞之國無道而年穀和熟

天贊之也鮮不五稔趙孟視蔭曰朝夕不相及誰能待五后子

出而告人曰趙孟將死矣主民翫歲而渴日其與幾何九月晉

侯有疾求醫於秦秦伯使醫和視之曰疾不可為也是謂近女

室疾如蠱良臣將死天命不祐出告趙孟趙孟曰誰當良臣對

曰主是謂矣主相晉國於今八年晉國無亂諸侯無闕可謂良

矣和聞之國之大臣榮其寵任其大節有蓄禍興而無改焉必

受其咎今君至於淫以生疾將不能圖恤社稷禍孰大焉主不

能禦吾是以云也十二月晉既烝趙孟適南陽將會孟子餘甲

辰朔烝於溫庚戌卒杜註孟子餘趙衰也趙武之曾祖其廟在晉之南陽溫縣往會祭之

高氏曰趙武為政不在諸侯故諸侯少安然而晉日以衰政在

六卿

趙景子文子之子

左傳晉平公二十一年甲子楚薳啓彊曰晉韓起之下趙成丙寅

鄭子產適晉趙景子問焉註景子晉中軍佐趙成

史記文子生景叔景叔之時齊景公使晏嬰於晉晏嬰於晉叔向

語嬰曰齊之政將歸田氏叔向亦曰晉國之政將歸六卿六卿俟

矣而吾君不能恤也



趙簡子名鞅景子之子

春秋昭公二十五年

晉頃公九甲申

夏叔詣會晉趙鞅

及諸侯之大夫

於黃父

左傳會於黃父謀王室也趙簡子令諸侯之大夫輸王粟具戍人曰明年將納王子太叔見趙簡子簡子問揖讓周旋之禮焉對曰是儀也非禮也簡子曰敢問何謂禮對曰吉也聞諸先大夫子產云云簡子曰甚哉禮之大也鞅也請終身守此言也乙酉十月晉知躒趙鞅帥師納王入於成周使成公般戍周而還王子朝奔楚

春秋定公十三年

晉定十年五甲辰

秋晉趙鞅入於晉陽以叛冬晉趙鞅歸

於晉

左傳初趙鞅圍衛衛人懼貢五百家鞅置之邯鄲是秋鞅謂邯

鄲午曰歸我衛貢五百家吾舍諸晉陽午許諾歸告其父兄皆不可趙孟怒召午而囚諸晉陽殺之遂圍邯鄲午荀寅之甥寅范吉射之姻也而相與睦故不與圍邯鄲將作亂董安于聞之告趙孟曰先備諸趙孟曰晉國有命始禍者死爲後可也安于曰與其害於民寧我獨死請以我說趙孟不可秋七月范氏中行氏伐趙氏之宮趙鞅奔晉陽晉人圍之荀躒言於晉侯曰君命大臣始禍者死載書在河今三臣始禍而獨逐鞅刑已不均矣請皆逐之十一月荀躒韓不信魏曼多奉公以伐范氏中行氏弗克二子伐公國人助公二子敗從而伐之寅吉射奔朝歌韓魏以趙氏爲請十二月辛未趙鞅入於絳盟於公宮胡傳書歸易辭也三子之叛其罪一也鞅以有援故得復寅吉

射以無助故終叛春秋書鞅歸於晉非與之也以罪晉侯縱失有罪無政刑耳先儒或謂言歸者以地正國也鞅取晉陽之甲以逐君側之惡人則其說誤矣以地正國而可是人主可得而脅人臣擅興無罪以兵諫者真愛其君也使後世賊臣稱兵向闕以誅君側爲名而實欲脅君取國者則此說啓之也大失春秋之意矣

陳氏曰欒盈魚石猶書入至鞅而後書歸則晉無人之辭也叛臣至於書歸則佚賊不足歸矣此韓趙魏分晉之本也

高氏曰三子旣出晉侯自謂趙鞅保其邑以違荀范之難實非叛故許之歸先儒以歸爲善辭遂謂鞅有叛迹而無叛心春秋先正其罪以勵臣節此許其國以廣君恩是不然脫使鞅初入

晉陽本拒荀范而非有叛君之心然人臣無君命輒據土興兵此豈可赦乎况衛孫林夫亦書歸何善之有

左傳晉定公十六年乙卯春梁嬰父惡董安于謂知文子曰不殺安于使終爲政於趙氏趙氏必得晉國蓋以其先發難也討於趙氏文子使告於趙孟曰范中行氏雖信爲亂安于則發之是安于與謀亂也晉國有命始禍者死二子旣伏其罪矣敢以告趙孟患之安于曰我死而晉國寧趙氏定將焉用生乃縊而死趙孟尸諸市而告於知氏曰主命戮罪人安于旣伏其罪矣敢以告知伯從趙孟盟而後趙氏定祀安于於廟

卮言曰董安于誠趙氏之忠臣也趙氏之興前有程嬰公孫杵臼後有安于世得人矣然安于之事傳則詳之而嬰杵臼之事

略不見於傳此先儒所以譏史記之妄也曩令其事而實則趙氏之祀嬰杵曰必不在安于之後矣安得不載

春秋哀公二年

晉定十年

九戊申

夏晉趙鞅帥師納衛世子蒯聵于戚秋八

月甲戌晉趙鞅帥師及鄭罕達帥師戰於鐵鄭師敗績

左傳六月乙酉晉趙鞅納衛太子於戚八月齊人輸范氏粟鄭子姚子般送之士吉射逆之趙鞅禦之遇於戚陽虎曰吾車少以兵車之旆與罕駟兵車先陳罕駟自後隨而從之彼見吾貌必有懼心於是乎會之必大敗之從之簡子誓曰范氏中行氏反易天明斬艾百姓欲擅晉國而滅其君寡君恃鄭而保焉今鄭爲不道棄君助臣三三子順天明從君命經德義除詬耻在此行也克敵者上大夫受縣下大夫受郡士田十萬庶人工商

遂人臣隸圉免志父無罪君實圖之賞若其有罪絞縊以戮

執所

改名

桐棺三寸不設屬辟素車樸馬無入於兆下卿之罰也申

戍將戰郵無恤

良王

御簡子衛太子爲右登鐵上望見鄭師衆太

子懼自投於車下子良授太子綬而乘之曰婦人也簡子迎列曰畢萬匹夫也七戰皆獲有馬百乘歿於牖下羣子勉之死不

在寇鄭人擊簡子中肩斃於車中太子救之以戈鄭師北獲溫

大夫趙羅太子復伐之鄭師大敗獲齊粟于車趙孟喜曰可矣

傳僂曰雖克鄭猶有知在憂未艾也

杜註曰趙簡子爲衆設賞自設罰所以能克敵衛太子前怯後勇故簡子喜之傳僂亦簡子屬也言知氏將爲難後竟有晉陽之患

初周人與范氏田公孫龍稅焉趙氏得而獻之吏請殺之趙孟曰其為主也何罪止而與之田及鐵之戰以徒五百人宵攻鄭師取鏝旗於子姚之幕下獻曰請報主德追鄭師姚般公孫林殿而射前列多歿趙孟曰國無小既戰簡子曰吾伏弋嘔血鼓音不衰今日我上也太子曰吾救主於車退敵於下我右之上也郵良曰我兩鞞將絕吾能止之我御之上也駕而乘材兩鞞皆絕

扈言曰趙盾之有鉏麇也趙鞅之有公孫龍也皆若天所以資趙氏也要之權臣之世為政者亦無不以得人心為本翳桑之餓人稅田之公孫豈其望報而卒賴其力以免難克敵德施廣矣傳云樹德而濟欲焉豈獨五伯哉

左傳晉定公二十年配冬十月趙鞅圍朝歌師於其南荀寅伐其

郭使其徒自北門入已犯師而出癸丑奔邯鄲十一月趙鞅殺士臯夷惡范氏也庚戌九月趙鞅圍邯鄲十一月邯鄲降荀寅奔鮮虞趙穆奔臨齊弦施逆之遂墮臨國會鮮虞納荀寅於栢人辛亥春晉圍栢人荀寅士吉射奔齊壬子春趙鞅伐鮮虞治范氏之黨也

春秋哀公十年晉定公二十七年丙辰夏趙鞅帥師侵齊

左傳晉趙鞅帥師伐齊大夫請卜之趙孟曰吾卜於此起兵事不再令卜不襲吉行也於是乎取犁及轅毀高唐之郭侵及賴而還

哀公十四年晉定三十一年巳未秋晉趙鞅帥師伐衛

左傳晉定公三十四年癸亥三月晉趙鞅使告於衛曰君之在晉

也志父爲主請君若太子來以免志父不然寡君其曰志父之爲也衛侯辭以難太子又使栾之六月趙鞅圍衛齊國觀陳瓘救衛得晉人之致師者子玉使服而見之曰國子實執齊柄而命瓘曰無辟晉師豈敢廢命子又何辱簡子曰我卜伐衛未卜與齊戰乃還十月晉復伐衛入其郛將入城簡子曰止叔向有言曰怙亂滅國者無後衛人出莊公而與晉平晉立襄公之孫般師而還

史記世家曰趙簡子疾五日不知人大夫皆懼醫扁鵲視之出董安于問扁鵲曰血脉治也而何怪在昔秦穆公嘗如此七日而寤寤之日告公孫支與子輿曰我之帝所甚樂吾所以久者適有學也帝告我晉國將大亂五世不安其後將霸未老而死霸者之子

且令而國男女無別公孫支書而藏之秦讖於是出矣獻公之亂文公之霸而襄公敗秦師於殽而歸縱淫此子之所聞今主君之疾與之同不出三日疾必間間必有言也居二日半簡子寤語大夫曰我之帝所甚樂與百神游於鈞天廣樂九奏萬舞不類三代之樂其聲動人心有一熊欲來援我帝命我射之中熊熊死又有一羆來我又射之中羆羆死帝甚喜賜我二笥皆有副吾見兒在帝側帝屬我一翟犬曰及而子之壯也以賜之帝告我晉國且世衰七世而亾羸姓將大敗周人於范魁之西而亦不能有也今余思虞舜之勳適余將以其胄女孟姚配而七世之孫董安于受言而書藏之以扁鵲言告簡子簡子賜扁鵲田四萬畝他日簡子出有人當道辟之不去從者怒將刃之當道者曰吾欲有謁於主君

從者以聞簡子召之曰嘻吾有所見子晰也當道者曰屏左右願有謁簡子屏人當道者曰主君之疾臣在帝側簡子曰然有之子之見我我何爲當道者曰帝令主君射熊與羆皆死簡子曰是且何也當道者曰晉國且有大難主君首之帝令主君滅二卿夫熊與羆皆其祖也簡子曰帝賜我一筭皆有副何也當道者曰主君之子將克二國於翟皆子姓也簡子曰吾見兒在帝側帝屬我一翟犬曰及而子之長以賜之夫兒何謂以賜翟犬當道者曰兒主君之子也翟犬者代之先也主君之子必且有代及主君之後嗣且有革政而胡服并二國於翟簡子問其姓而延之以官當道者曰臣野人致帝命耳遂不見簡子書藏之府異日姑布子卿見簡子簡子徧召諸子相之子卿曰無爲將軍者簡子曰趙氏其滅乎

子卿曰吾嘗見一子於路殆君之子也簡子召子母卹母卹至則子卿起曰此真將軍矣簡子曰此其母賤翟婢也奚道貴哉子卿曰天所授雖賤必貴自是之後簡子盡召諸子與語母卹最賢簡子乃告諸子曰吾藏寶符於常山上先得者賞諸子馳之常山上求無所得母卹還曰已得符矣簡子曰奏之母卹曰從常山上臨代代可取也簡子於是知母卹果賢乃廢太子伯魯而以母卹爲太子後簡子拔邯鄲中行文子奔栢人簡子又圍栢人中行文子范昭子遂奔齊趙竟有邯鄲栢人范中行餘邑入於晉趙名晉卿實專晉權奉邑侔於諸侯晉定公三十年定公與吳王夫差爭長於黃池趙簡子從晉定公卒長吳定公三十七年卒而簡子除三年之喪期而已是歲越王勾踐滅吳晉出公十一年知伯伐鄭趙

簡子疾使太子毋卹將而圍鄭知伯醉以酒灌擊毋卹毋卹羣臣請歿之母卹曰君所以置毋卹爲能忍詢然亦愠知伯知伯歸因謂簡子使廢毋卹簡子不聽毋卹由此怨知伯晉出公十七年簡子卒

史記又曰趙簡子有臣曰周舍好直諫周舍死簡子每聽朝常不悅大夫請梟簡子曰大夫無罪吾聞干羊之皮不如一狐之腋諸大夫朝惟聞唯唯不聞周舍之鄂鄂是以憂也簡子由此能附趙邑而懷晉人

通鑑曰趙簡子使尹鐸守晉陽請曰以爲繭絲乎抑爲保障乎趙簡子曰伊陟哉尹鐸損其戶數簡子疾謂無恤曰晉國有難而無以尹鐸爲少無以晉陽爲遠女必歸之

卮言曰賢士之有益於人之國家也豈不重哉趙氏之興由鞅而鞅之明以能容周舍之直用尹鐸之才也

又曰晉自趙鞅爲政意在自殖不在諸侯故晉霸益衰而趙氏益盛頻年伐衛侵齊皆以范中行之故范中行滅而權歸四卿及知氏滅而權歸三家矣三家者趙氏其尤也左傳襄子服簡子喪在晉定公三十七年越二年越滅吳而史記云出公十七年簡子卒又云襄子元年越圍吳年代不合

趙襄子名無恤簡子之子

左傳晉出公元年丁冬十一月越圍吳趙孟降於喪食楚隆曰三年之喪親暱之極也主又降之無乃有故乎趙孟曰黃池之役先王與吳王有質曰好惡同之今越圍吳嗣子不廢舊業而敵之非

晉之所及也吾是以爲降楚隆曰若使吳王知之若何趙孟曰可乎隆口請嘗之乃徃先造於越軍曰吳犯間上國多矣聞君親討焉諸夏之上莫不欣喜唯恐君之志不從請入視之許之告於吳王曰寡君之老無恤使陪臣隆敢展謝其不共黃池之役君之先臣志父得承齊盟曰好惡同之今君在難無恤不敢憚勞非晉國之所及也使陪臣敢展布之王拜稽首曰寡人不佞不能事越以爲大夫憂拜命之辱與之一簞珠使問趙孟曰句踐將生憂寡人寡人歿之不得矣王曰溺人必笑吾將有問也此條襄子結吳呂氏春秋曰趙簡子歿召太子而告之曰我歿已葬服衰而上夏屋之山以望太子敬諾簡子死已葬衰服襄子上於夏屋以望代俗其樂甚美於是襄子曰先君必以此教之也乃以其女弟妻代

君襄子遂謁而請觸之先令舞者置兵其羽中數百人先具大金斗代君至酒酣及斗而擊之盡殺其從者因迎其妻其妻聞之遂磨笄以自刺

史記世家曰襄子姊前爲代王夫人簡子旣葬未除服北登夏屋請代王使厨人操銅料以食代王及從者行斟陰令宰人各以料擊殺代王及從官遂興兵平代地遂以代封伯魯子周爲代成君伯魯者襄子兄故太子太子蚤歿故封其子

呂氏曰襄子聞新稚狗之勝而能戒念伯魯之廢而傳國於其子可謂有君子之資矣至於夏屋之役行如虎狼獨何歟蓋生於兼并無親之國而承簡子貪暴之規模遂以爲臨大利決大計非用仁義之所也悠悠千載同陷一見豈不哀哉



金氏曰夫結吳固簡子之盟而考之世家則取代亦簡子之志也簡子託之夢帝以賜代託之寶符而示無恤以取代爲是立無恤也無恤居喪念簡子之志爲吳之圍而降食爲代之利而詐擊之可謂能成父之志矣然救吳善也而以力不及辭之滅代惡也則盡心力而爲焉成其惡而不成其善是安得爲繼志之孝乎

以上四條取代

左傳晉出公十一年丁丑晉荀瑶帥師圍鄭鄭駟弘先保南里以待之將門知伯謂趙孟入之對曰主在此知伯曰惡而無勇何以爲子對曰以能忍耻庶無害趙宗乎知伯不悛趙襄子由是甚知伯遂喪之知伯貪而愎故韓魏反而喪之

說苑曰趙簡子以襄爲後董安子問之簡子曰是其入能爲社稷忍辱異日知伯與襄子飲而灌襄子之首大夫請殺之襄子曰先君之立我也曰能爲社稷忍辱豈曰能刺人哉處十月襄子擊敗知伯漆其首以爲飲器

卮言曰史記云襄子愠知伯知伯因謂簡子使廢毋恤而左傳說苑皆以忍辱爲襄子嗣位後事史記之誤

史記世家曰襄子立四年知伯與趙韓魏盡分其范中行故地晉出公怒告齊魯欲以伐四卿四卿恐遂共攻出公出公奔齊道死知伯乃立懿公知伯益驕

通鑑晉懿公二年丙戌知伯請地於韓康子康子與之又求地於魏桓子桓子亦與之又求蔡皐狼之地於趙襄子襄子弗與知伯怒帥韓魏之甲以攻之襄子將出曰吾何忝乎從者曰長子近且

城厚完襄子曰民罷力以完之又斃死以守之其誰與我從者曰邯鄲之倉庫實襄子曰浚民之膏澤以實之又因而殺之其誰與我其晉陽乎先主之所屬也尹鐸之所寬也民必和矣乃走晉陽三家圍晉陽而灌之城不浸者三板沈竈產龜民無叛意戊子歲春知伯行水魏桓子御韓康子駿乘知伯曰吾乃今知水可以亾人國也桓子肘康子康子履桓子之跗以汾水可以灌安邑絳水可以灌平陽也趙襄子使張孟談潛出見二子曰臣聞脣亾則齒寒趙亾則韓魏爲之次矣二子乃陰與約爲之期日而遣之襄子夜使人殺守隄之吏而決水灌知伯軍知伯軍亂韓魏翼而擊之襄子將卒犯其前大敗其衆遂殺知伯滅其族而分其地

史記知伯率韓魏攻趙趙襄子懼乃奔保晉陽原過從後至於王

澤見三人自帶以上可見自帶以下不可見與原過竹二節莫通曰爲我以是遺趙無恤原過旣至以告襄子襄子齋三日親自剖竹有朱書曰趙毋卹余霍泰山山陽侯天使也三月丙戌余將使女反滅知氏女亦立我百邑余將賜女林胡之地至於後世且有伉王亦黑龍面而鳥喙鬚麋髭頰大膺大胸脩下而馮左衽界乘奄有河宗至於休溷諸貉南伐晉別北滅黑姑襄子再拜受三神之令三國攻晉陽歲餘引汾水灌其城城不浸者三板城中懸釜而炊易子而食羣臣皆有外心禮益慢唯高共不敢失禮襄子懼乃夜使相張孟同私於韓魏韓魏與合謀以三月丙戌三國反滅知氏共分其地於是襄子行賞高共爲上張孟同曰晉陽之難唯共無功襄子曰方晉陽急羣臣皆懈惟共不敢失人臣禮是以先

之於是趙北有代南并知氏彊於韓魏遂祠三神於百邑使原過  
王霍泰山祠祀

大事記曰張孟談既固趙宗告襄子曰五霸之所以致天下者主  
勢能制臣無令臣能制主故貴爲列侯者不令在相位自將軍以  
上不爲近大夫今臣之名顯而身尊權重而衆服臣願捐功名去  
權勢以離衆襄子悵然曰何哉吾聞輔主者名顯功大者身尊任  
國者權重此先聖之所以集國家安社稷乎子何爲然對曰臣觀  
成事聞往古臣主之權均能美未之有也君若弗圖則臣力不足  
愴然有決色乃納地釋事而耕於負親之丘

以上七條  
滅知伯

外紀曰按國語列子趙襄子使新稚穆子伐狄勝之取左人中人  
遽人來告襄子方食而有憂色侍者曰狗之事大矣而主之色不

怡何也襄子曰夫江河之大也不過三日飄風暴雨不終朝日中  
不須臾今趙氏之德行無所積一朝而兩城下亾其及我哉君子  
曰趙氏其昌乎夫憂者所以爲昌也喜者所以爲亾也勝非其難  
者也持之者其難者也惟有道之主爲能持勝

此條  
勝狄

史記晉世家曰幽公三年甲辰韓虎趙無恤魏駒三家強盛晉君  
微弱反朝於韓趙魏三家晉君獨有絳曲沃餘皆屬三晉

此條  
弱晉

史記趙世家曰襄子娶空同氏生五子襄子爲伯魯之不立也不  
肯立子且必欲傳位於伯魯子代成君成君先歿乃取代成君子  
浣爲太子襄子卒浣立是爲獻子

南氏軒曰按趙襄子初以受戒能習獲嗣父後其賢可知矣尋生  
五子乃爲伯魯之不立也不立其子而立伯魯之孫浣爲太子其

殆聞吳季子之風而興者乎其賢又何如也第當簡子置後時未聞一讓其視季子不能無歉耳厥後襄子之弟嘉遂浣自立於代無何國人殺其子迎浣復位則天理人心報應不爽矣嗟乎當斯時也人心率爲勢利所昏甚至兄弟爭國同氣相殘者衆矣而襄子獨能傳位於兄之孫謂其賢並季子也亦宜

卮言曰大學釋齊家治國而本之以仁讓曰其爲父子兄弟足法而後民法之也趙氏之興則信有仁讓之美焉方成季之妻趙姬讓季隗而下之又使其三子下於盾及盾之爲政也又讓嫡子爲公族大夫簡子以襄子爲賢舍伯魯而立之襄子嗣位卽滅代以封伯魯之子旣并知氏專晉國矣而卒舍其諸子立伯魯之孫雖與季子不可同日道也而賢於當時之爭奪者遠矣由是觀之趙

氏於君臣之間則逆也而父子兄弟夫婦之間則順也世修仁讓

不尤賢乎盾之弑執之叛著於春秋旣已身受惡名矣而世美之

懿未顯宜其後之昌歟

以上三條傳位兄子

趙獻侯名浣簡子兄伯魯之孫

史記獻侯少卽位治中牟襄子弟桓子逐獻侯自立於代一年卒國人曰桓子立非襄子意乃共殺其子而復迎立獻侯

索隱曰世本云代成君起卽襄子之子桓子亦襄子之子與此不同地理志曰河南中牟縣趙獻侯自耿徙此讚曰中牟在春秋之時是鄭之疆內也及三卿分晉則在魏之邦土也趙界自漳水以北不及此此中牟不在趙之東當在潞水之北

正義曰按五鹿在魏州元城縣東二十里鄴卽相州湯陰縣西

五十八里有牟山蓋中牟邑在此山側也

竹書晉烈公元年壬戌趙獻子城泚氏八年趙城平邑八年

史記趙獻侯十三年城平邑十五年卒烈侯立為諸侯追尊獻子為獻侯

通鑑前編周威烈王七年壬戌趙浣城泚氏乙丑晉趙氏城平邑

丙寅齊田居思伐晉趙氏鄙圍平邑辛未王命晉韓啟章趙浣伐

齊入長城齊田汾敗晉趙氏於平邑獲其將韓舉取平邑

大事記曰按外紀王命趙韓伐齊入長城是時晉三家自通王

室亦如列國特未賜命耳

地理志曰泚氏今澤州高平縣平邑今代郡平邑縣

言曰趙氏自成子衰至獻子浣凡八世而烈侯為諸侯

趙烈侯名籍獻侯之子立六年周威烈王之二十三年戊寅歲也初

命為諸侯辛巳卒凡三年共九年

武侯史失其名烈侯弟在位十三年元壬午

史記烈侯九年卒弟武公立武公十三年卒趙復立烈侯太子章

是為敬侯

索隱曰譙周云系本及說趙語者並無其事蓋別有所據

敬侯章烈侯太子甲午立乙巳與韓魏共廢晉靖公為家人而分其

地丙午卒凡十二年元乙未

成侯種敬侯子在位二十五年元丁未

竹書顯王六年戊午魏師伐邯鄲十二年己巳邯鄲成侯會燕成侯於

安邑自此至末皆書邯鄲

蕭侯世本云名語成侯太子在位二十四年元壬申

武靈王索隱曰名雍蕭侯子乙未立戊戌稱王二十七年壬戌傳國立王

子何為王而自號為主父後四年丙寅游沙丘公子章作亂公子成

李兌等殺之遂圍主父三月餘而餓歿元丙申

惠文王何武靈王子在位三十三年元癸亥

孝成王丹惠文王子在位二十一年元丙申

悼襄王偃孝成王子在位九年元丁巳

幽繆王遷悼襄王子在位七年秦攻趙虜王遷元丙寅終癸酉

太史公曰吾聞馮王孫曰趙王遷其母倡也嬖於悼襄王悼襄王

廢嫡子嘉而立遷遷素無行信讒故誅其良將李牧用郭開豈不

謬哉秦既虜遷趙之亾大夫共立嘉為王王代六歲秦進兵破嘉

遂滅趙以為郡

索隱述贊曰趙氏之世與秦同祖周穆平徐乃封造父帶始事

晉夙初有土岸賈矯誅韓厥立武寶符臨代卒居伯魯簡夢翟

犬靈歌處女胡服雖彊建立非所頗牧不用王遷因虜

右趙始烈侯終幽繆王凡九世五侯五王共一百七十九年侯八十一

王九十九



國家圖書館, NATIONAL CENTRAL LIBRARY, TAIWAN, R.O.C.

外國詩系

卷六

三

學海君道部卷之二十六

世系類

列國譜系七

大國篇七

魏世章

魏之先畢公高之後曰畢萬事晉獻公封於魏

史記畢公高封於畢其後絕封為庶人或在中國或在夷狄其苗

裔曰畢萬事晉獻公

左傳晉獻公作二軍趙夙御戎畢萬為右以伐霍耿魏滅之賜畢

萬魏以為大夫卜偃曰畢萬之後必大萬盈數也魏大名也以是

始賞天啟之矣天子曰兆民諸侯曰萬民今名之大以從盈數其





必有衆

初畢萬筮仕於晉遇屯之比辛廖占之曰吉屯固比入吉孰大焉其必蕃昌震爲土車從馬足居之兄長之母覆之衆歸之六體不易合而能固安而能殺公侯之卦也公侯之子孫必復其始

林氏曰震下坎上屯坤下坎上比蓋屯初九變而爲比也辛廖言屯險難故堅固比親密故得入固而得入其吉最大後嗣子孫其必蕃昌震木變爲坤土震爲車坤爲馬故車從馬震爲足動而遇坤安靜之象故居之震爲長男兄也初又最長故長之坤爲母二三四互體亦爲坤故母覆之坤爲衆故衆歸之初一爻變有此六義不可易也此有合之義屯有固之義比之下體爲坤坤爲土有安之義屯之下體爲震震爲雷有殺之義有此四者惟公侯足以當之畢萬公高子孫宜復爲公侯也

史記畢萬封十一年晉獻公卒四子爭更立晉亂而畢萬之世彌大從其國名爲魏氏生武子

魏武子名犇一云孫畢萬之子

史記索隱曰左傳武子名犇世本云畢萬生芒季芒季生武仲州州與犇聲相近字因以異代亦不司

左傳晉獻公時公子重耳之及於難也魏武子從之奔翟重耳反國是爲文公元年丙戌作三軍荀林父御戎魏犇爲右四年己丑春晉侯入曹令無入僖負羈之宮而免其族報施也魏犇顛頡怒曰勞之不圖報於河有藝僖羈氏魏犇傷於胷公欲殺之而愛其材使問且視之病將殺之魏犇束芻見使者曰以君之靈不有寧

也距躍三百曲躍三百乃赦之殺顛頡以徇于師立舟之僑以爲戎右

史記武子從文公出亡及國而令武子襲魏氏之後封列爲大夫治於魏

魏壽餘附

左傳晉靈公七年丁未春晉人患秦之用士會也謀復之乃使魏壽餘僞以魏叛者以誘士會執其帑於晉使夜逸請自歸於秦秦伯許之履士會之足於朝秦伯師於河西魏人在東壽餘曰請東人之能與夫二三有司言者吾與之先與士會士會曰晉人虎狼也若背其言臣死妻子爲戮秦伯曰若背其言所不歸爾帑者有如河旣濟魏人譟而還秦人歸其帑

正義曰魏犇者畢萬之孫爲魏之世適壽餘爲魏邑之主當是犇之近親

魏悼子

史記魏武子生悼子悼子徙治霍

索隱曰系本云武仲生莊子絳無悼子又系本居篇曰魏武子居魏悼子徙霍宋忠曰霍地名今河東彘縣也則是有悼子系本卿大夫代自脫耳

正義曰晉州霍邑縣漢彘縣也後漢改曰永安隋改曰霍邑本

春秋時霍伯國

魏莊子

史記作昭子今從左傳名絳

左傳晉悼公三年辛卯秋晉侯之弟揚干亂行於曲梁魏絳戮其怨

晉侯怒謂羊舌赤曰合諸侯以爲榮也楊干爲戮何辱如之必殺魏絳無失也對曰絳無貳志事君不辟難有罪不逃刑其將來辭何辱命焉言終魏絳至授僕人書將仗劍士魴張老止之公讓其書曰日君乏使使臣斯司馬臣聞師衆以順爲武軍事有死無犯爲敵君合諸侯臣敢不敬君師不武執事不敬罪莫大焉臣懼其死以及楊干無所逃罪不能致訓至於用鉞臣之罪重敢有不從以怒君心請歸死於司寇公跣而出曰寡人之言親愛也吾子之討軍禮也子無重寡人之過敢以爲請晉侯以魏絳爲能以刑佐民矣友役與之禮食使佐新軍四年壬辰冬無終子嘉父使孟樂如晉因魏莊子納虎豹之皮以請和諸戎晉侯曰戎狄無親而貪不如伐之魏絳曰諸侯新服陳新來和將觀於我我德則睦否則攜

貳勞師於戎而楚伐陳必弗能救是棄陳也諸華必叛戎禽獸也獲戎失華無乃不可乎公曰然則莫如和戎乎對曰和戎有五利焉戎狄荐居貴貨易土土可賈焉一也邊鄙不徯民狎其野稽人成功二也戎狄事晉四鄰震動諸侯威懷三也以德緩戎師徒不勤甲兵不頓四也監于后羿而用德度遠至邇安五也君其圖之公說使魏絳盟諸戎修民事田以時

又九年丁酉冬晉侯會諸侯伐鄭同盟于戲而楚子伐鄭鄭及楚平晉侯歸謀所以息民魏絳請施舍輸積聚以待自公以下苟有積者盡出之國無滯積亦無困入公無禁利亦無貪民所以幣更賔以特牲器用不作車服從給行之期年國乃有節三駕而楚不能與爭

又十一年<sup>巳</sup>冬晉侯會諸侯于蕭魚以伐鄭鄭人賂晉侯以師慳師觸師蠲廣車軌車淳十五乘甲兵備凡兵車百乘歌鍾二肆及其罇磬女樂二八晉侯以樂之半賜魏絳曰子教寡人和諸戎狄以正諸華八年之中九合諸侯如樂之和無所不諧請與子樂之辭曰夫和戎秋國之福也八年之中九合諸侯諸侯無匿君之靈也二三子之勞也臣何力之有焉抑臣願君安其樂而思其終也書曰居安思危思則有備有備無患敢以此規公曰子之教敢不承命抑微子寡人無以待戎不能濟河夫賞國之典也藏在盟府不可廢也子其受之魏絳於是乎始有金石之樂禮也

又十三年<sup>辛丑</sup>冬晉侯蒐于緜上以治兵使欒黶將下軍魏絳佐之壬寅二月諸侯之大夫從晉伐秦以報櫟之役至于棫林荀偃令曰鷄鳴而駕惟余馬首瞻欒黶曰晉國之命未之有也余馬首欲東乃歸下軍從之左史謂魏莊子曰不待中行伯乎莊子曰夫子命從帥欒伯吾帥也吾將從之從帥所以從夫子也

史記魏絳徙治安邑卒謚爲昭子

索隱曰世本云莊子錯也居篇又曰昭子徙安邑與此文同安邑在絳州夏縣安邑故城是

魏獻子名舒莊子之子

史記魏昭子生魏羸魏羸生魏獻子

索隱曰世本云獻子名茶茶莊子之子無魏羸也

左傳晉平公八年<sup>辛亥</sup>夏欒黶帥曲沃之甲因魏獻子以晝入絳初欒黶從魏莊子於下軍獻子私焉故因之

又十七年庚申六月晉敗無終及羣狄於太原將戰魏舒曰彼徒我車所遇又阨以什共車必克困諸阨又克請皆卒自我始乃毀車以爲行五乘爲三伍荀吳之嬖人不肯卽卒斬以狗爲五陳以相離兩於前伍於後專爲右角參爲左角偏爲前拒以誘之翟人笑之未陳而薄之大敗之

又頃公十三年丁亥秋韓宣子卒魏獻子爲政分祁氏之田以爲七縣分羊舌氏之田以爲三縣舉十人爲其縣大夫謂賈辛司馬烏爲有力於王室故舉之謂知徐吾趙朝韓固魏戊餘子之不失職能守業者也其四人者皆受祿而後見於魏子以賢舉也魏子謂成鱣吾與戊也縣人其以我爲黨乎對曰戊之爲人也遠不小君近不偏同居利思義在約思純雖與之縣不亦可乎賈辛將適其

縣見於魏子魏子曰女有力於王室吾是以舉汝行乎敬之哉毋墮乃力仲尼聞魏子之舉也以爲義曰近不失親遠不失舉可謂義矣又聞其命賈辛也以爲忠詩曰永言配命自求多福忠也魏子之舉也義其命也忠其長有後於晉國乎

冬梗陽子有獄魏戊不能斷以獄上其大宗賂以女樂魏子將受之魏戊謂閻沒女寬曰子以不賄聞於諸侯若受梗陽人賄莫甚焉吾子必陳皆許諾進朝侍於庭饋入召之比置三歎旣食使坐魏子曰吾聞諸伯叔諺曰唯食忘憂君子置食之間三歎何也辭而對曰或賜二小人酒不夕食饋之始至恐其不足是以歎中置自咎曰豈將軍食之而有不足是以再歎及饋之畢願以小人之腹爲君子之心屬厭而已獻子辭梗陽人

又定公二年辛卯冬十一月晉魏舒韓不信如京師合諸侯之大夫于狄泉尋盟且令城成周魏子南面衛彪傒曰魏子必有大咎于位以令大事非其任也

又三年壬辰春正月辛巳魏舒合諸侯之大夫于狄泉將以城成周魏子涖政衛彪傒曰將建天子而易位以令非義也大事奸義必有大咎晉不失諸侯魏子其不免乎是行也魏獻子屬役於韓簡子及原壽過而田於大陸焚焉還卒於甯范獻子去其柏椁以其未復命而田也

史記曰獻子事晉昭公昭公卒而六卿彊公室卑頃公之十二年韓宣子老魏獻子為國政晉宗室祁氏羊舌氏相惡六卿誅之盡取其邑為十縣六卿各令其子為之大夫

卮言曰自魏莊子卒而獻子嗣卿韓宣子卒而獻子為政四十餘年名不經見焉其無所可錄可見矣誅滅晉宗室封殖六卿之餘子始獻子之為也而傳以為義舉謂其有後於晉此豈聖人之言乎史記之詞於左氏為精矣若夫城成周而南面何有於晉左氏固已非之此春秋所以不錄也

魏襄子名曼多史記作修獻子之子

史記魏獻子生魏修

索隱曰修他本亦作哆蓋哆字誤而世數錯也世本獻子生簡子取取生襄子多而左傳云魏曼多是也則哆是襄子中間少簡子一代

左傳晉定公十五年甲辰秋魏襄子與范昭子相惡趙鞅之叛荀躒

韓不信魏曼多伐范氏中行氏敗之奔朝歌以趙氏為請而復之

春秋哀公七年晉定公二十四癸丑春晉魏曼多帥師侵衛十三年己秋晉

魏曼多帥師侵衛經書魏氏止此二條

魏桓子名駒襄子之子

史記魏侈之孫曰魏桓子與韓康子趙襄子共伐滅知伯分其地

晉幽公之時三家強盛晉畏及朝韓朝魏之君桓子十五年丙辰

卒

卮言曰自畢萬邑于魏為大夫至桓子駒凡八世而文侯為諸侯

文侯名斯桓子之子丙辰立戊寅王命為諸侯甲午卒共三十八年

自丁巳至甲午竹書元辛丑凡五十四年

卮言曰魏文侯之分晉也其所由來者漸矣其治國牧民好賢禮

士先儒多與之事詳君德類

武侯擊文侯子在位十六年元乙未

惠王瑩武侯子三十一年以安邑近秦徙治大梁即今開封府故魏亦曰

梁三十六年丙戌改元明年丁亥

齊魏會于徐州以相王五十二年卒元辛亥

竹書周烈王六年辛亥魏惠成王元年顯王三十四年丙戌魏惠成王

三十六年改元稱一年慎靚王二年壬寅魏惠成王薨

襄王赫世本名嗣惠王子在位二十三年元癸卯

史記曰惠王三十五年卒子襄王立襄王元年與諸侯會徐州相

王也追尊父惠王為王十六年襄王卒子哀王立元丙辰

竹書慎靚王三年癸卯今王元年

荀勗曰和嶠云竹書紀年起自黃帝終於魏之今王今王者魏惠成王子案太史公書惠成王但言惠王惠王子曰襄王襄王子曰哀王惠王三十六年卒襄王立十六年卒并惠襄爲五十二年今案古文惠成王立三十六年改元稱一年改元後十七年卒太史公書爲誤分惠成之世以爲二王之年數也世本惠王生襄王而無哀王然則今王者魏襄王也

索隱曰世本惠王生襄王襄王生昭王而無哀王蓋脫一代耳孔衍叙魏語亦有哀王而紀年說惠成王三十六年又稱後元十七年卒此又分惠王之歷以爲二王之年又有哀王凡二十年紀事甚明蓋無足疑然則是紀年之作失哀王之代故分襄王之年爲惠王後元卽以襄王之年包哀王之代耳

司馬公曰史記六國表魏惠王三十六年薨襄王十六年薨哀王二十三年薨汲冢竹書惠王三十六年改元稱一年後十六年杜預和嶠皆以爲史記誤分惠王之世爲二王之年蓋世本惠王生襄王而無哀王且竹書魏史所書必得其真故今從之卮言曰史記惠王三十五年孟軻至梁三十六年卒是惠王未嘗稱王也而孟子何肯稱之曰王又曰襄王與諸侯相王追尊惠王爲王是時諸侯雖僭王未有追尊其父者不應魏獨爲之而蘇秦之遊說皆在惠王之世惠王之稱王無可疑矣史記特因其改稱一年遂以爲襄王元年又載孟子見惠王事於前一年而多哀王一代以實其事蓋襄哀字相似故諸書有誤太史公因而分之不必取信於竹書讀孟子書自可見矣



昭王世本名邀襄王子在位十九年元丙寅

安釐王世本名圍昭王子在位三十四年元乙酉

景濬王世本名午安釐王子在位十五年元巳未

王假景濬王子在位三年秦攻梁引河溝而灌大梁三月城壞王清降遂滅魏元甲戌終丙子

史記索隱述贊曰畢公之苗因國為姓大名始賞盈數自正胤裔

繁昌世載忠正揚干就戮知氏奔命文始建侯武實彊盛大梁東

徙長安北偵卯既無功卯亦外聘王假削弱虜於秦政

右魏始文侯終王假凡八世二侯六王共一百七十九年

韓

韓之先與周同姓韓武子事晉封於韓原

左傳桓公三年壬申春曲沃武公伐冀次于陘庭韓萬御戎梁弘為右逐翼侯于汾隰獲之

正義曰杜註武公莊伯子韓萬莊伯弟世本世家文也

史記曰韓之先與周同姓姓姬氏其後苗裔事晉得封於韓原曰

韓武子

索隱曰按左氏傳云邦晉應韓武之穆則韓是武之子然詩稱

韓侯出祖則是有韓而先滅今據此文云其後裔事晉封於原

曰韓則武子本是韓侯之後晉又封之於韓原即今之馮翊韓

城是也然按世本及左傳舊說今謂韓萬是曲沃桓叔之子即

是晉之支庶又國語叔向謂韓宣子能修武子之德起再拜謝

曰自桓叔已下嘉吾子之賜亦言桓叔是韓之祖也今以韓侯

之後別有桓叔非闕曲沃之桓叔如此則與太史公之意亦有違耳

正義曰括地志云韓原在同州韓城縣西南八里又韓城在縣南十八里古韓國也

卮言曰武王之子封于韓詩韓侯是也竹書平王十四年晉文侯之二十四年甲申晉人滅韓而左傳韓萬爲曲沃武公御戎其爲韓侯之後復封於韓原明矣故史記惟云周同姓左傳所謂桓叔者卽武子也

韓定伯簡武子之孫

春秋僖公十五年

晉惠公六丙子

十一月晉侯及秦伯戰于韓獲晉侯

左傳秦伯伐晉及韓晉侯逆晉師使韓簡視師復曰師少於我

闕士倍我公曰何故對曰出因其資入用其寵饑食其粟三施而無報是以來也今又擊之我怠秦奮倍猶未也公曰一夫不可狃况國乎遂使請戰韓簡退曰吾幸而得囚王成戰于韓原晉戎馬還澗而止梁由靡御韓簡虢射爲右輅秦伯將止之鄭以救公誤之遂失秦伯秦獲晉侯以歸惠公在秦曰先君若從史蘇之占吾不及此夫韓簡侍曰龜象也筮數也物生而後有象象而後有滋滋而後有數先君之敗德及可數乎史蘇是占勿從何益詩曰下民之孽匪降自天噂沓背憎職競由人十月晉與秦盟秦歸晉侯

卮言曰韓原卽武子之封晉師敗焉而簡從惠公入秦蓋秦未取韓也簡之學識有過人者其有後於晉宜乎

韓獻子名厥定伯之子

史記武子三世後有韓厥從封姓爲韓氏

左傳晉景公之三年甲夏晉師救鄭韓厥爲司馬與楚戰于郟敗

績十一年壬申六月卻克將中軍韓厥爲司馬以救魯衛及衛地

韓獻子將斬人卻獻子馳將救之至則旣斬之矣卻子使速以狗

告其僕曰吾以分謗也師從齊師于鞍齊師敗績逐之韓厥夢子

與謂已曰且辟左右故中御而從齊侯邴夏曰射其御者君子也

公曰謂之君子而射之非禮也射其左越于車下射其右斃于車

中綦母張喪車從韓厥曰請駕乘從左右皆肘之使立於後韓厥

俛定其右逢丑父與公易位將及華泉絛絲於木而止丑父傷而

匿之故不能推車而及韓厥執繫馬前再拜稽首奉觴加璧以進

曰寡君使羣臣爲魯衛請曰無令輿師陷入君地下臣不幸屬當

戎行無所逃隱且懼奔辟而忝兩君臣辱戎士敢告不敏攝日承

乏丑父使公下如華泉取飲鄭周父御佐車載齊侯以免韓厥丑

父卻獻子亦免之齊侯使國佐如師盟于袁婁晉師歸

又景公十二年癸酉十二月晉作六軍韓厥韓穿皆爲卿賞鞍之功

也齊侯朝于晉晉侯享之齊侯視韓厥厥曰君知厥也乎齊侯曰

眼改矣韓厥登舉爵曰臣之不敢愛死爲兩君之在此堂也丙子

春晉人謀去故絳諸大夫皆曰必居卻瑕氏之地韓獻子將新中

軍且爲僕大夫公揖而入獻子從公謂獻子曰何如對曰不可卻

瑕氏土薄水淺其惡易覲不如新田土厚水深居之不疾且民從

教十世之利也公說從之遷于新田

春秋成公八年

晉景公十七年戊寅

春晉侯使韓穿來言汶陽之田歸之于

齊

穿厥之族經書韓氏始此

史記晉景公三年晉司寇屠岸賈將作亂時趙盾已死欲誅其子朔韓厥止賈賈不聽厥告趙朔令亡朔曰子必能不絕趙祀死不恨矣厥許之及賈誅趙氏厥稱疾不出程嬰公孫杵臼之藏趙孤趙武也厥知之景公十一年厥與卻克將兵八百乘伐齊敗齊頃公子鞍獲逢丑父於是晉作六卿而厥在一卿之位景公十七年病下大業之不遂者為崇厥稱趙成季之功今後無祀以感景公景公問曰尚有世乎厥於是言趙武而復與故趙氏田邑續趙氏祀

風俗通曰韓厥因卜者之繇陳成季之功紹趙氏之孤建程嬰之

義為晉名卿實天所相其四代始與趙魏俱得列為諸侯矣

左傳晉厲公三年

癸未

夏晉欒書將中軍韓厥將下軍以諸侯之師

及秦師戰于麻隧秦師敗績乙酉夏楚侵鄭及首止范文子欲報楚韓獻子曰無庸使重其罪民將叛之無民孰戰秋八月三郤害伯宗諸而殺之及欒弗忌韓獻子曰郤氏其不免乎善人天地之紀也而驟絕之不亡何待丙戌夏晉師救鄭韓厥將下軍與楚戰于鄆陵楚師敗績

又七年

丁亥

冬厲公殺三郤而使胥童為卿公遊於匠麗氏欒書中

行偃遂執公焉召士匄士匄辭召韓厥韓厥辭曰昔吾畜於趙氏孟姬之讒吾能違兵古人有言曰殺老牛莫之敢尸而况君乎二三子不能事君焉用厥也戊子春欒書中行偃使人弑厲公逆周

子於京師而立之是爲悼公悼公卽位使韓無忌爲公族大夫十一月楚子重伐宋宋華元如晉告急韓獻子爲政曰欲求得人必先勤之成霸安彊自宋始矣晉侯師於台谷以救宋遇楚師于靡角之谷楚師還

春秋襄公元年

晉悼公元年 元巳丑

夏晉韓厥帥師伐鄭仲孫蔑會齊崔杼曹

人邾人杞人次于鄆

左傳晉韓厥荀偃師諸侯之師伐鄭入其郛敗其徒兵于洧上

又傳晉悼公四年

壬辰

春楚師爲陳叛故猶在繁陽韓獻子患

之言於朝曰文王帥殷之叛國以事紂惟知時也今我易之難哉

又公七年

乙未

冬十月晉韓獻子告老公族穆子有廢疾將立之

辭曰詩曰豈不夙夜謂行多露又曰弗躬弗親庶民勿信無忌不才讓其可乎請立起也與田蘇游而曰好仁詩曰靖共爾位好是正直神之聽之介爾景福恤民爲德正民爲正正曲爲直參和爲仁如是則神聽之介福降之立之不亦可乎唐成使韓宣子朝遂老晉侯謂韓無忌仁使掌公族大夫

又九年

丁酉

楚子囊曰當今吾不能與晉爭其卿讓於善韓厥老

矣知榮稟焉以爲政韓起少於欒廩而欒廩士魴上之使佐新軍

史記曰晉悼公之十年韓獻子老

韓宣子名起獻子之子

左傳晉悼公十五年

壬寅

五月秦晉爲成晉韓起如秦涇盟十六年

晉韓宣子聘于周王使請事對曰晉士起將歸時事於宰旅無他事矣王聞之曰韓氏其冒旱於晉乎辭不失舊

春秋昭公二年晉平十年辛酉春晉侯使韓起來聘

左傳趙文子卒晉侯使韓宣子來聘且告為政而來見禮也觀書於大史氏見易象與魯春秋曰周禮盡在魯矣吾乃今知周公之德與周之所以王也

王氏曰前此晉之聘魯者九未嘗以上卿執政者將命今韓起始以去年為政而是春即聘于魯蓋晉霸漸衰而欲以嘉好結魯也

又傳晉平公二十一年甲子夏晉韓宣子如楚送女叔向為介及鄭伯勞諸圍辭不敢見禮也

史記韓獻子卒子宣子代宣子徙居州晉平公十四年吳季札使晉曰晉國之政卒歸於韓趙魏矣晉頃公十二年韓宣子與趙魏共分祁氏羊舌氏十縣晉定公十五年宣子與趙簡子侵伐范中行氏宣子卒

正義曰括地志云懷州武德縣本周司寇蘇忿生之州邑也今在河內是也

左傳晉頃公十二年丁亥秋韓宣子卒

后言曰左傳晉悼公十年戊戌韓獻子老壬寅韓宣子如秦涖盟至頃公十二年丁亥宣子卒已五十年史記云定公十五年甲辰宣子卒是六十七年也計其壽已八九十歲矣安能與趙魏伐范中行春秋經傳甚明史記之誤也傳云宣子以州易原縣而記云

宣子居州亦不合

韓貞子

史失其名

宣子之子

史記宣子卒子貞子代立貞子徙居平陽

索隱曰世本宣子之子平子名頃又云景子居平陽平陽在山

西宋忠曰今河東平陽

韓簡子名不信貞子之子

史記貞子卒子簡子代

索隱曰史記多無簡子莊子而云貞子生康子班氏亦同

索隱曰按世本有簡子名不信莊子名庚趙世家亦有簡子名

不佞也

春秋昭公三十二年

晉定公二年辛卯

冬仲孫何忌會晉韓不信及諸侯大夫城

### 成周

左傳晉魏舒韓不信如京師合諸侯之大夫于狄泉尋盟且令

城成周士彌牟以令役於諸侯屬役賦丈書以授帥而效諸劉

子韓簡子臨之以爲成命明年秋趙鞅之韓簡子與中行文

子相惡乃與荀躒魏曼多伐范氏中行氏敗之奔朝歌以趙氏

爲請而復之

韓莊子名庚簡子之子

韓康子名虎莊子之子

通鑑晉荀璜攻出公公奔齊道死而立哀公伐衛還三卿晏于籃

臺知襄子戲韓康子而侮段規知果諫之弗聽丙戌知伯請地於

韓康子康子欲弗與段規曰知伯好利而復不與將伐我不如與

之彼狃於得地必請於他人他人不與必嚮之以兵然則我得免於患而待事之變矣康子曰善乃與之知伯又求地於魏桓子亦與之知伯又求地於趙襄子襄子弗與知伯怒帥韓魏之甲以攻之襄子走晉陽三家圍晉陽而灌之知伯行水魏桓子御韓康子駢乘趙襄子陰與韓魏約反攻知伯殺之滅其族而分其地大事記曰段規謂韓康子曰分地必取成臯康子曰成臯石溜之地也寡人無所用之段規曰臣聞一里之厚而動千里之灌者地利也千人之衆而破三軍者不意也君用臣言則韓必取鄭矣康子曰善果取成臯至韓之取鄭也果從成臯

通鑑前編周威烈王元年丙戌晉韓虎卒子啟章代

韓武子名啟章康子之子

史記曰武子二年戊午伐鄭殺其君幽公

竹書紀年威烈王七年壬戌韓武子都平陽

通鑑前編周威烈王十七年壬申晉韓十啟章卒

卮言曰韓氏自韓萬傳至啟章凡十世至景侯虔為諸侯

韓景侯名虔武子之子壬申立戊寅命為諸侯九年卒

烈侯索隱曰世本作武侯取景侯子在位十三年元壬午

史記景侯九年卒子列侯取立索隱曰世本作武侯

文侯史矢其名烈侯子在位十年元巳未至甲辰

卮言曰史記索隱云紀年無文侯世本無列侯當從紀年而通鑑

前編依史記景侯之後有二侯又以列為烈今從之

哀侯史夫其名文侯子元年與趙魏分晉國二年滅鄭六年為嚴遂所弑



史記文侯卒子哀侯立哀侯元年與趙魏分晉國二年滅鄭因徙都鄭六年韓嚴弒其君哀侯而子懿侯立

竹書安王二十一年庚子韓滅鄭哀侯入于鄭烈王二年丁未晉桓公邑哀侯于鄭韓山堅弒其君哀侯

史記索隱曰紀年云魏武侯二十二年韓滅鄭哀侯入于鄭二十三年晉桓公邑哀侯于鄭是韓既徙都因改號曰鄭故戰國策謂韓惠王曰鄭惠王猶魏徙大梁稱梁王然也

懿侯若山哀侯子在位十二年元辛亥

竹書烈王六年辛亥韓共侯趙成侯遷晉桓公于屯留趙成侯韓懿侯若伐我葵

史記索隱曰年表懿侯作莊侯又紀年云韓山堅弒其君哀侯而

韓若山立若山即懿侯也

今竹書紀年本無若山文而烈王六年韓有二侯懿侯名若

昭侯武懿侯子在位二十六年元癸亥

史記懿侯卒昭侯立十年韓姬弒其君悼公二十六年昭侯卒

索隱曰姬亦作玘姬是韓大夫而王邵亦云不知悼公何君也

僖侯見竹書諸史不載

竹書顯王元年癸丑鄭城邢丘

自此韓改稱曰鄭

胡氏應麟曰自韓滅鄭取其邑為都國尚稱韓至是而改鄭亦

猶趙改稱邯鄲也是後竹書皆書鄭至慎觀王十六年竹書末簡復書王與齊王會于韓豈至是改稱鄭與惟顯王十六年書

王以韓師諸侯師縣于襄陵二十四年書魏敗韓馬陵二事仍

稱韓不可曉或傳錄之誤胡氏此說亦未細心韓鄭自二

顯王七年

梁惠成王九年巳未

王會鄭釐侯于巫沙

自後四書鄭釐侯

威侯

見竹書諸史不載

竹書顯王三十三年乙亥鄭威侯與邯鄲圍襄陵三十八年王會鄭威侯于巫沙

史記索隱曰紀年鄭昭侯武薨次威侯立威侯七年與邯鄲圍襄陵五月梁惠王會威侯于巫沙十月鄭宣王朝梁不見威侯之卒魏敗韓舉在威侯八年而世家以為宣惠王五年事又昭侯十年韓姬弒其君悼公悼公又不知誰之謚則韓微小國史失代系故史記及世本不同今亦不可考也

卮言曰韓國亦非微小特史失其系耳史記昭侯之中有悼公而無所謂僖侯威侯者竹書哀侯之後有共侯與懿侯同時懿

侯之後有僖侯昭威侯而無昭侯豈哀侯徙都于鄭而韓故都別立有君如共侯昭侯之類乎悼公者或是僖威二侯之訛也

宣惠王昭侯子十年戊戌稱王凡二十一年

元巳丑

竹書赧王元年丁未十月鄭宣王來朝于魏

襄王

一作襄哀王

名倉宣惠王子在位十六年

元庚戌

釐王咎襄王子在位二十三年

元丙寅

桓惠王

史失其名

釐王子在位三十四年

元巳丑

王安桓惠王子在位九年秦虜之盡入其地為潁川郡

元癸亥終辛未

右韓始景侯終王安十一世十一君共一百七十四年

太史公曰韓厥之感晉景公紹趙孤之子武以成程嬰公孫杵臼之義此天下之陰德也韓氏之功於晉未覩其大者也然與趙魏

終爲諸侯十餘世宜乎哉

索隱述贊曰韓氏之先實宗周武事微國小春秋無語後裔事晉韓原是處趙孤克立知伯可取旣徒平陽又侵負黍景昭據侯惠文僭主秦敗脩魚魏會區鼠

蘇子古史曰韓之先獻子厥最賢然春秋之際諸侯之賢大夫如獻子者多矣而子孫莫興太史公以爲存趙氏之孤爲天下之陰德故宜有後余謂不然韓之先與晉同祖皆周武王之後也晉自文公伯諸侯至平公八世猶未足以究武之烈而繼之以韓此天意也獻子何足以當之然周衰姬姓復興者三國燕與韓魏皆據地千里后稷播種百穀以濟饑饉其報固當然哉

### 田齊世章

田齊之先曰陳完字敬仲陳厲公之子也

左傳陳厲公生敬仲其少也周太史有以周易見陳侯者陳侯使筮之遇觀之否曰是謂觀國之光利用賓于王此其代陳有國乎不在此其在異國非此其身在其子孫光遠而自他有耀者也坤土也巽風也乾天也風爲天於土上山也有山之材而照之以天光於是乎居土上故曰觀國之光利用賓于王庭實旅百奉之以玉帛天地之美具焉故曰利用賓于王猶有觀焉故曰其在後乎風行而著於土故曰其在異國乎若在異國必姜姓也姜太嶽之後也山嶽則配物莫能兩大陳衰此其昌乎

杜註曰坤下巽上觀坤下乾上否蓋觀六四爻變而爲否也易言觀之六四近九五之君故得觀其國家之光華其占爲利於

王國論 卷之七  
三十一  
王朝之賓也此二句觀六四之爻辭下乃周史釋卦辭之義以陳爲舜後作賓于周家今敬仲得此卦將代陳得國而爲諸侯也觀光又言觀光者其光悠遠自他處相射而有耀者也巽變爲乾故云風爲天乾上坤下故云於土上正卦三四五爻爲艮變卦二三四爻亦爲艮互體故云山也山則材之所生故云有山之材巽變爲乾故云照之以天光山之材天之光皆居坤之上故云居土上四爲諸侯變而之乾此有國朝王之象故能觀國之光利用賓于王艮爲門庭乾爲金玉坤爲布帛言王庭中實陳有百品奉之玉帛是乾天坤地之美具備故云利用賓于王觀感而化非旦夕所能故云在後巽風變乾附麗於坤土則不在本國故云在異國

左傳陳宣公十一年配春陳人殺其太子禦寇陳公子完奔齊齊侯使敬仲爲卿辭曰羈旅之臣幸若獲宥及於寬政赦其不閑於教訓而免於罪矣弛於負擔君之惠也所獲多矣敢辱高位以速官諉請以死告詩曰翹翹車乘招我以弓豈不欲往畏我友朋桓公使爲工正飲桓公酒公曰以火繼之辭曰臣卜其晝未卜其夜不敢君子曰酒以成禮不繼以淫義也以君成禮弗納於淫仁也初懿氏卜妻敬仲其妻占之曰吉是謂鳳凰于飛和鳴鏘鏘有媯之後將育于姜五世其昌并于正卿八世之後莫之與京卒妻敬仲

史記田齊世家曰陳敬仲完者陳厲公之子也詳前章厲公以淫出國厲公兄桓公之子林弒厲公而自立是爲莊公故陳完不得立

莊公卒弟宣公立宣公殺其太子禦寇禦寇與完恐禍及已完故奔齊齊桓公使為工正完以陳字為田氏

應劭曰敬仲始食菜地由是改姓田氏

索隱曰敬仲奔齊以陳田二字聲相近遂為田氏

正義曰敬仲既奔齊不欲稱本國號故改陳字為田氏

又左傳正義曰左傳終始稱陳田必非敬仲所改未知何時改

耳詳後成子條

史記田敬仲生田穉孟夷孟夷生潛孟莊徐廣曰一作芷索隱曰世本作閔孟克潛

孟莊生文子湏無

陳文子名無宇

史記文子名湏無桓子名無宇今從左傳

論語子張問曰陳文子有馬十乘棄而違之至於他邦則曰猶吾

大夫崔子也違之之一邦則又曰猶吾大夫崔子也去之何如子

曰清矣曰仁乎曰未知焉得仁

史記世家曰田文子事齊莊公晉之大夫欒盈作亂於晉來奔齊

齊莊公厚客云晏嬰與田文子諫莊公弗聽文子卒生桓子

左傳齊莊公四年亥秋齊侯伐衛先驅自衛將遂伐晉晏平仲曰

君恃勇力以伐盟主若不濟國之福也不德而有功憂必及君崔

杼諫曰不可弗聽陳文子見崔武子曰將如君何武子曰吾言於

君君弗聽也以爲盟主而利其難羣臣若急君於何有子姑止之

言他日晉討齊而有急我不能顧君欲殺之以說於晉也文子退告其人曰崔子將死乎謂君

甚而又過之不得其死過君以義猶自抑也况以惡乎齊侯遂伐

晉

又莊公五年壬子齊侯既伐晉而懼將欲見楚子楚子使遠啟彊如齊聘且請期齊杜菟軍實使客觀之陳文子曰齊將有寇吾聞之兵不戢必取其族秋齊侯聞將有晉師使陳無宇從遠啟彊如楚辭且乞師冬楚子使遠啟彊帥師送陳無宇明年癸丑五月崔杼弑莊公

凌氏曰崔杼為無君之言文子既與知之齊將有寇文子又逆知之乃不能匡君闕失陰折姦宄之萌而徒低回竊語坐觀其釁國家曾何恃於有若人哉彼其捐十乘之馬守百車之木特齟齬自好者流爾

又齊景公三年丙辰秋齊慶封好田而耆酒與慶舍政盧蒲癸王何求寵於慶氏欲為莊公報仇陳文子謂桓子曰禍將作矣吾其何

得對曰得慶氏之木百車於莊文子曰可慎守也已

時慶氏有木積於莊桓子

所欲惟此故文子稱其慎守

十月慶封田于萊陳無宇從丙辰文子使召之請

曰無宇之疾病請歸慶季卜之示之兆曰死奉龜而泣乃使歸慶

嗣聞之曰禍將作謂子家速歸禍作必於嘗歸猶可及也子家弗

聽陳無宇濟水而戕舟發梁

不欲慶封得救難

十一月乙亥嘗于太公之

廟慶舍泣事盧癸王何執寢戈慶氏以其甲環公官樂高陳鮑之

徒介慶氏之甲盧蒲癸自後刺子之王何以戈擊之而死公懼鮑

國曰羣臣為君故也陳湏無以公歸稅服而如內官慶封歸遇告

亂者丁亥伐西門弗克還伐北門克之入伐內宮弗克及陳于嶽

請戰弗許遂奔魯

卮言曰崔杼弑莊公而族滅於慶氏慶封滅崔氏而家戮於四

卿田氏卒擅齊而有之前門拒虎後戶進狼前者適足爲後之驅除也齊之禍屢見矣而景公不寤復予田氏以政豈天將以田易呂乎

又景公八年

辛酉

四月韓須如齊逆女齊陳無宇送女致少姜少姜

有寵於晉侯謂陳無宇非卿執諸中都少姜爲之請曰送從逆班畏大國也猶有所易是以亂作冬少姜卒叔向言陳無宇於晉侯曰彼何罪君使公族逆之齊侯使上大夫送之猶曰不共君求以貪國則不共而執其使君刑已頗何以爲盟主且少姜有辭十月陳無宇歸

陳桓子名湏無文子之子

左傳齊景公元年

壬戌

春齊侯使晏嬰請繼室於晉旣成昏晏子受

禮叔向從之晏相與語叔向曰齊其何如晏子曰此季世也吾弗知齊其爲陳氏矣公棄其民而歸於陳氏齊舊四量豆區釜鍾四升爲豆各自其四以登於釜釜十則鍾陳氏三量皆登一焉鍾乃大矣以家量大而以公量收之山水如市弗加於山魚鹽唇蛤弗加於海民參其力二入於公而衣食其一公聚朽蠹而三老凍餒國之諸市屢賤踊貴民人痛疾而或噢咻之其愛之如父母而歸之如流水欲無獲民將焉辟之箕伯直柄虞遂伯戲其相胡公大姬已在齊矣初景公欲更晏子舊宅晏子辭請復舊宅公弗許因陳桓子以靖乃許之

又十四年

丁卯

十一月楚滅陳晉侯問於史趙曰陳其遂亡乎對曰

未也公曰何故對曰陳顓頊之族也歲在鶉火是以卒滅陳將如

之今在析木之津猶將復由且陳氏得政於齊而後陳亡臣聞盛德必百世祀虞之世數未也繼守將在齊其兆既存矣

又十六年<sub>已</sub>春齊惠樂高氏皆耆酒信內多怨彊於陳鮑氏而惡之夏有告陳桓子曰子旗子良將攻陳鮑亦告鮑氏桓子授甲而如鮑氏遭子良醉而聘遂見文子則亦授甲矣使視二子則皆從飲酒桓子曰彼雖不信聞我授甲則必逐我及其飲酒也先伐諸陳鮑方睦遂伐樂高氏子良曰先得公陳鮑焉往遂伐虎門五月唐辰戰于稷樂高敗國人追之又敗諸鹿門樂施高彊奔魯陳鮑分其室晏子謂桓子必致諸公讓德之主也讓之謂懿德義利之本也蘊利生孽姑使無蘊乎可以滋長桓子盡致諸公而請老于

莒桓子召子山私具幄幕器用從者之衣屨而反棘焉子商亦如之而及其邑子周亦如之而與之夫于及子城子公公孫捷而皆益其祿凡公子公孫之無祿者私分之邑國之貧弱孤寡者私與之粟詩曰陳錫載周能施也桓公是以霸公與桓子莒之旁邑辭穆孟姬爲之請高唐陳氏始大

厄言曰陳氏始從慶氏滅崔氏矣又從樂高滅慶氏矣今又伐樂高而逐之樂高去而陳氏益專矣鮑氏之睦于陳也亦陳氏之智也欲去樂高不得不結鮑氏卽如趙襄子之滅知伯不得不結韓魏及恒之弑簡公而立陽生則鮑氏亦在其股掌中矣權臣之欺世服人倚伏之機可畏哉

又三十二年<sub>乙酉</sub>冬齊侯與晏子坐於路寢公歎曰美哉室其誰有



此乎晏子曰敢問何謂也公曰吾以爲在德對曰如君之言其陳氏乎陳氏雖無大德而有施於民豆區釜鍾之數其取之公也薄其施之民也厚公厚歛焉陳氏厚施焉民歸之矣詩曰雖無德與女式歌且舞陳氏之施民歌舞之矣後世若少惰陳氏而不亡則國其國也已公曰善哉是可若何對曰惟禮可以已之在禮家施不及國大夫不收公利公曰善哉我不能矣吾今而後知禮之可以爲國也

卮言曰史記世家云田桓子無宇有力事齊莊公甚有寵無宇卒生武子啟與釐子乞乞事齊景公爲大夫據此文則桓子未逮事景公而左傳所載桓子事皆在景公時又傳無武子而文子桓子名與史記不同今俱從左傳

### 陳僖子名乞桓子之子

史記世家曰田釐子乞事齊景公爲大夫其收賦稅於民以小斗受之其粟予民以大斗行陰德於民而景公弗禁由此田氏得齊衆心宗族益疆民思田氏晏子數諫景公景公弗聽已而使於晉與叔向語曰齊國之政其卒歸於田氏矣晏嬰卒後范中行氏反晉晉攻之急范中行請粟於齊田乞欲爲亂樹黨於諸侯乃說景公曰范中行數有德於齊齊不可不救齊使田乞救之而輸之粟卮言曰按左傳晏子與叔向語是景公九年事而所謂以家量大以公量收之皆謂桓子也史記以爲僖子事與左傳不合左傳陳乞救范氏在景公五十七年距晏子如晉之時已四十八年矣又二歲而弑荼乞不應若是老也史記之誤

左傳齊景公五十七年庚戌秋齊陳乞弦施救范氏

春秋哀公六年齊孺子荼元年壬子夏齊國夏及高張來奔

左傳齊景公疾使國惠子高昭子立荼寘羣公子於萊景公卒公子陽生奔魯壬子春陳乞僞事高國者每朝必駮乘馬所言必從大夫曰彼皆偃蹇將棄子之命皆曰高國得君必偏我盍去諸固將謀子子早圖之莫如盡滅之需事之下也及朝則曰必虎狼也見我在子之側殺我無日矣謂就之位又謂諸大夫曰二子者禍矣恃得君而欲謀二三子曰國之多難貴寵之田盡去之而後君定既成謀矣盍及其未作也先諸作而後悔亦無及也大夫從之六月戊辰陳乞鮑牧以甲入于公宮昭子聞之與惠子乘如公戰于莊敗國人追之國夏奔莒遂及高張晏

### 圍弦施來奔

陳氏曰齊殺其大夫高厚齊崔杼弑其君光齊國夏高張來奔陳乞弑其君荼聖人之垂戒深矣

許氏曰陳乞將立陽生乃先逐國高國高奔而後陳乞弑君之謀得肆矣

### 秋七月齊陽生入于齊齊陳乞弑其君荼

左傳陳僖子使召公子陽生夜至于齊僖子使子士之母養之與饋者皆入十月丁卯立之將盟鮑子醉而往其臣差車鮑點曰此誰之命也陳子曰女忘君之爲孺子受命于鮑子遂誣鮑子曰子之命也鮑子曰誰非君之子乃受盟使胡姬以安孺子如賴公使朱毛告于陳子曰微子則不及此雖然君異于器不

可以二器二不匱君二多難敢布諸大夫僖子不對而泣曰君舉不信羣臣乎以齊國之困困又有憂少君不可以訪是以求長君庶亦能容羣臣乎不然夫孺子何罪毛復命公悔之毛曰君大訪于陳子而圖其小可也使毛遷孺子於駘不至殺之

公羊傳景公謂陳乞曰吾欲立舍何如陳乞曰所樂乎爲君者欲立之則立之不欲立則不立君如欲立之則臣請立之陽生謂陳乞曰吾聞子蓋將不欲立我也陳乞曰夫下乘之主將廢正而立不正必殺正者吾不立子者所以生子者而走矣與之玉節而走之景公死而舍立陳乞使人迎陽生於其家除景公之喪諸大夫皆在朝陳乞曰常之母有魚菽之祭願諸大夫之化我也諸大夫皆曰諾於是皆至陳乞之家坐陳乞曰吾有所爲田請以示焉諸大夫皆曰諾於是使力士舉巨囊而至于中霤諸大夫見之皆色然而駭開之則闖然公子陽生也陳乞曰此君也已諸大夫不得已皆逡巡北面再拜稽首而君之爾自是往弒舍

高郵孫氏曰陽生入齊而陳乞弒君則是陽生與聞乎故也不以陽生首惡者陽生之入陳乞召之茶之弒陳乞爲之加陽生以弒君之罪則乞廢立之迹不明書陽生之入而陳乞弒君則乞之惡著而陽生與有罪焉

左傳齊簡公元年丁巳五月公會吳子伐齊齊國書將中軍高無丕將上軍陳僖子謂其弟書爾死我必得志陳書曰此行也吾聞鼓而已不聞金矣戰于艾陵吳人大敗齊師獲國書陳書以獻于公

卮言曰節義之於人國也顧不重歟家有死事之臣國有褒忠之典雖強宗悍族亦得借以爲名而被其餘烈此陳乞所以命其弟書也書之死誠無愧死其弟而竊其施乞之儉甚矣

史記世家曰悼公既立田乞爲相專齊政四年田乞卒

陳成子恒避漢文帝諱故書常僖子之子

史記世家曰田乞卒子常代立是爲田成子鮑牧與齊悼公有郟

弑悼公齊人共立簡公田常與監止俱爲左右相相簡公田常心

害監止監止幸於簡公權弗能去於是田常復修釐子之政以大

斗出貸以小斗收齊人歌之曰姬乎采芑歸乎田成子言姬之采芑菜皆歸

入于田成子以刺齊國之政將歸陳氏也

王氏維禎曰按史通云田常見在而齊人遽呼以謚此之不實昭然可見

春秋哀公十四年齊簡公四庚申夏四月齊陳恒執其君寘于舒州

左傳齊簡公之在魯也闞止有寵焉及卽位使爲政成子憚之

驟顧諸朝諸御執言於公曰陳闞不可並也君其擇焉弗聽子

我夕陳逆殺人逢之遂執以入陳氏方睦使疾而遺之潘沐備

酒肉焉饗守囚者醉而殺之子我盟諸陳於陳宗闞止卽子我潘米汁也子

我夕視事逢陳逆殺人于道執逆至朝陳氏宗族方和使逆詐疾因遺米汁以沐頭而納酒肉于中逆得享醉守者殺之而逃

子我懼逆反爲患故盟之陳宗陳豹爲子我臣他日與之言攻說遂有寵謂之

曰我盡逐陳氏而立女若何對曰我遠於陳氏矣且其違者不

過數人何盡逐焉遂告陳氏子行曰卽陳逆彼得君不先必禍子

子行舍於公宮夏五月壬申成子兄弟四乘如公子我在幄出

逆之遂入閉門侍人禦之子行殺侍人子我方在聽政之所見陳氏至出迎之成子遂

入公宮及閉門子行先  
舍公宮故得殺侍人

公與婦人飲酒于檀臺成子遷諸寢公

執戈將擊之太史子餘曰非不利也將除害也成子出舍于庫  
聞公猶怒將出曰何所無君子行抽劍曰需事之賊也誰非陳  
宗所不殺子者有如陳宗乃止子我歸屬徒攻闈與大門皆不  
勝乃出陳氏追之失道於奔中適豐丘豐丘人執之以告殺諸  
郭闞成子將殺大陸子方陳逆請而免之以公命取車於道及  
而衆知而東之出雍門陳豹與之車弗受曰逆爲余請豹與余  
車余有私焉事子我而有私而於其讐何以見魯衛之士

傳言  
陳氏

務東郭賈奔衛庚辰陳恒執公于舒州

凌氏曰方成子之兄弟如故而遷公於寢也豈不昭然叛逆事  
哉而猶聞公怒而將出若有迫於所遭之不幸者蓋姑以是激

私黨之怒以濟其謀焉耳非其情也意如之受伐請以五乘亡  
彌牟之距輒欲自北門出姦雄歸詐大都如此

六月齊人弑其君壬于舒州

左傳六月甲午齊陳恒弑其君壬于舒州孔丘三日齋而請伐  
齊三公曰魯爲齊弱久矣子之伐之將若之何對曰陳恒弑其  
君民之不與者半以魯之衆加齊之半可克也公曰子告季孫  
孔子辭退而告人曰吾以從大夫之後也故不敢不告

齊高無丕出奔北燕

大事記曰國高天子之貳守也田恒作亂故無丕出奔元王五  
年犁丘之役無丕復見於傳蓋田氏尋復之也史記年表是年  
書齊自是稱田氏謂諸侯不復知有齊也

春秋哀公十五年庚申冬及齊平

左傳春成叛于齊孟武伯伐成弗克秋陳瓘

陳恒之兄

如楚過衛仲

由見之曰天或者以陳氏為斧斤既斲喪公室而他人有之不可知也其使終饗之亦不可知也吾善魯以待時不亦可乎何必惡焉子玉曰然吾受命矣子使告我弟

謂陳恒也

冬及齊平子服景伯如齊子貢為介陳成子館客曰寡君使恒告曰寡人願事君如事衛君景伯揖子貢而進之對曰寡君之願也成子乃歸

成

厄言曰經書陳恒寘其君子舒州後書齊人弑其君子舒州則弑君者恒也而稱國以弑凡例謂以齊君無道故不書恒之名非也君雖無道豈得沒恒弑逆之惡夫陳恒名已見前矣書

齊人弑者見齊人知有陳氏而不知有君也陳恒負弑君之惡而魯與齊平夫子聲陳恒之罪而子路子貢欲善陳氏豈其識不及此乎或左氏之記謬也

左傳齊簡公十五年

壬申

夏晉荀瑶帥師伐鄭次于桐丘鄭駟弘請

救于齊齊師將與陳成子屬孤子三日朝設乘車兩馬繫五邑焉召顏涿聚之子晉曰隰之役而父死焉以國之多難未女恤也今君命女以是邑也服車而朝母廢前勞乃救鄭及濮雨不涉成子衣製杖戈立於阪上馬不出者助之鞭之知伯聞之乃還曰我卜伐鄭不卜敵齊使謂成子曰大夫陳子陳之自出陳之不祀鄭之罪也故寡君使瑾察衷焉謂大夫其恤陳乎若利木之顛瑾何有焉成子怒曰多陵人者皆不在知伯其能久乎中行文子

晉荀寅奔齊者

曰有自晉師告寅者將爲輕車千乘以厭齊師之門則可盡也成  
子曰寡君命桓曰無及寡無畏衆雖過千乘敢辟之乎將以子之  
命告寡君疑其爲晉文子曰吾乃今知所以亡自恨無知君子之謀也始衷  
終皆舉之而後入焉今我三不知而入之不亦難乎

史記世家曰田常既殺簡公而立平公懼諸侯共誅已乃盡歸魯  
衛侵地西約晉韓魏趙氏南通吳越之使脩功行賞親於百姓以  
故齊復定又言於平公曰德施人之所欲君其行之刑罰人之所  
惡臣請行之行之五年齊國之政皆歸陳氏於是盡誅鮑晏闞止  
及公族之彊者而割齊自安平以東至琅邪自爲封邑封邑大於  
平公之所食田常乃選齊國中女子長七尺以上爲後宮後宮以  
百數而使賓客舍人出入後宮者不禁及田常卒有七十餘男

索隱曰鮑昱云陳成子有數十婦生男百餘人與此亦異然誰  
允南按春秋陳桓爲人雖志大負殺君之名至於行事亦脩整  
故能自保非苟爲禽獸之行夫成事在姦雖子七十祇以長亂  
事豈然哉言其非實者也

茅氏坤曰予覽田齊世家太史公竒其懿仲之下也然觀田常  
賓客舍人出入後宮不禁卒有七十男而田氏之宗亂矣

會編貞定王十三年乙酉陳成子卒子磐代

大事記曰成子陳桓也春秋謂之陳史記謂之田蓋自春秋後  
遂稱田氏也

金氏復祥曰按陳故國田齊之封邑陳未滅之前田氏猶稱陳  
陳既滅之後田氏遂稱田一國不再興其意蓋削故國之號而

圖齊也荀瑤之譏正中其腹心之疾故成子無辭以對而言他

田襄子名磐世本作班成子之子

史記襄子相齊宣公時三晉殺智伯分其地襄子使其兄弟宗人盡為齊都邑大夫與三晉通使且以有齊國

田莊子名曰襄子之子世本名伯襄子之子

史記曰田襄子卒子莊子曰立莊子相齊宣公宣公四十三年伐晉毀黃城圍陽狐明年伐魯葛及安陵明年取魯之一城

田悼子

竹書紀年威烈王十七年壬申田悼子卒田布殺其大夫公孫孫公孫孫以廩丘叛于趙田布圍廩丘翟角趙孔屑韓氏救廩丘及田布戰于龍澤田師敗逋

索隱曰紀年齊宣公十五年田莊子卒明年立田悼子悼子卒乃次立田和是莊子後有悼子蓋歷年無幾所以作世本及史記者不得錄也而莊周及鬼谷子亦云田成子殺齊君十二代而有齊國今據世本世家自成子至王建之滅祗十代若如紀年則悼子及侯剡卽有十二代與莊子鬼谷說同明紀年亦非妄說也

禮記檀弓曰陳莊子死赴於魯魯人欲勿哭穆公召縣子問之對曰古之大夫束脩問不出境雖欲哭之安得而哭之今之大夫交政於中國雖與勿哭焉得而弗哭且臣聞之哭有二道有愛而哭之有畏而哭之公曰然則如之何而可縣子請哭諸異姓之廟於是哭諸縣氏



卮言曰田氏自敬仲至莊子凡十世至太公為諸侯  
齊太公名和莊子之子

史記田莊子卒子太公和立太公相齊宣公宣公四十八年取魯  
之郕明年宣公與鄭人會西城伐衛取毋丘宣公卒子康公立十  
四年淫荒太公乃遷康公於海上食一城以奉其先祀三年太公  
與魏文侯會濁澤求為諸侯魏文侯乃使使言周天子及諸侯請  
立齊相田和為諸侯周天子許之明年立為齊侯

會編威烈王十六年

辛未齊田盤卒子和代

按此文不但無悼子代且無莊子代明是踈畧

安王十六年

乙未

初命齊大夫田和為諸侯十七年

丙午

齊田和卒

桓公名午太公子

索隱曰紀年齊康公五年田侯午生二十二年田侯剡立後十年

齊田午弒其君及孺子喜而為公春秋後傳亦云田午弒田侯及  
其孺子喜而兼齊是為桓侯與史世家不同也

威王因齊桓公子立三十二年

丁亥

稱王三十六年卒

元癸卯

宣王辟疆威王子在位十九年

元巳丑

閔王地

世本名遂

宣王子四十年燕師入齊王走莒為楚將淖齒所殺襄

襄王法章閔王子閔王之遇殺法章變姓名為莒太史敫家庸敫女

奇其狀貌而與私通焉淖齒既去莒莒人共立法章為王以保莒立

太史氏女為王后五年田單破燕軍迎王入臨菑十九年卒

元戊寅

王建襄王子田太史氏在位四十四年降秦滅齊虜王建

元丁酉

終庚辰

史記秦擊齊虜王建遷之共齊人怨王聽姦臣賓客以亡其國歌  
之曰松耶柏耶住建共者客耶疾建用客之不詳也

正義曰地理志河內有共縣今衛州共城縣也

右田齊始太公終王建凡七世稱侯二主稱王五主共一百五十六年

太史公曰蓋孔子晚而喜易易之爲術幽明遠矣非通人達才孰能 注意焉故周太史之卦田敬仲完占至十世之後及完奔齊懿仲卜之亦云田乞及常所以比犯二君專齊國之政非必事勢之漸然也蓋若遵厭兆祥云

索隱述贊曰田完避難奔于大姜始辭羈旅終焉鳳凰物莫兩盛代五其昌二君比犯三晉爭疆和始擅命威遂稱王濟急燕趙弟列康莊秦假東帝莒立法章王建朱國松栢蒼蒼

### 六國總論

史記六國表序曰太史公讀秦記至犬戎敗幽王周東徙洛邑秦襄公始封爲諸侯作西時用事上帝僭端見矣及文公踰隴攘夷狄而穆公修政東竟至河則與齊桓晉文中國侯伯侔矣是後陪臣執政大夫世祿六卿擅晉權征伐會盟威重於諸侯及田常殺簡公而相齊國諸侯晏然弗討海內爭於戰功矣三國終之卒分晉田和亦滅齊而有之六國之盛自此始務在疆兵并敵謀詐用而從衡短長之說起矯稱蠶出誓盟不信雖置質剖符猶不能約束也秦始小國僻遠諸夏賓之比於戎翟至獻公之後常雄諸侯論秦之德義不如魯衛之暴戾者量秦之兵不如三晉之疆也然卒并天下非必險固便形勢利也蓋若天所助焉秦旣得意燒天下詩書諸侯史記猶其爲其有所刺譏也詩書所以復見者多藏

人家而史記獨藏周室以故滅惜哉惜哉獨有秦記又不載日月  
其文畧不具然戰國之權變亦有可頗采者何必上古余於是因  
秦記踵春秋之後起周元王表六國時事訖二世凡二百七十年  
著所聞興壞之端後有君子以覽觀焉

卮言曰太史公既譜十二諸侯年表矣而又作六國表六國者魏  
韓趙楚燕齊也然三晉之前系晉田齊之前系齊周之下系秦楚  
燕見前表中而復系之此表詳七雄之所由來也繼獲麟之末起  
元王之初至二世之亡凡二百七十年興亡大槩備矣而其間有  
與本紀世家言自相矛盾者悉質正於此篇焉

學海君道部卷之二十七

世系類

七

列國譜系

八

古國篇

一

卮言曰古之王天下者其支庶未嘗不裂土而封之非有大故不輕絀滅焉卽易姓受命之主更追崇先代之後不特弗殄其世也殷周以征誅得天下且爾前此可知矣以故姬姜姚姒之邦布列方寓春秋以徃歷歷可考今據路史所紀國名凡帝王之後者刪其重複增其闕略爲古國篇而其世代疑似衆說不一者更系後篇

伏羲後國章

風

元和郡國志曰復州竟陵縣城本古風城古之風國卽伏羲風姓也南臨泚水蒞水也武德中置泚川縣

路史曰風帝太昊之後國後有風后佐黃帝滅蚩尤堯誅大風禹訪風后皆其祥云

竹書夏紀帝相二年征風及黃夷

陳

路史曰帝太昊都宛丘故陳爲太昊之墟

包

路史曰包帝太昊之潛邦夏復封之爲妣姓地在襄陽杜預世族譜有庖國云夏同姓王符云夏封伏羲之後

密

路史曰密太昊後國地在高密春秋之萊夷維邑也

今山東膠州高密縣

處

路史曰處世咸作密亦作宓故處子賤碑以爲處義之後音爲伏鄆之東一亭有致密鄉記爲古密或者其處也

義

卮言曰書堯典乃命羲和疑義爲伏羲之後

任

路史曰任本已姓逮黃帝以封幼子周之繼絕也以居風姓今濟陽之任城或曰仍也故晉志以仍與有仍爲二

卮言曰孟子之鄒季任爲任處守以幣交則戰國之時任國猶在

也今山東濟寧州有任城

宿

春秋隱公元年秋九月及宋人盟於宿

胡傳內稱及外稱人皆微者其地以國宿亦與焉微者盟會不志於春秋此其志者有宿國之君也

廬陵李氏曰地以國者宿鄧曹齊邢宋之盟是也若穀以宿爲邑名非矣

隱公八年夏六月辛亥宿男卒

穀梁傳宿微國也未能同盟故男卒也

胡傳宿與魯已通而不名者舊史失之

又莊公十年春三月宋人遷宿

穀梁傳遷亾辭也其不地宿不復見也遷者猶未失其國家以往者也

公羊傳遷之者何不通也以地還之也子沈子曰不通者蓋因而臣之也

高氏曰宿介於宋魯之間屬於宋而遷魯宋人以爲貳於魯而遷之遷者移入封內以爲封庸自是宿不復見則宿亦亾矣

廬陵李氏曰三傳左氏穀梁同公羊因而臣之之說亦是而不通之詞迂僻無義故不取穀梁未失其國家以往本言自遷者注說得之而許氏因其說又曰遷之使未失其國以往其義猶有所難則見王澤之未竭也僖文以後有滅國無遷國矣

路史曰宿風姓國武王所封宋人遷之杜預云東平亾鹽有故宿

城在鄆之須城東隋宿城縣也秦置須昌在須句城北隋改宿城  
又於宿城西北別置須昌

卮言曰一統志今南直隸宿州古宿國

須句

春秋僖公二十年冬公伐邾二十二年春公伐邾取須句

左傳任宿須句顓頊風姓也邑於濟上寔司太昊與有濟之祀  
以服事諸夏二十年邾人滅須句須句子來奔因成風也成風  
爲之言僖公曰崇明祀保小寡周禮也蠻夷猾夏周禍也若封  
須句是崇皞濟而脩祀紓禍也二十二年伐邾取須句及其君  
焉禮也

胡傳按左氏云云固得崇祀保小之禮何以書取乎不請於王  
命而專爲母家報怨擅取人國而及其君是以亂易亂非所以  
爲禮也與收奪者無異

路史曰須句僖公母成風國也一作胸地志胸城在壽昌西北  
今須城西北須胸故城者京相璠云須胸一國二城兩名非也  
蓋鄆歸須城而胸猶是故所

羅氏論曰嗚呼以成風一婦人不出戶庭猶存繼絕之心豈惟  
先王之澤哉蓋人情所同然者不可易也且伏羲去周幾年矣  
而猶國焉欲世之不厚不可得矣

陳氏曰春秋嚴義利之辨苟以爲利一以取書之是故邾滅須  
句須句子來奔伐邾取須句反其君焉書取須句莒不撫鄆鄆  
叛而來書取鄆

廬陵李氏曰取須句之事恐諸家信左氏太過須句子既來奔魯史何得不書滅耶故劉氏以爲無此年滅須句及來奔事亦無及其君事直是須句久爲邾滅取其國爲邑魯人往伐取無他也

卮言曰按一統志今山東樂平州有須城

鄆

杜氏曰城陽姑幕縣南有員亭員卽鄆也

路史曰鄆風姓一曰員按太康地記有東西二鄆西鄆魯公所居今濟之鄆城舊云莒附庸以昭公元年傳言季武子伐莒取鄆誤之經二十五年齊人取鄆而居昭公不附莒也莒何得附庸東鄆卽須城文公十二年城鄆與成公九年楚人入鄆一曰員在今沂州沂水有員亭卽鄆亭寰宇以此爲莒魯所爭亦非

廬陵李氏曰文十二年城鄆成公九年楚人入鄆襄十二年季孫宿入鄆至昭元年取鄆二十五年齊侯取鄆以居公二十九年鄆潰此東鄆也其成四年城鄆乃西鄆也

顓頊

論語季氏將伐顓頊冉有季路問於孔子子曰求亾乃爾是過歟夫顓頊昔者先王以爲東蒙主且在邦域之中矣是社稷之臣也何以伐爲冉有曰今夫顓頊固而近於費今不取後世必爲子孫憂子曰丘也聞有國有家者不患寡而患不均不患貧而患不安羅氏論曰列土分茅自有民始矣秦失其猷而後世弗復知封建之有大便於君民也季氏將伐顓頊孔子責冉求曰國家不



患寡貧患不均安讀至此泫然曰帝王之後世祚衍天下至數  
千百年澤未艾也而魯一顓頊冉氏不能容之顧不謂大哀乎  
嗟乎號之不愛則其於虞也何有聖人之見豈同俗所知哉社  
稷之臣山川之神主也亾故而伐之且猶不可况易之乎先王  
盛時諸父諸舅星分棋布於神州之內原原而來接之以禮是  
故秉旄奉幣夾輔尊獎不啻子弟之衛父兄手足之捍頭目者  
惟是周旋揖異豈不休哉

卮言曰一統志云今山東費縣有顓頊故城

巴

山海經曰西南有巴國太皞生咸鳥咸鳥生乘釐乘釐生後照後  
照是始爲巴人

路史曰伏羲生咸鳥咸鳥生乘釐是司水土生后炤后炤生顧  
降處于巴是生巴人所謂巴賔豈漢者今巴縣是後武王封宗姬  
支庶于巴曰巴子其後僭號秦惠虜之

閬

路史曰閬通皆巴之邑郡

黔

路史曰巴滅巴子五季流於黔而君之生黑穴四姓

樊暉相鄭

酉 辰 巫 武 沅

世本曰巴郡南郡蠻本有五姓

路史曰酉辰巫武沅五州皆巴後分王黔中者

廩

路史曰赤狄巴氏臣服四姓居夷城爲廩君世尚秦女

郝

路史曰太昊之弟郝骨氏爲帝立制其裔孫子期帝乙封之太原之郝今太原有郝鄉一云右扶風盩厔鄉也帝乙時有子期因封之曰郝云

神農後國章

伊

路史曰伊炎帝本國堯之母家伊侯國後有伊尹洛之伊陽縣有伊水

者

尚書西伯既戡黎祖伊恐奔告於王

羅氏曰自伊徙者故曰伊者猶陶唐殷商然一曰隹黎也故大傳作西伯戡者史記言文王伐隹音祈或以爲黎也一曰飢字書旰訛

厲

春秋僖公十五年齊師曹師伐厲

杜氏曰厲楚與國在義陽隋縣北有厲鄉

張氏曰兵法攻所必救厲在徐楚之間齊伐厲欲楚之必救以解徐也然後此楚敗徐於婁林則厲在所不必救明年不克救徐而還况同盟不同心而宋已伐曹矣

路史曰厲炎帝潛邦一曰列通爲賴然厲賴異

卮言曰按志今湖廣隋州有厲鄉

封

通典曰封丘古封國也地在開封

路史曰炎帝器生鉅爲黃帝師胙土命氏而爲封鉅夏有封父封文侯至周失國今開封有封父亭封丘臺卽封父國

逢

路史曰炎帝器生鉅及伯陵伯陵爲黃帝臣封於  
穆天子傳逢公其後也今開封蓬池一曰逢澤竹書紀年梁惠王發逢忌之藪以賜民者字當音龐

竹書周穆王十二年毛公班逢公固帥師從王伐犬戎

穆天子傳天子西征入於曹奴之人獻食馬糝米天子使逢固受之

又曰天子筮獵莘澤其卦遇訟逢公占之曰訟之繇數澤蒼蒼其中宜其正公戎事則從祭祀則熹田獵則獲天子飲逢公酒賜之駿馬十六締紵三十篋逢公再拜稽首

北齊

周語伶州鳩曰我姬氏出自天鼃及析木者有建星及牽牛焉則我皇妣太姜之姪伯陵之後逢公之所馮神也

註曰天鼃齊之分野也析木日辰所在也建星在牽牛間謂從辰星所在天鼃之首至析木之分歷建及牽牛皆水宿言得水類也太姜太王之妃伯陵太姜之祖逢伯陵也逢公伯陵之後爲殷諸侯封於齊地屬天鼃故祀天鼃祀而配食爲其神主馮依也

路史曰伯陵太姜之祖逢公伯陵之後爲商侯伯自逢改封於齊地故山海經有北齊之國姜姓是知伯陵是也故周語云天鼃之分伯陵之後逢公之所憑神而說者謂爲夏諸侯非也蓋因晏子序爽鳩在其前耳太常禮書以伯陵爲伏羲孫高裔碑以爲顓帝之苗俱失之矣

矣

山海經曰炎帝之孫伯陵同吳權之妻阿女緣婦緣婦孕三年是

生鼓延爰始爲鍾

路史伯陵生三子曰爰曰鼓曰延爰戕臣堯傳作朱戕

路史曰爰戕國齊地一曰冒澤卽朱故亦作朱戕

書舜典帝曰垂汝共工垂拜稽首讓於爰新暨伯與

呂

國語太子晉曰共工從孫四岳佐禹帝昨四岳國命爲侯伯賜姓曰姜氏曰有呂謂其能爲禹股肱心膂以養物豐民人也

韋注曰堯以四岳佐禹有功封於呂呂之爲言膂也

史記齊世家曰四岳佐禹平水土有功虞夏之際封於呂或封於申

竹書穆王五十一年作呂刑命甫侯於豐

書呂刑曰惟呂命王享國百年耄荒度作刑以詰四方

集傳呂侯爲天子司寇穆王命訓刑以詰四方史錄爲篇

唐孔氏曰書傳引此篇語多稱甫刑者呂侯子孫後改封甫如詩之生甫及申不與我戍甫穆王時未有甫名後人以子孫國號名之追稱甫刑若叔虞封唐子孫封晉而史記作晉世家亦

如荆楚殷商其實一也

詩大雅曰崧高維岳駿極於天維嶽降神生甫及申

集註甫甫侯也卽穆王時作甫侯者或曰此是宣王時人而作  
呂刑者之子孫也

東萊呂氏曰甫申意者皆先王時賢也侯同有功於民乃遠取  
甫侯殆非也

詩王風揚之水曰揚之水不流束楚彼其之子不與我戍甫

集註甫卽呂也書呂刑禮記作甫刑孔氏以呂侯後爲甫侯是  
也當時蓋以申故而并戍之今未知其國之所在計亦不遠於

申許也

路史曰炎帝器生祝庸祀庸爲黃帝司徒居於江水生術鬻兒首

方顛是襲土壤生條及句龍句龍爲后上能平九州是以社祀生

垂垂爲堯工生噎鳴是爲伯夷伯夷爲虞秩宗封呂生太嶽襲呂

杜預謂在南陽宛西而太公乃出東呂呂莒也在密之莒縣霍邑亦曰

呂唐初爲呂州圖經以新蔡爲古呂國蓋後來之呂近申在周亦

曰甫一作郚呂侯爲穆王司寇訓夏贖刑春秋初入於楚

竹書夷王二年蜀人呂人來獻瓊玉

卮言曰申呂二國諸書多並言之詩云生甫及申國語史伯云申

呂方強是也申後入楚爲縣而呂不可考矣按志今河南新蔡縣

古呂國

申

竹書周孝王元年命申侯伐西戎宣王七年王錫申伯命

詩大雅曰維嶽降神生甫及甲維申及甫維周之翰

集註宣王之舅申伯出封於謝而尹吉甫作詩以送之申伯之先神農之後爲唐虞四嶽總領方岳諸侯而奉嶽神之祭能修其職嶽神享之故此詩推本申伯之所以生以爲嶽降神而爲之也

二章曰疊疊申伯王績之事於邑於謝南國是式王命召伯定申伯之宅登是南邦是執其功

曹氏曰漢地理志南陽宛縣有申伯國棘陽縣東北百里有謝城其地蓋相近申伯先封於申宣王使紹封於謝也

廬陵彭氏曰申伯之先已爲諸侯故王使繼其事而邑於謝式於南邦此加他進爵之賞也

三山李氏曰申侯爵以其爲方伯故謂之申伯

三章曰王命申伯式是南邦因是謝人以作爾庸王命召伯徹申伯土田王命傅御遷其私人

集註徹定其疆界正其賦稅也傅御申伯家臣之長也私人家人遷使就國也漢明帝送侯印與東平王蒼諸子而以手詔賜其國中傳蓋古制如此

七章曰申伯番番旣入於謝徒御嘽嘽周邦咸喜戎有良翰不顯申伯王之元舅文武是憲

史記初幽王娶申侯女爲后生太子宜臼後得褒姒愛之生子伯服竟廢申后及太子以褒姒爲后伯服爲太子宜臼奔申申侯怒與繒西夷大戎攻幽王遂殺幽王驪山下於是諸侯乃卽申侯而

共立故太子宜曰是爲平王

國語史伯曰王欲殺太子以成伯服必求之申申人弗畀必伐之若伐申而繒與西戎會以伐周周不守矣繒與西戎方將德申申呂方強其隩愛太子亦必可知也王師若在其救之亦必然矣王心怒矣虢公從矣凡周存亾不三稔矣

竹書幽王三年王嬖褒姒五年王世子宜曰出奔申侯聘西戎及鄆十年王師敗於申十一年申人鄆人及犬戎入宗周弑王申侯魯侯許男鄭子立宜曰於申

詩王風曰揚之水不流束薪彼其之子不與我戍申

集註申姜姓之國平王之母家也平王以申國近楚數被侵伐故遣畿內之民戍之

孔氏曰言戍甫戍許者以其俱爲姜姓旣重章以變文因借甫許以言申其實不戍甫許也六國秦趙同爲嬴姓史記漢書多謂秦爲趙亦此類也

左傳莊公六年楚文王卽位與巴人伐申三十年楚申公鬬班殺楚公子元

春秋僖公七年夏鄭殺其大夫申侯

僖公四年諸侯盟於召陵陳轅濤塗謂鄭申侯曰師出於陳鄭之間國必甚病若出於東方觀兵於東夷循海而歸其可也申侯曰善濤塗以告齊侯許之申侯見曰師老矣若出於東方而遇敵懼不可因也若出於陳鄭之間共其資糧屣屨其可也齊侯說與之虎牢

鄭邑今泥水縣執轅濤塗諸侯伐陳陳成歸轅濤塗濤

塗怨申侯之反已故勸之城其賜邑曰美城之大名也子孫不  
忘吾助子請乃爲之請於諸侯而城之美遂譖諸鄭伯曰美城  
其賜邑將以叛也申侯由是得罪七年鄭殺申侯以說於齊  
初申侯申出也有寵於楚文王文王將死與之璧使行曰惟我  
知女專利而不厭予取予求不女疵瑕也後之人將求多於女  
女必不免我死女必速行無適小國將不女容焉既葬出奔鄭  
又有寵於厲公子聞其死也曰知臣莫若君弗可改也已  
杜氏曰申本國名而臣於楚故以國爲氏侯名也或云申女所  
生蓋楚甥也

路史曰周初封太嶽後於申暨申伯入謝而楚蝕其壤今信陽軍  
之方城內也唐申州之南陽漢之宛縣

通考曰按申伯爲蕃翰於宣王之時及幽王廢申后而申侯召犬  
戎伐周弑王以世考之申侯卽申伯子也平王東遷王室微弱方  
且遣兵戍申以召譏刺蓋申侯忘父之忠而召戎以禍王室平王  
復忘父之讐而勒兵以戍母家皆非善繼志之孝子也楚滅申春  
秋無明文然僖二十五年楚以申息之師戍商密其時息已亾則  
所謂申息皆楚邑也申滅於楚可知

楚滅申使鬬班尹之爲申  
公又申侯爲鄭大夫詳前

謝

路史曰申伯封謝荊州記棘陽東北謝城是有謝水

棘陽城在唐  
之湖陽西北

紀

史記周夷王時紀侯譖齊哀公於周周烹哀公

左傳隱公元年紀人伐夷



春秋隱公二年秋九月紀履緌來逆女冬十月伯姬歸於紀

左傳卿為君逆也

公羊傳紀履緌者何紀大夫也向以不稱母母不通也外逆女不書此何以書譏爾何以譏譏始不親迎也

紀子伯莒子盟於密

程子曰闕文也當云紀侯某伯莒於盟於密左氏附會作帛杜預以為裂繻之字春秋無大夫在諸侯上者公穀皆作伯

廬陵李氏曰程子紀子伯之說胡氏因之然紀本非子爵則程說亦未至恐子上猶有闕字也臨川吳氏曰子伯二字或是侯字之誤

桓公二年秋七月紀侯來朝

公穀傳皆作紀

程子曰凡杞稱侯者皆當為紀杞爵非侯文誤也及紀侯大去其國之後杞不復稱侯矣

汪氏曰或以紀侯朝弑君之桓不貶從滕子之同同然穀鄧邾葛牟不貶從同同之例蓋聖人憫紀之小弱傷其無所赴愬而求援於姻國故原情以恕其罪也何休范甯以紀為進爵則亦未知隱二年杞子之為闕文耳

三年夏六月公會杞侯於郕

張氏曰紀與魯親而求援於魯以抗齊鄭故桓公因其來朝與之會也

五年夏齊侯鄭伯如紀

胡傳按左氏齊鄭朝紀欲以襲之紀人知之夫如者朝詞也尊

不朝乎卑大不朝乎小紀之爲紀微乎微者也齊在東州尊則方伯鄭亦大國也並驅而朝紀乃懷詐諉之謀欲以襲之而不虞紀人之覺也其志憖矣

廬陵李氏曰春秋之初齊僖鄭莊皆小人之雄合謀以同心吞噬小國爲事自二君如紀之後紀百計求援六年會於郕其冬來朝謀於魯也深矣九年季姜歸京師托於周也至矣十一年鄭莊卒齊鄭之黨方散故十三年紀侯歸魯鄭而僥倖於一勝然怨愈構矣十四年齊僖卒襄公立十七年於黃之盟魯欲平二國也而襄公方襲小伯之獎豈顧一盟而棄先業哉故莊元年而遷三邑矣三年而紀季以鄆入齊矣齊魯方盛鄭乃棄紀而爲垂之遇矣

六年夏四月公會紀侯於郕冬紀侯來朝

左傳會於郕紀來諮謀齊難也冬來朝請王命以求成于齊公

告不能

紀微弱不能自通於天子欲因公以請王命公無寵於王故告不能

九年春紀季姜歸於京師

十二年夏六月公會杞侯莒子盟於曲池

程子曰杞侯皆當作紀隱二年紀莒盟於密是時紀謀齊難故魯桓與之盟莒以援之耳

十三年春二月公會紀侯鄭伯已巳及齊侯宋公衛侯燕人戰齊師宋師衛師燕師敗績

胡傳齊紀者世讐也齊人合三國以攻紀魯鄭援紀而與戰戰而不地於紀也齊爲無道恃強凌弱此以紀爲主何也紀人不

度德不量力不徵詞輕與齊戰而爲之援者弒君篡國之人也  
不能保其國自此戰始矣春秋以紀爲主省德相時自治之意  
也

十七年春正月丙辰公會齊侯紀侯盟於黃

汪氏曰紀魯之與國而衛朔在齊故欲納朔而魯欲平紀也然  
二年之後齊遂遷紀六年之後魯卒會齊納朔則非紀之削弱  
盟不足恃而齊魯之強弱亦具見矣

莊公元年冬十月齊師遷紀邾鄆

胡傳邾鄆邾者紀三邑也邑不言遷遷不言師其以師遷之者  
見紀氏猶足與守而齊人強暴用大衆以迫之爲已屬也

張氏曰穀梁云紀國也邾鄆邾國也或曰遷紀於邾鄆邾按下  
有紀侯大去其國則此時未遷故知是紀之三邑

劉氏曰齊一師必不能並遷兩國取二取防猶分別言之况兩  
國乎

卮言曰此傳穀梁兩說俱可通三邑之說竊恐未然外取邑不  
書此何以書且紀已將亾何必遷其三邑乎遷宿遷陽皆不稱  
師而此曰師者則以並遷之故三小國不能當一大邑以齊之  
強何難爲之取邾取防則內事耳諸儒之義猶未洽也

三  
年秋紀季以鄆入於齊

公羊傳紀季者何紀侯之弟也何以不名賢也何賢乎紀季服  
罪也其服罪季何魯子曰請後五廟以存姑姊妹

穀梁傳鄆紀之邑也入於齊者以鄆事齊也入者內弗受也

杜氏曰齊欲滅紀故季以邑入齊爲附庸先祀不廢故書字貴之鄫紀邑在齊國東安平縣

陳氏曰紀侯在而季以鄫入齊若以邑叛其稱字紀侯意也齊襄自桓始年挾鄭以圖紀黃之會魯爲之求成不得免焉遷邾鄆鄆紀之不絕也如綫季以鄫入齊紀於是乎始判是分國以與之也齊人所欲者吾土也苟可以免祀是紀侯意也故稱字四年夏紀侯大去其國

左傳紀侯不能下齊以與紀季夏紀侯大去其國違齊難也公羊傳大去者何齊滅之不言滅者爲襄公諱故也春秋爲賢者諱何賢乎襄公復讐也何讐爾遠祖也哀公烹乎周紀侯諱之遠祖者幾世乎九世矣九世猶可以復讐乎雖百世可也

穀梁傳鄫紀之邑也大去者不遺一人之辭也紀侯賢而齊侯滅之不言滅者不使小人加乎君子

胡傳聖人與其不爭而去是以異於失地之君而不名不與其去而不存是故書叔姬歸鄫而不錄紀侯之卒明其爲君之也未卮言曰按紀地在今山東壽光縣

鄫

莊公三年秋紀季以鄫入於齊十三年春王正月紀叔姬歸於鄫何氏曰鄫不繫齊者時齊聽後五廟故國之

陳氏曰紀亡矣曷爲謂之紀叔姬存紀也國滅而後見者善辭也是故紀亡書紀叔姬陳亡書陳災

路史曰故穀城西有地曰鄫下續述征記安平有鄫亭安平齊廢

今隸臨苗

鄆

春秋莊公三十年秋七月齊人降鄆

公羊傳鄆者何紀之遺邑也降之者何取之也取之則曷爲不言取之爲桓公諱也外取邑不書此何以書盡也

胡傳鄆者紀之附庸微乎微者也齊人不道肆其強力脅使降附不書鄆降而曰降鄆者以齊之強故罪之深以鄆之微故責之薄

啖氏曰公穀云鄆紀之遺邑按鄆自是小國爾紀之全國猶不敢敵齊豈一邑之民而能二十年餘年獨拒齊乎

杜氏曰鄆紀附庸國東平無鹽縣東北有紀鄆城

路史曰今懷仁東北有紀鄆城莊公之三十年齊人降鄆高赤俱云紀邑在密然時紀亾二十年矣故啖子攻之

向

春秋隱公二年夏莒人入向

左傳莒子娶於向向姜不安莒而歸夏莒人入向以姜氏還

臨川吳氏曰向姜姓小國炎帝之後

汪氏曰穀梁以向爲我邑然不書伐我則非我邑也據後書公伐莒取向則向爲小國而莒滅之耳

又宣公四年春公及齊侯平莒及郟莒人不肯公伐莒取向

路史曰河陽西北有向城故紀年曰鄭侯歸晉陽向十三州志云軹縣南山西曲有故向城卽周之向國然世以爲承之向乃

莒邑宣四年伐莒取向者是非姜國也蓋因傳姜不安莒而以爲近莒耳

邑言曰按志今山東莒州南有向城路史謂向國在軹縣則今之懷慶府濟源縣

州 舟

春秋桓公五年甲戌冬州公如曹

左傳淳于公如曹度其國危遂不復

杜氏曰淳于州國所都城陽淳于縣近莒

程子曰州公嘗爲王三公故稱公不能保其國去如曹遂不復

臨川吳氏曰此人君之失國者與紀侯大去其國同但州公之

去國有所如紀侯之去國無所如爾凡國君去如他國皆朝也

蓋其國危公將寄託於曹假朝禮以行實則奔也

羅氏曰王之三公稱公云寰內侯者非也左氏爲卽淳于

張氏曰州稱公與祭公同則州必畿內之地河內州縣也左氏

乃云淳于公杜注城陽淳于縣州國所都昭元年傳云城淳于

或云因州公不反國爲杞所并遂以淳于爲都

輿地廣記曰高密夷安城淳于本春秋州國也

卮言曰按一統志今湖廣監利縣

六年春正月寔來

左傳自曹來朝書曰寔來不復其國也

公羊傳寔來者何猶曰是人來也孰謂謂州公也

程子曰五年冬如曹尚爲君也故以諸侯書之今不能反國則匹夫也故名之來來魯也忽稱鄭忽明其正也寔不稱州以其國也

胡傳寔者州公名也春秋之法諸侯不生名失地滅同姓則名或曰諸侯失國而後託於諸侯孟子以爲禮也今州公來朝將以諸侯之禮接之乎則春秋乃書其名將以匹夫之賤畜之乎孟子乃以託國爲禮將何處而可曰諸侯有壤地褊小迫乎大國之間而失國是不幸焉非其罪也則以諸侯之禮接之可也若譚子在莒弦子在黃溫子在衛雖失國出奔而春秋不名義可見矣若夫自取滅亡如蔡獻舞邾益曹陽州寔之徒則待之以初乃禮之過也觀春秋名與不名則知所以處寓公之禮與強爲善及自暴棄者之觀戒矣

淳于

路史曰淳于故城在高密之安丘東北故淳于縣屬北海酈元云本夏之斟灌國武王以封淳于公杞併之遂遷江南預云華容今監利也

卮言曰左傳以淳于卽州而路史爲二疑州公不反國并于杞遂遷淳于之說爲是或淳于又爲杞所并而復遷也

駘

路史曰昔者帝嚳取於有駘氏曰姜嫄生后稷而后稷之封亦曰駘說者咸謂帝堯以其母國封之然及太王復取於有駘氏曰太姜是姜姓之駘至周猶在豈得云以是而封稷哉乃不知稷封之

駘在於武功而姜姓之駘在於琅邪固不同也前事之缺失可勝  
悼哉今沂之費縣南故駘亭地接齊邾故越使魯還邾田封境至  
于駘上泊泉公時齊亂景公子荼遷于駘

怡

路史曰怡一曰墨怡亦作台禹有天下封怡以紹列山是爲默台  
成湯之初析之今支是爲孤竹

孤竹

路史曰伯夷叔齊父孤竹君國今盧龍東有古孤竹城秦之離支  
縣漢令支也營州皆其地

戲

路史曰酈山之北水名戲今新豐有戲亭幽王歿焉或云幽褒戲  
此而名安也

甘

路史曰甘盤國

薄

路史曰拱之考城東北有薄城漢縣屬山陽本宋地

小顛

路史曰參盧命蚩尤邑於小顛卽今安邑有蚩尤城

詳前帝王  
門蚩尤章

黑齒

山海經曰黑齒之國帝俊在其中

阪泉

路史曰阪泉氏姜姓其後蚩尤彊伯



氏

山海經曰炎帝生伯陵伯陵生鼓鼓生靈恣靈恣生氏人爲氏國  
氏人能上下於天

玄氏

山海經曰伯夷父生西岳西岳生先龍先龍始生氏羗氏羗乞姓  
路史曰秦嶽生先龍先龍生玄氏玄氏乞姓羗也蓋岐隴而南漢  
川以西皆氏云湯革夏伐氏氏人來朝其別爲青白螭之三氏氏  
羗數十白馬最大今文鳳一竟白馬氏者居仇池曰氏侯

赤狄

路史曰赤狄隗姓故山黨地

路

春秋宣公十五年六月癸卯晉師滅赤狄潞氏以潞子嬰兒歸

左傳潞子嬰兒之夫人晉景公之姊也酆舒爲政而殺之又傷  
潞子之目晉侯伐之六月癸卯晉荀林父敗狄赤狄於曲梁  
辛亥滅潞酆舒奔衛

公羊傳潞何以稱子潞子之爲善也躬足以匹爾雖然君子不  
可不記也離於夷狄而未能合於中國晉師伐之中國不救狄  
人不有是以匹也

穀梁傳滅國有三術中國謹日卑國月夷狄不日其日潞子賢  
之也

胡傳滅而舉號及氏者滅見滅之罪著滅者之甚不仁也潞嬰  
兒不歿社稷比於中國而書爵者免嬰兒之責詞也

劉氏曰公羊之說非也夷狄之君稱周禮也非爲善而亾也益迷於有爵爾穀梁之說亦非也豈有國滅身虜而得爲賢哉路史曰炎帝參盧禮於黃帝黃帝封參盧於路一作露亦作潞始封在茶陵商周間衍於河東北春秋之潞子都曲梁卽雞澤也齊邑亦有潞一云土軍縣今有地曰露漢之東露而幽之潞縣亦有潞水知後代之承襲猶殷商楚郢所至以爲名也路之別爲赤白之狄狄歷虜咎皐皐落九州之戎

卮言曰按一統志今山西潞州古潞子國

甲氏 留吁

宣公十六年春王正月晉人滅赤狄甲氏及留吁

胡傳按左氏董是役者士會也甲氏潞之餘種留吁其殘邑也春秋於夷狄攘斥之不使亂中夏則止矣必欲盡珍滅之無遺種此士會所以貶而稱人也

羅氏曰甲氏留吁赤狄別種春秋書曰師曰人晉固罪矣然在春秋戎狄舉號君臣同辭固未得以名氏爵號書也今書其國又書其氏又列其名爵又別其種族經之文始異於是若三傳說爲賢之者其果然耶潞氏甲氏蓋亦先王之世漸流於狄而非狄之出也既有爵邑有名號則其爲書固不得而略矣夫伐國者討其罪人斯已矣潞子之夫人晉景公之姊也據傳之說豐舒爲政殺之則豐舒者罪矣晉之致伐則執豐舒僂之立黎侯安潞子紀其政而還則諸戎至矣而顧滅其國執其君哉踵是以降伐虜咎如敗狄於交剛於太原一皆晉人有以見晉之

不能仁義禦於爲奪易絕人之世也三五而來未聞有賢狄也

狄歷

後爲勅勒

麇咎

阜落在潞

卮言曰路史以狄歷麇咎如阜落爲赤狄之種隗姓要之皆羣狄也詳後戎狄章不系於此

姜戎

史記宣王三十九年戰於千畝王師敗績於姜氏之戎

索隱曰千畝地名在西河介休縣姜戎西夷別種四嶽之後也春秋僖公三十三年夏四月辛巳晉人及姜戎敗秦師於殽

左傳晉文公卒秦師滅滑晉先軫遂發命遽興姜戎子墨衰絰四月辛巳敗秦師於殽

公羊傳具言及姜戎何姜戎微也稱人亦微者何言乎姜戎之微先軫也或曰襄公親之襄公親之則其稱人何貶曷爲貶君在乎殯而用師危不得葬也

杜氏曰姜戎姜姓之戎居晉南鄙戎子駒支之先也

左傳襄公十四年諸侯會於向將執戎子駒支范宣子親數諸朝曰來姜戎氏昔秦人迫逐乃祖吾離於瓜州吾離被苦蓋蒙

荆棘以來歸我先君先君惠公有不腆之田與汝剖分而食之今諸侯之事我寡君不知昔者蓋言語漏泄則職汝之由詰朝之事爾無與焉與將執爾對曰昔秦人負恃其衆貪我土地

逐我諸戎惠公蠲其大德謂我諸戎是四嶽之裔胄也

毋是翦棄賜我南鄙之田狐狸所居豺狼所嗥我諸戎除翦其荆棘驅其狐狸豺狼以爲先君不侵不叛之臣至於今不貳昔文公

與秦伐鄭秦入竊與鄭盟而舍戍焉於是乎有殺之師晉禦其上戎亢其下秦師不復我諸戎實然自是以來晉之百役與我諸戎相繼於時以從執政猶般志也豈敢離邊今官之師旅無乃實有所闕以携諸侯而罪我諸戎我諸戎飲食衣服不與華同贄幣不通言語不達何惡之能爲不與於會亦無曹焉賦青蠅而退宣子辭焉使卽事於會成豈悌也

羅氏曰王符云炎帝後姜戎伊洛陸渾也左傳戎子駒支所謂諸戎楊柘泉臯伊洛陸渾之戎皆是也與允姓陰戎各別平王之末渭首有狄獯邽冀之戎涇北有義渠洛川有大荔戎渭南有驪戎潁首有蠻氏戎洛川有大荔戎伊洛有楊柘泉臯之戎義渠大荔驪戎爲少昊後他皆姜姓鄭樵猶以九州戎爲陰戎駒支居魯

南鄙踈矣

楊柘 泉臯 伊洛之戎

左傳僖公十一年夏楊柘泉臯伊雒之戎同伐京師入王城焚東門王子帶召之也秦晉伐戎以救周秋晉侯平戎於王

陸渾

左傳僖公二十二年傳曰初平王之東遷也辛有適伊川見被髮而祭於野者曰不及百年此其戎乎其禮先亾矣秋秦晉遷陸渾之戎於伊川

春秋宣公三年春王正月楚子伐陸渾之戎

左傳楚子伐陸渾之戎遂至於雒觀兵於周疆

胡傳夷狄相攻不志此其志何也爲陸渾在王都之側戎夏雜

處族類之不分也楚又至洛觀兵於周彊問鼎之大小輕重焉故持書千策以謹之

杜氏曰允姓之戎居陸渾在秦晉西北僖二十二年秦晉遷之於伊川遂從戎號

羅氏曰左傳昭公元年周甘人與晉人爭閭田晉率陰戎伐潁王使詹桓伯曰先王居檣杭仁四裔以禦螭魅故允姓之姦居於瓜州惠公歸自秦而誘以來使偪我諸姬入我郊甸則戎焉取之戎有中國誰之咎也此即姜戎非允戎也

卮言曰按一統志今河南嵩縣古陸渾氏昭公十七年八月晉荀吳帥師滅陸渾之戎

左傳晉侯使屠蒯如周請有事於維與三塗襄弘謂劉子圍客

容猛非祭也其伐戎乎陸渾氏甚睦於楚必是故也君其備之乃警戎備九月丁卯晉荀吳涉自棘津使祭史先用牲于維陸渾久弗知師從之庚午遂滅陸渾數之以其貳於楚也陸渾子奔楚其衆奔甘塵周地周大獲宣子慶文公攜荀吳而授之陸渾故使穆子帥師獻俘于文宮

胡傳林父之於潞氏士會之於甲氏荀吳之於陸渾戎皆滅之也而林父士會稱師稱人荀吳舉其名氏何哉夷不亂華陸渾之戎密邇王室而縱之雜處則非膺戎狄別內外之義也與闢土服遠以圖強霸則異矣然舉其名氏非褒詞也纔得無貶耳則窮兵於遠虛內事外者可知矣

汪氏曰戎居諸夏之區固中國之大害也晉武不能徙戎卒至

於神州陸沉則中行穆子之滅陸渾疑可褒矣然陸渾之戎涉  
居秦晉之西北在荒服之外自晉與秦遷之於伊川侵逼土幾  
則是晉人始謀不臧之過也今也與楚爭強掩其不備而滅之  
蓋不足以贖前過矣奚可褒之有哉

學海君道部卷之二十八

世系類

二十

列國譜系

九

古國篇

二

黃帝後國章

熊

路史曰黃帝開國于熊今之新鄭輿地記云古有熊國黃帝所都

云都非乃  
帝之開國

壽丘

史記曰黃帝生于壽丘

陳

路史曰黃帝都陳今鳳翔寶雞故陳倉有陳山非宛丘

昌

路史曰黃帝子昌意始封于昌然任後自有昌黃帝臣又有昌若  
宜昌邑其東昌故縣近滹沱河有昌亭西昌縣春秋昌間多在河

東北

若水

路史曰黃帝元妃西陵氏生昌意玄囂龍苗三人昌意遜居若水  
今越嶲之臺登盟會圖疏以為郡故世本云允姓國昌意降居為  
侯非也

詳帝王曆系  
高陽氏世章

江水

路史曰玄囂降居江水若之下流泝水也

卞

路史曰龍苗生吾融吾融生下明封于卞為卞氏湯代有卞隨或  
云卽弁以說文字林大小篆無卞非也今泗水縣有卞故城漢屬

魯國

清

路史曰黃帝次妃方壘氏生休及清休繼黃帝為帝鴻氏清封于  
清為紀姓是生少昊一曰青陽按清有四一在鄆隱公四年遇于  
清者一在濮宣十二年晉宋盟清丘者一在并解宣十三年赤狄  
代晉及清者一在樂平成十七年國勝待命于清者

詳帝王曆系  
少昊氏世章

張

路史曰黃帝次妃彤魚氏生揮及夷彭揮次十五主造弧矢及司



率呂受封於張陳子昂張氏銘云軒轅錫胤弧矢崇威是也然黃帝臣自有張若故河東解有張陽城漢之東張今邢之任縣是紀年齊師逐鄭太子齒奔城張陽南鄭是也

紀

路史曰紀劇要爲二國故寰宇記古紀城在壽光南又有劇南城云故紀國鄭樵云紀後遷劇所謂胸劇云紀劇聲訛非也

采

路史曰夷彭子紀姓始封於采故左人地今中山之北平王符以采任姓非也

蒼林

路史曰黃帝次妃嫫母生蒼林禺陽蒼林姬姓

國語晉胥臣曰黃帝之子二十五人其同姓者二人而已惟青陽與夷彭爲己姓其同生而異姓者四母之子別爲十二姓凡黃帝之子二十五宗其得姓者十四人爲十二姓姬酉祈已滕箴任苟僖姑偃依是也唯青陽與蒼林氏同於黃帝故皆爲姬姓

羅氏曰古書大概可盾然不容無繆國語言青陽與夷彭同爲紀姓是矣而又云青陽與蒼林爲姬姓則非也夫姬姓乃玄囂而非青陽黃帝之子二十五人其十二人爲十一姓餘十三人皆姬也今乃云惟二人同於黃帝者爲姬姓其可信耶且昌意玄囂蒼林揮皆姬姓者豈惟二人哉

羅氏曰舜受禪水土平伯禹於是邳成五服至於五千四海會同爰申錫其土姓以立其國姓以立其宗土姓錫而宗國定矣公侯

百里伯七十里子男五十里所以立國雖斷密雖滕箴祈西釐到  
儼依此所以立宗也國立而後氓人有所依宗立而後族姓有所  
繫人有所依斯有以君之族有所繫斯有以宗之是故公劉遷邠  
有爲致力朝廷而君之者有爲致力宗廟而宗之者本於土姓之  
有所錫也傳曰天子建德因生以賜姓胙之土而命之氏胙之土  
錫土也命之氏錫姓也契封之商稷與郟此錫土也賜之子與姬  
此錫姓也方水土未平諸侯固各有國土百官亦各有族姓矣必  
九州攸同而後錫之者前乎此惟有所不普至是而後得以錫之  
偏爾

釐

路史曰釐僖也齊國釐城爲來音簡王時舒庸人道吳圍巢及釐

任

路史曰黃帝之子禹陽最少受封於任爲任姓今邢之任縣

禹

山海經曰黃帝生禹鯀禹鯀生禹京禹京處北海禹鯀處東海是

惟海神

又曰帝俊生禹號禹號滎梁滎梁生番禺是始爲舟番禺生奚仲  
奚仲生吉光吉光是始以木爲車

路史曰禹卽番禺一作遇王符作卑過訛禹陽是爲禹號生禹京  
僮梁僮人京居北海號處南海僮梁生番禺今清河之屬縣有禹  
山此卽禹也番禺是始爲舟生奚仲奚仲生吉光是主爲車建侯  
於薛或云禹湯十二世生奚仲姓纂黃帝子弟十二人以薛爲姓

一爲任氏六世生奚仲俱非也奚仲十二世仲虺爲湯左相始分  
任大戊時臣扈武丁時祖已皆國薛祖已七世成遷爲摯有女歸  
周是曰太任誕生文王武王克殷封其後薛仲爲薛侯

奚

路史曰今滕之東南有奚公山

邳

路史曰今淮之邳州有仲虺祠

摯

詩大雅大明曰摯仲氏任自彼殷商來嫁於周  
國語史蘇曰摯疇之國由太任

賈注曰摯疇二國奚仲仲虺之後太任之家

唐世系表曰祖已七世孫曰成徙國於摯

疇

謝

路史曰謝本任國周滅之以封申伯

章

路史曰章任姓周始以封太公支子

舒

路史曰春秋之畱舒亦曰柳舒

洛

竹書夏帝癸二十一年商師征有洛克之

路史曰周書有洛氏或作給

終

路史曰謝章舒洛昌剡終泉卑遇皆任分也終為夏太史終古國後歸商

泉

卑

儋人

牛黎

邳

路史曰邳卽佶一作吉風俗通云殷時侯國潛夫論云邳與姑同而字異周封女媧氏於南燕邳名世以潛夫為誤非也

南燕

左傳隱公五年鄭人侵衛衛人以燕師伐鄭鄭敗燕師於北制春秋桓公十二年秋七月公會宋公燕人盟於穀丘十三年春二月公會紀侯鄭伯及齊侯宋公燕人戰齊師宋師燕師敗績

左傳莊公十九年秋五大夫奉王子頹以伐王不克奔衛衛師燕師伐周立子頹二十年春鄭伯和王室不克執燕仲父

路史曰南燕媧姓伯儵封國石癸云吾聞媧姓后稷元妃又詩云蹶父孔武靡國不到為韓媧相攸莫如韓土此皆南燕媧姓也亦嘗曰東燕云

密湏

詩大雅曰密人不共敢拒大邦侵阮徂共王赫斯怒爰整其旅以遏徂莒

集註密密湏氏也媧姓之國在今寧州

左傳曰密湏之鼓與其大路文所以大蒐也

杜注曰密湏媧姓國文王伐之得其鼓路

國語史蘇曰密湏之亡由伯姑

呂氏春秋曰密湏之民自縛其主而與文王

括地志曰陰密故城在涇州鶉觚縣西東接縣城卽古密國

輿地廣記曰商時密國之地本鶉觚縣隋取文王伐密而民始附  
之意以靈臺名縣

路史曰密湏闕允蔡光敷偏離斷密雖皆姑分也密湏商世侯國  
文王伐之今涇之保定有陰密城

卮言曰按志今陝西靈臺縣古密湏地

密

路史又曰河南密縣東四十里有故密城唐爲密州與湏城比故  
說者謂卽密湏蓋亦號密湏云與安定姬姓之密別

雖

路史曰雖開封長垣近湏城是後爲衛邑詩云思湏與曹繇聲轉  
也

蔡

路史曰蔡媯姓國今蘄春廣濟縣是非姬姓之蔡

畧

路史曰畧媯姓國今汝之畧山縣非堯地

闕

路史曰鄆之壽張有關鄉而闕故城在中都闕亭又在湏阜東南

允

路史曰高陽氏允格或云少昊後

離

路史曰鄭莊公夫人離姑國今汴之離丘是

偃

路史曰晉襄公母偃姑國即偃陽

偃陽姁姓同

卮言曰春秋諸侯滅偃陽是晉悼公時事傳謂姁姓國也而晉襄公母有偃姑悼公去襄公未遠當是二國殊地而路史以為一處解在高陽後章亦未詳考

斷

路史曰斷即卷楚也世史作段誤

光

羅氏曰黃帝之子二十五人為姓十二姬釐俱帝而任姑二姓為有二十九國其它子姓固稱是也禮傳曰舜即位封黃帝之子孫十有九人為侯伯蓋不得攷矣

祈

路史曰祈斬也歐陽脩祁公銘以祁為黃帝之子所封非也祁少昊後祈黃帝後

酉

滕

路史曰今徐之西南十四里有故滕城古菑縣小邾國一作勝紀年越王朱句二十年滅滕是也春秋閔公二年共滕之民乃衛之下邑

箴

笥

路史曰笱作苟戰國有苟變程氏世譜以河內多杞氏非

僕路史云僕  
嬖同音暄

依

國語周史伯曰依疇歷莘皆鄆音後屬鄭韋昭云國名

滑

濟

路史曰滑濟二國名衆地博有不可得而考六

詹

潛夫論姓氏志曰詹資鄆翟黃帝之後也

左傳莊公二十年惠王取蔿國之圃以為囿而奪詹父田故蔿國

詹父子禽祝跪作亂五大夫奉子頹以伐王不克昭公九年周甘

人與晉爭閭田晉率陰戎伐頹王使詹桓伯辭於晉晉致閭田

后言曰詹之為國興廢莫攷惠王時有詹父景王時有詹桓伯皆

為周大夫

資

路史曰姓纂云益州資中今資州資陽有資川江然古資陽城在

簡之陽安而祁之無極有資河衛之北糾山潭之益陽有資水出

縣北流入資口即益水酈云即資水之殊目武岡又有資水出唐

或其派裔

鄆

路史曰潛夫論詹資鄆翟黃帝之後也故王篇云資鄆故國黃帝

後封在岐山之陽所謂周原膺膺者顧伯耶云昌意後止於夏商

翟

卮言曰翟之系多矣以其同名爲翟也故總系之四夷篇

剡

路史曰剡舊爲剡黃帝後國中絕武王克商封帝之裔於此始爲  
剡記皆爲

安息

路史曰昌意生三子長曰乾荒生帝顓頊次曰安季曰悃安處西  
上後曰安息

党

路史曰悃遷北土後爲党項

蠻人

山海經曰黃帝生苗龍苗龍生融吾融吾生弄明弄明生白犬白  
犬有牝牡是爲犬戎

路史曰卞明棄其守降之南裔生白犬是爲蠻人之祖湖南北桂  
林等處皆辰澧沅湘之間尤盛

羅氏曰有自辰沅來者云盧溪縣之西百八十里有武山焉其崇  
千仞遙望山半石洞鑄啓一石貌狗人立乎其傍是所謂槃瓠者  
今縣之西南三十有槃瓠祠棟宇宏壯信之天下有竒迹也予曰  
是黃閔武陵記所志者然實誕也曰然則所謂槃瓠者非歟曰非  
也何以言之予稽夏后氏之書知之也山海經云卞明生白犬是  
爲蠻人之祖卞明黃帝之曾孫也白犬者乃其子之名蓋若後世  
之烏虺犬子豹奴虎狔云者非狗犬也雖然世之誕妄厥有形影



其言之不典亦實自於經也按經又言下明生白犬白犬有二白相牝牡郭氏以為自相配合蓋若今之婆羅門半釋迦者而應劭遂以為高辛氏之犬名曰槃瓠妻帝之女乃生六男六女自相夫婦是為南蠻則知其說原衍於此是殆以白犬為犬爾至郭璞張華干寶范曄李延壽梁載言樂史等各自著書枝葉其說人以喜聽而事遂實矣且其說曰高辛氏募有得犬戎吳將軍首者黃金千鎰邑萬家妻以少女杜君卿固疑其誕謂黃金古以斤計至秦始皇曰鎰二也三代分土漢始分民古安得萬家之封二也將軍周末之官三也吳姓宜周始有四也佑之難亦當矣又引其獄中與諸甥詩證之然不知其說之不出乎曄也

吳姓古有之將軍官號諸甥詩證之然不知其說之不出乎曄也古亦有之但謂夷狄古無姓無夫人畜之交通世蓋每有昔元嘉中孟慧度之婢與犬通官可也

處者且逾年然高辛之事常竊誕之槃瓠者特獾狐之轉爾按玄中記槃瓠浮之東南海中是為犬封氏蓋因本風俗通然亦不謂蠻人之祖然則盧溪之祠君武山之像何彰耶曰見石西俯則以為惠遠點頭見石東僕則以為秦皇赴海木石之象物厥類多矣偶然喚作木居士豈特一槃瓠而已邪不然犬戎國之神哉經亦有云犬戎國有犬戎神人面而獸身非蠻人之祖也

髦民

山海經髦民國在積石

狂犬

羅氏曰余按傳記見蠻夷之種多帝者之苗矣若巴人之出於伏羲玄氏羗九州戎之出於炎帝諸蠻髦民党項安息之出黃帝白

民防風驩三鮫之出帝鴻淮夷允戎鳩藜羣舒之出少昊昆吾  
滇濮甌閩駱越之出高陽東胡僭人暴輿吐渾之出高辛兕奴突  
厥沒鹿無餘之出夏后曰是固有矣縉雲之子黃帝之孫其始不  
肖以至不材幾何而不胥爲夷也遼東存箕子之佃大夏有李陵  
之苗信矣然元魏自以出於蒼林慕容自以出於厭越赫連自以  
出於伯禹而祿山亦謂安息出於昌意之子安足果信邪余嘗言  
之夷蠻之醜雖有盛疆苟非先王之後者皆不足以得志於中國  
彼之所傳亦必有所本矣且時聞之春秋用夏變夷者夷之夷而  
進於中國則中國之彼以是心至斯受之矣不然則求之四夷而  
從鳳嬉何陋之有

白民

山海經曰大荒中有山名曰明星有白民之國帝俊生帝鴻帝鴻  
生白民白民銷姓黍食

路史曰帝鴻釐姓繼黃帝者生白民白民銷姓是爲白民之祖故  
山海經云白民銷姓國而汲冢書言白民之國今之白州亦見博  
物志孔晁以爲東南夷與白州接

防風

國語曰吳伐越隳會稽獲骨節專車吳子使來聘問之仲尼仲尼  
宴之客執骨而問曰敢問骨何爲大仲尼曰昔禹致羣臣於會稽  
之山防風氏後至禹戮之其骨節專車此爲大矣客曰防風氏何  
守仲尼曰汪芒氏之君守封禺之山者也爲漆姓在虞夏商爲汪  
芒氏於周爲長狄氏今曰大夫

路史曰防風氏釐姓白民之別爲防風氏守封禺之間  
汪芷

說文曰封嶠山在吳楚間汪芒之國歷代故以爲防風  
路史曰卽汪罔釐姓至商爲汪汭氏

縉雲

路史曰釐姓國處州之縉雲傳謂縉雲黃帝之官非也史註縉雲  
氏姜姓炎帝之裔黃時爲縉雲官矣蓋國也處州舊本帝圖經  
縉山又皆以爲黃帝氏失之

驩兜

書堯典帝曰疇咨若子采驩兜曰都共工帝曰吁  
又舜典曰放驩兜于崇山竄三苗於三危

左傳季文子曰帝鴻氏有不才子掩義隱賊好行凶德醜類惡物

頑嚚不友是與比周天下之民謂之渾敦

註謂驩兜

山海經曰大荒之中有驩頭之國鯀妻土敬士敬子曰炎融生驩  
頭驩頭人面鳥喙有翼食海中魚杖翼而行

路史曰縉雲氏妻土敬氏曰炎融遺腹而生驩頭

汲冢書  
博物志  
驩頭者

驩兜也弘農有地名兜志爲驩兜之都然意驩爲國當如魯驩未  
必兜地其後竄之崇山則澧之慈利也有驩兜墓然嶺外驩州圖  
經記以爲其竄所樂史亦記驩州爲所放處則去崇山遠矣

三苗

書堯典曰竄三苗於三危

又舜典曰三載考績三考黜陟幽明庶績咸熙分比三苗

友國詩集 卷九  
集註分比三苗謂分其民順化與違命者猶後世部分夷狄爲生戶熟戶也

書大禹謨曰帝曰咨禹惟時有苗弗率汝徂征禹乃會羣后誓於師曰蠢茲有苗昏迷不恭以爾衆士奉辭伐罪三旬苗民逆命益贊於禹曰惟德動天無遠弗届帝至誠感神矧茲有苗禹拜昌言曰俞班師振旅帝乃誕敷文德舞干羽於兩階七旬有苗來格

金氏曰有苗始末說者不同愚嘗綜其實書之所稱前曰三苗後曰有苗曰苗民書有異辭則事有不同矣當堯之時竄三苗於三危罪其渠魁也又分北三苗則削其地分其民別其部落離其黨類於以黜陟亦以銷其勢也至其後徂征之時止曰有苗曰苗民而不復云三苗者蓋已竄之後既分之餘所存者特其一種耳

山海經曰顓帝生驩頭驩頭生苗民苗民釐姓

路史曰驩堯生三苗氏苗民長齒上下相冒高辛邦之堯竄之於三危河西諸羌俱其類也

國策吳起謂魏文侯曰三苗之國左洞庭右彭蠡大山在其南殿山在其北負固不服禹伐之

周景式曰柴桑彭澤之間古三苗國左洞庭右彭蠡負固而亡者

在衡岳潭之境而南海亦有三苗國

禹伐有苗其餘裔以入南海

羅氏曰山經顓帝生驩頭又云鯀妻遺腹生驩頭驩頭生苗民故世以苗民顓帝之後果以遺腹則驩頭爲禹之弟而苗民其猶子也堯試舜禹才十歲何繇有弟若姪暴恣爲亂且苗民釐姓明甚

而黃帝子姓第七爲釐苗民爲驩頭之子而驩頭爲帝鴻之後則知驩頭縉雲之爲釐姓審矣傳言三苗爲縉雲氏之子蓋驩兜猶襲縉雲之號也堯竄之于三危今戎虜瓜沙等州河西諸羌俱是其類傳云三苗與防風同出是也范曄西羌傳乃謂西羌本出三苗姜姓之別炎帝之後姓纂從之繆矣此河關西南羌也隋書以党項宕昌白狼皆三苗後益非三苗之君入仕堯朝其國仍故是以旣竄而苗復叛傳言三苗所以不服者衡山在南岐山在北左洞庭之波右彭蠡之水也蓋江鄂之境禹奉命徂征而苗猶負固帝乃誕敷文德而苗格遂分北之其餘入于南海者爲驩朱國

崇山

驩朱

三危

重巖詳遠國篇

學海君道部卷之二十九

世系類二十

九

列國譜系十

古國篇三

少昊後國章

青

路史曰帝德攷云少昊曰清清地也一曰青陽然放清地有四一在鄆一在濮一在并解一在樂平而楚之雲陽亦曰青陽今長沙蓋帝之始封少昊父子固以爲號或少昊襲先封之名以來雲陽猶商亳楚郢重名者若恩乞青陽與宿泗之青陽蓋子孫之少處者若池之青陽則特在青山之陽耳

窮桑

左傳范獻子問於蔡墨曰社稷五祀誰氏之五官也對曰少皞氏有四叔曰重曰該曰修曰熙實能金木及水使重為句芒該為蓐收修及熙為玄冥世不失職遂濟窮桑此其三祀也

杜註曰少皞即金天氏四叔其子孫也窮桑在魯北少皞所都濟成也重治木為句芒該治金為蓐收修與熙治水為玄冥各能其官濟成少皞之功故死者為民所祀

路史曰窮桑宜在梁離之域說咸以為魯蓋以傳謂伯禽之封為少昊之虛或其後所徙非始國窮桑也

倍

山海經曰少昊生倍伐倍伐降處緡淵有水四方名曰俊壇

路史曰少昊元妃生倍伐倍伐降處緡淵既封茂為茂氏

緡

左傳夏后相為澆所滅后緡方娠歸于有仍生少康

竹書紀年帝癸十一年會諸侯于仍有緡氏逃歸遂滅有緡

路史曰緡茂姓地在山陽夏后世衰有緡為桀所克今濟之金鄉有古緡城鄒衍曰予登緡城以望宋都后緡國也賈逵以緡為有仍之姓妄

茂

路史曰茂一曰姑茂猶言於越句吳充之瑕丘有姑茂故城

尹

路史曰少昊次妃生般為弓正是制弓矢主祀弧星封于尹慶姓

蓋亦作允

汾

左傳子產曰昔金天氏有裔子曰昧為玄冥師是生允格臺駘臺駘能業其官宣汾洮障大澤以處太原帝用嘉之封諸汾川沈姒蓐黃實守其祀今晉圭汾而滅之矣

註疏曰金天氏帝少昊也裔遠也玄冥水官之長又傳云少昊四叔修及熙為玄冥昧當是修熙之後未知為誰之子或是其子孫也臺駘是金天裔孫為顓頊臣帝用加之蓋顓頊也

路史曰般有子曰昧生允格臺駘俱臣高陽駘封汾川絳州正平之汾水也故曲沃有駘

沈

路史曰沈故國在汾川晉滅之與汝南之沈別

姒

路史曰姒鄧名世云姒乃國名非姓也

蓐

路史曰蓐鄆也郊蓐俱在河南有鄆山後蓋為蓐收國

黃

都

左傳僖公二十五年秋秦晉伐都楚鬪克屈禦寇以申息之師戍商密秦人過析隈入而繫輿人以圍商密昏而傳焉宵坎血加書偽與子儀子邊盟者商密人懼曰秦取析矣戍人反矣乃降秦師秦師囚申公子儀息公子邊以歸

析楚邑隈隱蔽之處繫縛輿人詐為克析得其囚俘者昏而傳



城不欲令商密  
知囚非析入也

杜氏曰郡本在商密秦楚界上小國遷於南郡郡縣商密郡別  
邑今南鄉丹水析一名曰科今南鄉析縣

正義曰郡本都商密後始遷于郡縣國至彼縣而滅故彼縣專  
得郡名當此秦晉伐郡之時國名爲都所都之邑名商密楚以  
申息之師戍商密者正謂戍郡國也析是郡之別邑戍人居析  
地爲商密之援

春秋文公五年夏秦人入郡

左傳初郡叛楚卽秦又貳於楚夏秦人入郡

高氏曰郡蓋微國秦以其叛而入之後遂爲楚所并楚昭王復  
國之後畏吳之強去郢而都郡矣

路史曰允格封郡舊郡本商密秦楚界上小國世本云允姓國秦  
入之後遷南郡今襄之宜城西南有郡亭山上有城險固郡鄉郡  
水唐貞觀時嘗爲郡州通典皆作若故諸地書多以爲昌意所封  
失之允格有子郡姓虞帝投之幽州是爲陰戎之祖

卮言曰按志今河南上津縣古郡國

戎

路史曰姓纂云戎州允格後金天氏之裔詹桓伯云先王居檣杪  
于四裔故允姓之姦居于瓜州杜預以爲陰戎與三苗俱竄三危  
後世因謂出于三苗通典等以戎子駒支爲瓜州允姓戎非也此  
自姜姓爲秦所逐者

卮言曰路史以左傳所謂允姓戎卽姜戎是也而以戎州爲允姓

則非矣戎州既爲已氏之邑自是已姓爲昆吾之後而允戎當別有地也總系夷狄之列

皐

書舜典帝曰皐陶蠻夷猾夏寇賊姦宄汝作士

又皐陶謨曰若稽古皐陶曰允迪厥德謨明弼諧

史記夏紀曰帝禹立而舉皐陶薦之且授政焉而皐陶卒封皐陶之後於英六或在許而後舉益任之政

史記正義曰帝王紀云皐陶生於曲阜曲阜偃地故帝因之而以賜姓曰偃堯禪舜命之作士舜禪禹禹卽帝位以皐陶最賢薦之於天將有禪之意未及禪會皐陶卒括地志云咎繇墓在壽州安豐縣南一百三十里故六城東東都陂內大冢也

路史曰帝少昊取高陽氏之女曰修生大業大業取少典氏女曰華生繇繇爲虞士師封之于皐是曰皐陶皐當與咎同商有咎單讀爲舊非也皐陶有子三人長伯翳次仲甄次封偃

謠

路史曰謠國見潛夫論宜皐陶名之訛

偃

路史曰楚昭陽伐魏取鄆今許之鄆城有故城而蔡之褒信故鄆城乃漢之偃

英

史記陳杞世家曰皐陶之後或封英六楚穆王滅之無譜

索隱曰英六或作蓼六皆通據系本二國皆偃姓故左傳臧文

仲聞六與蓼滅曰皐陶庭堅不祀杜預云蓼與六皆咎繇後又齊徐伐英氏杜云英六皆皐陶後國名是有英英虞實未能詳或者英改號蓼

又曰英地闕不知所在以爲英布是其後也

正義曰英蓋蓼也括地志云光州固始縣本春秋時蓼國偃姓皐陶之後也左傳云燹滅蓼太康地志云蓼國先在南陽故縣今豫州鄆縣界故胡城是後徙於此

春秋僖公十七年春齊人徐人伐英氏

張氏曰英氏皐陶後之封也爲徐伐英氏桓公之興師末矣

汪氏曰桓公舍楚不討而加兵於厲與英氏虐區區之小國是縱豺狼而搏狐鼠也

卮言曰史記皐陶之後封英六春秋有英氏先儒以爲卽皐陶後也路史詳辯蓼非皐陶之後而又不以英氏爲英不知何據或偶失之今直隸廬州府有英山縣

六

帝王世紀曰皐陶次子甄是爲仲甄封於六

春秋文公五年秋楚人滅六

左傳六人叛楚卽東夷秋楚成大心仲歸帥師滅六冬楚公子燹滅蓼臧文仲聞六與蓼滅曰皐陶庭堅不祀忽諸德之不建民之無援哀哉

史記索隱曰地理志云安國六縣咎繇後偃姓所封國

括地志曰故六城在壽州安豐縣南一百三十二里

皇覽曰臯陶冢在廬江六縣

北魏高允傳曰允以獄者人命所繫嘗歎曰臯陶至德也其後英  
蓼先亡劉項之際英布黥而王經世雖久猶有刑之餘釁况凡人  
能無咎乎

楊氏慎曰左傳臯陶庭堅不祀蓋設監戒之言如云若敖氏之鬼  
不其餒而之比也後人遂謂臯陶真不祀而曼說者又言刑官無  
後豈不謬哉按張平子思玄賦云咎繇邁而種德兮樹德懋於英  
六註英六國名楚末乃滅枹朴子云秦乃伯益之後益卽臯陶子  
也以是參考之臯陶何嘗無後乎

胡氏應麟曰史記臯陶卒禹封其後于英六而後舉益授之政  
夫益爲臯陶子則臯陶之後卽益也何以封英六而後舉益乎

臯益五臣同列虞也益爲臯子史傳蔑聞不祀忽諸之語蓋春  
秋時或其後中絕如宣孟之忠而無後之義非謂臯陶之身也  
考英布封九江王都六乃項羽時嗣封者以英布自謂臯陶後  
故都六以襲舊都非謂禹時所封英六二國秦世尚存楚末乃  
滅也考布之會垓下史有以舒屠六之文故注云楚末乃滅然  
布傳破籍後封布九江王復都于六高帝末年布反乃滅今謂  
滅于楚末亦注之訛也至抱朴妄援尤不足辨而用修信之何  
哉又史記秦紀云帝顓頊之裔大業復取少典之子曰女華生  
大費索隱曰此卽秦趙之先伯益也據此則伯益之父大業而  
裔嬴秦也謂大業爲臯陶則嬴秦卽英六耶用修欲以證臯陶  
之多男不適以誣伯益之二父耶

陳心叔名疑曰路史云皐陶父大業取少典氏之女曰華生陶封於皐故稱皐陶帝王紀云皐陶生於偃故賜姓偃皐陶長子費是爲大費秦之祖也次子仲甄封於六秦紀云大業取女華生大費而正義卽以大業爲皐陶殆謬呂覽註云伯益皐陶之子亦謬

胡氏應麟曰按以益爲皐陶子謬始曹大家訓列女傳云陶子生五歲而佐禹注陶子皐陶之子伯益也後葛稚川張守節皆本之羅泌能辨益非皐子而不知伯益之卽伯翳故又以大業爲皐陶父而大費爲皐陶子其說之舛訛抑又甚焉考史傳益翳爲一明甚至路史謂皐陶之後爲李氏本皐陶爲理官也斯說得之

卮言曰伯益非皐陶之子路史足以破前說矣伯益之卽爲伯翳諸說足以破路史矣詳在帝王世系篇可考也史記謂皐陶之後封于英六故思玄賦云然非謂英布之都六也春秋時有英氏六二國皆滅於楚故註云然非謂英布之六項楚後滅也胡氏妄引以闢楊氏則又謬矣夫有英六則皐陶不爲無後古者諸侯祀其太祖國滅則祀亾不祀之歎如虞曹亾而虞仲振鐸之祀忽諸之謂也豈謂其絕嗣乎高允遂以英蓼先亾爲治獄之應而謂英布有刑之餘釁後世遂有刑官無後之語嗚呼定國持平而于氏高門張湯執法而封侯累世况於上聖而德邁種哉英布之起不旋踵而滅此何足爲皐陶輕重而引以爲名高氏之失言也或者必以秦爲伯益之後而伯益爲皐陶子則前辯甚悉且皐陶偃姓也伯益嬴姓也豈父子而異姓乎據路史所考偃姓之國春秋時多

矣左傳所言或亦一時太息云爾若李氏之出於臯陶路史之說甚明皆足爲臯陶有後之證而不必妄指伯益之系以附臯陶也

州  
左傳桓公十一年楚屈瑕將盟貳軫鄭人軍於蒲騷將與隨絞州  
蓼伐楚師莫敖患之鬬廉云云遂敗鄭師于蒲騷

國策莊辛說襄王曰君王左州侯右夏侯輦從

路史曰今荆南監利故華容古州也昔隋絞州蓼伐楚敗鄭者皆近楚小國莊辛言州侯者非淳于之州

卮言曰按左傳楚文王之時州與絞隨蓼伐楚至襄王時猶有州侯則州之爲國舊矣

絞

左傳桓公十二年楚伐絞軍其南門莫敖屈瑕曰絞小而輕輕則寡謀請無扞采樵者以誘之從之絞人獲三十人明日絞人爭出驅楚役徒於山中楚人坐其北門而覆諸山下大敗之爲城下之盟而還哀公二年春伐邾將伐絞邾人愛其土故賂以漕東及沂西之田而受盟

路史曰楚伐絞傳云絞小而輕是國也邾邑亦有絞在隨唐之南

貳

左傳楚屈瑕盟貳軫

詳前州條

軫

路史曰左氏傳記軫國在楚東南貳在隨南

鬲

路史曰郡國縣道記古鬲國偃姓臯陶後漢爲縣北齊併入安德  
今隸德州

郟南陽屬縣

止

路史曰地在首陽之北故曰止陽

參

棐

路史曰棐鄭地文公十三年會鄭伯處一說卽棐林今開封宛陵  
有棐林鄉集韻棐漢侯國一作棐音肥在魏郡宜誤

阮

詩大雅曰密人不恭敢拒大邦侵阮徂共

張氏曰阮國地在涇川

路史曰阮偃姓國文王侵阮是矣春秋文公四年秦伐晉圍阮  
新城蓋與元同而切爲願也故說同阮然代之五阮關乃音通  
而地異也

氏族略曰阮商諸侯國在岐渭之間

皖

路史曰皖伯爵輿地記偃姓臯陶後楚滅之漢爲侯舒之懷寧有  
皖故城皖公山皖伯廟宋州郡志云晉安於舊皖城置懷寧輿史  
云夏姓非佑作皖音患

舒

春秋僖公三年徐人取舒

高郵孫氏曰舒者附庸之國服屬於楚徐人自楚取之使之屬

徐也取國不言滅舒之宗祀復存也

家氏曰魯頌曰荆舒是懲舒與荆比而爲中國患其來久矣徐人伐舒爲中國撓楚也十五年楚伐徐齊桓率諸侯之師救之是以知徐嘗受命於齊

左傳文公十二年夏楚令尹大孫伯卒成嘉爲令尹群舒叛楚夏子孔執舒子平及宗子遂圍巢

羅氏曰孔子作春秋凡并國邑在內皆曰取外而書取必其以計若本本有者也徐人取舒何也舒昔屬徐今屬魯而徐人取之也外取內邑不繫國故世以鄆闡鄆爲魯邑不知鄆闡鄆亦皆昔不屬而今屬郟者文之昭也豈宋屬郟然罪之宋則見其今服宋故伐宋而取之知此則知舒之所屬矣据攷其地宜居

徐魯之間而非群舒哀公十四年有舒州者正乃齊地杜以舒爲羣舒江淮雜夷而徐取之爲夷蠻之自相并此尤繆矣預例以爲勝國不用大師曰取用大師曰滅抑又大妄夫成國重於附庸附庸重於都春秋必謹於此惟其罪有輕重淺深也今顧不然而反爲不道者記師行之難易邪衛侯滅邢可謂易矣而不書取公以楚師伐齊取穀用大師矣而不書滅不爲難易書亦明矣雖然秦趙莒李黃徐邽費解梁諸國其後盛矣而滅文仲以爲臯陶不祀此左氏之妄志謠斐參會阮酈舒止皆偃姓也而王符以爲嬴姓商出於潛夫之失攷且以舒庸舒龍舒鮑舒龔五也而杜佑以爲楚之五舒爲一唐史遂謂群舒一國五名勞乎今之記哉



左傳文公十四年楚莊王立子孔潘崇將襲薜舒使公子燮與子儀守而伐舒蓼二子作亂城郢而使賊殺子孔不克而還二子以楚子出遂殺鬬克及公子燮

舒蓼

左傳文公十四年楚莊王立子孔潘崇將襲薜舒使公子燮與子儀守而伐舒蓼二子作亂城郢而使賊殺子孔不克而還二子以楚子出遂殺鬬克及公子燮

春秋宣公八年秋楚人滅舒蓼

左傳楚為羣舒叛故伐舒蓼滅之楚子彊之及滑汭盟吳越而還

張氏曰杜預云舒蓼二國名按地譜上義陽之蓼文五年已滅

於楚此卽如舒鳩舒庸蓋羣舒別種非二國也

路史曰舒蓼郡也唐武德中為廖州尋廢入壽盟會圖云在光州杜以為二國既非而通典更以為潮陽潮陽乃廖也因預之謬

舒庸

春秋成公十七年冬十二月楚人滅舒庸

左傳舒庸人以楚師之敗也道吳人圍巢伐駕圍釐虺遂恃吳而不設備楚公子橐帥師襲舒庸滅之

任公輔曰舒庸東夷偃姓之國地譜廬州城下舒城

薛氏曰舒庸舒之別種也詩曰荆舒是懲則荆舒之國皆非一種也春秋之始荆舒皆以名見舒庸舒蓼舒鳩之滅荆舒一於

楚矣

路史曰舒庸在舒城內與庸別

舒鳩

春秋襄公二十五年秋楚屈建帥師滅舒鳩

左傳襄公二十四年吳人爲楚舟師之役故召舒鳩人舒鳩人叛楚楚子師于荒浦使沈尹濤祁犁讓之舒鳩子敬逆二子而告無之且請受盟二子復命王欲伐之遽子曰不可乃還二十五年遽子卒屈建爲令尹舒鳩人卒叛楚令尹子木伐之及離城吳人救之子木遽以右師先擊吳師吳人大敗遂圍舒鳩舒鳩潰八月楚滅舒鳩

汪氏曰舒鳩偃姓子爵國

路史曰舒鳩故城在舒城內離城荒浦皆其也

舒龍

路史曰杜預云六西南有舒城又西南有龍舒今舒城西北龍縣故城去州三百而舒城懷寧皆有龍舒鄉大小龍山曰龍以別羣

舒

舒鮑

路史曰舒鮑世本云小國寰宇記舒鮑城在舒城西北龍舒水南小於諸城

舒龔

路史曰堯之龔丘東南有古龔丘城然與羣舒遠疑別國右偃姓國

李

路史曰伯翳少子恩成之佃世為理以命族至紂時理徵為冀肆中吳伯弗合以死取契和氏逃難伊虛為李氏李理字通許帝系徐廣云河內平臯有李城李坂今温縣城是昔李同却秦兵歿封其父李侯即其地

卮言曰臯陶為士士即理今之理官也理與李通臯陶之後世為李路史考之甚悉詳在本類帝王篇唐世章然羅氏以李為伯翳少子恩成之佃則又不合亦詳前章今系於此

苦

路史曰理徵生仲師昌祖冢于苦生形德其曾孫碩宗因采焉康王命今毫之衛真漢苦縣隸淮陽國晉屬梁國後魏為谷陽唐為真

源有渦水瀨鄉祠老子生處

萊

路史曰碩宗五世孫曰乾字元果為周御史生耳是為老子邑干苦之賴賴乃萊也故又曰老萊子

段干

路史曰老子生宗邑干段干初邑段後邑干因邑而氏其後有段干木傳云蹇叔處干而干亾之秦而秦伯干國也而風俗通氏姓乃以為姓段名干木唐百官表遂以為姓段而為干木大夫疎矣郡國志衛縣南有干城詩出宿于干者今開封有邗溝段干木廟而墓乃在汾之孝義東北二十五里

贏

史記秦紀曰大費佐舜調訓鳥獸是爲伯翳舜賜姓嬴

路史曰伯翳能馴鳥獸知其話言以服事虞夏始食于嬴爲嬴氏  
暨功益弘帝乃錫之阜存玄玉姚女而封之費是爲大費

羅氏自注曰嬴盈也翳能毓物庶物盈美而以爲封春秋時爲  
齊邑襄公會齊侯處漢縣屬太山郡後魏復置於萊蕪唐入  
博城所謂嬴博宋萊蕪屬充

又曰益翳二人書傳多以爲卽伯益故以嬴姓臯陶爲出高陽  
而大廉若木爲伯益子者成都記伯益二子大曰大廉封鳥俗  
氏小曰若木別爲費氏居南裔爲諸侯又九真守谷朗碑云出  
自顓頊益爲舜虞賜姓嬴氏至扉子封秦谷爲氏皆繆以益翳  
聲近而職同爾

卮言曰路史之謬無如叙臯陶伯益之世系也但知伯益非臯陶  
子而不知栢翳卽伯益也若以翳爲臯子則秦趙宜祖臯陶而臯  
陶隱姓非嬴也嬴自是伯益之後同出少昊詳帝王門秦世章

費

竹書夏后啓二年費侯伯益出就國六年伯益薨祠之

王氏筆叢曰益封費蓋舜禹之世非啓始封也史記以大費爲  
伯翳名其誤由此

史記大費生子二人一曰大廉實鳥俗氏二曰若木實費氏其玄  
孫曰費昌子孫或在中國或在夷狄費昌當夏桀之時去夏歸商  
爲湯御以敗桀於鳴條

索隱曰以仲衍鳥身人言故爲鳥俗氏若木以王父字爲費氏

也殷紂時有費仲卽費昌之後

竹書夏后帝癸二十九年費伯昌出奔商

路史曰費翳之封音沸費州費水之地與魯費河南費異

盈

路史曰盈羸之枝與熊郁皆爲周公所郊一作鄧姓也或云卽羸者非

蕭

路史曰伯翳生大廉若木恩成大廉之後有孟虧仲衍孟虧能帥翳者胙土于蕭今徐之蕭漢故縣屬沛北征記云城週十四里南臨沔水

梁

左傳桓公九年秋虢仲芮伯梁伯荀侯賈伯伐曲沃

僖公十八年梁伯益其國而不能實也命曰新里秦取之遂城而居之

史記秦德公元年梁伯芮伯來朝成公元年梁伯芮伯來朝繆公二十年秦滅梁芮

索隱曰梁羸姓國在馮翊夏陽

春秋僖公十九年冬梁亾

左傳梁亾不書其主自取之也初梁伯好土功亟城而弗處民罷而弗堪則曰某寇將至乃溝公官曰秦將襲我民懼而潰秦遂取梁

公羊傳此未有伐者其言梁亾何自亾也其自亾奈何魚爛而

亾也

張氏曰梁嬴姓伯爵伯翳之後春秋變法以書諸侯自取滅亡者有二晉人執虞公猶言兵已加於頸而不自知也梁亡言國自亡而不之覺也

路史曰仲衍裔孫曰蜚廉生葦暨季勝季勝後造父封趙詳前章葦

五世曰非子是爲秦仲周孝王封之秦谷使復嬴氏詳前帝系章而復

錄其少子康使有夏陽爲梁伯秦德公三年梁伯來朝索隱曰嬴姓是矣魯僖公十九年秦取梁惠文君更名夏陽今同之韓城有少梁故城文公十年晉伐秦取少梁是也

卮言曰按一統志今陝西郃陽縣古梁國

西梁

路史曰高陽氏有才子八人二曰伯益爲唐澤虞是爲百由將軍佐禹治水封之于梁是爲西梁地理風俗傳扶柳西北五十有梁城故漢西梁縣西梁故城在今冀之南宮堂陽鎮鎮之東鹿南六十里縣道記西梁故城二三里

卮言曰路史以伯益伯翳爲二人故云伯益封梁栢翳封費按益卽翳封費故曰大費其封梁者自是益之後代系益于梁猶系湯于殷非益始封梁也西梁者又梁之析如北虢西楚耳路史亦誤

南梁

路史曰南梁大敖梁之析也

敖

路史曰梁析傳謂顓頊大敖之後詩云薄狩于敖是也今沂之新

泰東十一故敖國有敖山

鍾離

路史曰梁伯之後采鍾離者今沂之承有鍾離氏春秋晉與諸侯會吳于鍾離是也應劭曰鍾離子國在九江蓋其後徙于此吳滅之光武時爲侯國今濠之治東六里鍾離故城也而宜咎之所城則楚地矣

卮言曰春秋成公十五年冬叔孫僑如會晉士燮會吳于鍾離杜氏云鍾離楚邑淮南縣是時鍾離已入楚矣按志今直隸鳳陽府古鍾離地

鍾離  
運

路史曰梁之後食于運者京相璠云廩丘東八十有運城廩丘隨併入鄆城今隸濟晉人執季文子還待于鄆卽此

奄

書多士篇曰朕來自奄至于宗周

書序曰成王東伐淮夷遂踐奄

孔氏曰踐滅也成王卽政淮夷奄國又叛王親伐之遂滅奄而徙之

鄭玄曰奄國在淮夷之北

史記正義曰奄音於險反括地志云奄泗水徐城縣北三十里

古徐國卽淮夷也兗州曲阜縣奄至卽奄國之地

又成王旣踐奄將遷其君於蒲姑周公告召公作將蒲姑

列國諸系 卷十  
孔氏曰蒲姑齊地徙近中國後化之

史記正義曰括地志云薄姑故城在青州博昌縣東北六十里薄姑氏殷諸侯封於此周滅之

呂氏曰淮夷與奄成王時蓋皆再叛大誥東征淮夷叛矣此序復云多士言昔遷來自奄矣此序又云可見也

李氏杞曰貴州千乘縣有薄姑城遷奄君臣於薄姑遷奄民於魯祀鮑所謂因商之民而命伯禽也

竹書成王二年奄人及淮夷入于邶以叛三年王師滅殷遂伐奄滅蒲姑四年王師伐淮夷遂入奄五年春正月王在奄遷其君于蒲姑夏五月王至自奄

孟子曰周公相成王誅紂伐奄三年討其君

左傳景王使詹桓伯辭於晉曰武王克商蒲姑商奄吾東土也

路史曰梁之後自運采掩卽奄郟也堯之仙源故曲阜有奄城奄里郡國志曰奄城古奄國唐韻曰奄國名祝佗云因商奄之民以命伯禽者按尚書將蒲姑成王政俱云踐奄而周官言威淮夷大誥言淮夷叛多士乃言朕來自奄知奄近淮夷也古之弁中張茂先云史記出魯弁中左傳齊崔杼之難間丘嬰行出弁中杜預疑爲太山萊蕪西礬口谷

尋

路史曰今尋陽字一從水梁之後尋衙汪良蕙裘不羹東灌東閭修魚樵里密如高陵附庸氏也

衙



路史曰今同之白水有彭衙故城

汪

路史曰今同之白水有汪城在臨晉東

良

路史曰今淮陽有古良城史作將梁

蒐裘

不羹

左傳昭公十一年楚共王城陳蔡不羹明年伐徐謂子革曰今我大城陳蔡不羹賦皆千乘諸侯其畏我乎對曰是四國者專足畏也又加以楚敢不畏君王哉

羅氏曰春秋時有二不羹襄城爲西不羹今龍興之南有古不羹  
城定陵爲東不羹今入潁川舞陽縣子革云四國皆足畏謂陳蔡  
二不羹也

鍼

路史曰非子之支孫曰秦鍼奔晉封裴中曰裴君傳謂平公封顓  
帝孫鍼爲裴君故表又以爲顓帝風姓之後安矣六世陵遷解爲  
解君

裴

路史曰裴邕也河東聞喜裴鄉是

解

路史曰解今洛西南大解城也又有小解非河東之解

徐